



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

891.99-82

Գրական և Պ.Եղարվեստական արձանագրություն

1917

№ 1-2-3/4

Ք/Ք/Ք/Ք

ԳՐԱԿԱՆ - ԳԵՂԱՐԻԵՆԱՏԱԿԱՆ
ԱՆՄԱՆԱԻ

Ն Ի Թ Ե Ր Ո Ի Ն Ե Ն. — Մ Ի Ք. Մ Ա Ն Ի Է Լ Ե Ա Ն, Վ.
Տ Է Ր Ե Ա Ն, Ա Ր Մ. Տ Ի Գ Ր Ա Ն Ե Ա Ն, Գ. Ք Ե Ա Լ Ա Շ Ե Ա Ն,
Ա Ն Ո Ի Ր Ջ, Ս Տ. Զ Օ Ր Ե Ա Ն, Ն. Ա Յ Ր Ի Կ Ե Ա Ն, Վ. Ա Ղ Ա-
Ս Ե Ա Ն, Ռ Ա Ֆ Ա Յ Է Լ Զ Ա Ր Դ Ա Ր Ե Ա Ն, Վ. Վ Ա Լ Ա Դ Ե Ա Ն,
Ս Ա Ր-Յ Ո Վ, Պ Ա Յ Ա Ր Է, Ե Ղ Ի Ա Տ Է Ր-Չ Ա Յ Ր Ա Պ Ե Տ Ե Ա Ն,
Ա Զ Ա Տ Վ Շ Տ Ո Ի Ն Ի, Մ. Է Փ Ր Ի Կ Ե Ի Յ. Մ Ե Լ Ք Ո Ի Մ Ե Ա Ն:

3-4

ԽՄԲԱԳՐՈՒԹԵԱՆ ԿՈՂՄԻՑ

Թէև խոստացել էինք «Գրական-Փեղարւե-
ստական Ալմանախի» բաժանորդներին այս տա-
րի 3 ութրով տալ վեց գիրք, բայց հանրածա-
նօթ թղթի սովի և տպարանական ծանր պայ-
մանների պատճառով խմբագրութիւնս կարողա-
ցաւ իր բաժանորդներին տալ միայն չորս գիրք:
Այնպէս, որ բաժանորդները ստանալով այս գիր-
քը, իրենց պէտք է համարեն բաւարարւած:

ԼԱՅՍ ՏԵՍՈՒ

Երիտասարդ գրողների գրադարան № 1.

ՄԻՔ. ՄԱՆԻԷԼԵԱՆ

ԵՐԿԵՐԻ ԺՈՂՈՎԱԾՈՒ

Հատոր II

Շքեղ հրատարակութիւն — Հեղինակի
պատկերով: Գինը 3 ռ.: Ճօնապարհա-
ծախսով 3 ռ. 50 կ: Գիմել՝ Тифлисъ,
Книгоиздательство «Патани», М, Эпри-
кянъ, Ходживанская, 5.



ՍՐՃԱՐԱՆՈՒՄ*)

Երբ նա ներս էր մտնում սրճարան և նստում իր մշտական տեղը, սրճարանի բոլոր ծառայող աղջիկները ժպտալով իրար էին նայում ու աչքերով նշաններ անում:

Իսկ փոքրիկ Նինան առաջուց գիտենալով պատուէրը, շտապում էր բերել մի բաժակ սուրճ երկու պաքսիմատի հետ:

Սրճարանի աղջիկները այնքան սովորել էին օրւայ նոյն ժամին, նոյն տեղում նստած տեսնել այդ երիտասարդին, որ եթէ մի օր չէր գալիս, զարմացած իրար էին հարցնում, թէ արդեօք ի՞նչ է պատահել:

Իսկ փոքրիկ Նինան՝ առանց այն էլ գունատ ու թուլակազմ, աւելի էր գունատւում, թախծոտ դէմքը աւելի էր մռայլում, և անժպիտ, ակամայ ծառայում էր յաճախորդներին:

*) Համարեա ամեն օր լինում էի այդ սրճարանում. այդտեղ մի ծառայող աղջիկ կար սաստիկ նման օրիորդ Ս. Աղամեանին: Մի անգամ օրիորդին տարանք այդ կաֆէն՝ ցոյց տալու իրա կենդանի պատուկերը:

Երբ օրիորդ Ս. Աղամեանը մեռաւ, ես զրեցի այս պատմւածքը և նւիրեցի նրա յիշատակին:

Նախքան տպագրութեան յանձնելը պատահմամբ կրկին ձեռքս անցաւ կնուտ Համսոնի «Սիրոյ ստրուկներ» պատմւածքը, զգացի, որ նրա ազդեցութիւնը, ըստ երևոյթին, կայ պատմւածքիս վրայ: Այնուամենայնիւ չեմ ամաչում, նոյնիմե եթէ կայ այդ ազդեցութիւնը և յանձնում եմ տպագրութեան:

Մ. Մ.



Սև, մեծ-մեծ աչքերը շարունակ դռներին յառում, շարունակ նոյն միտքը գլխում, արդեօք հիւանդ չէ՞:

Օրւայ որոշ ժամերին նա գալիս էր, նստում անկիւնում դրւած փոքրիկ կլոր սեղանի մօտ և եթէ պատահամբ բռնւած էր լինում, սպասում էր մինչև ազատւի և երբէք չէր դաւաճանում ոչ իր սեղանին, ոչ էլ իր մի բաժակ սուրճին՝ երկու պաքսիմատի հետ:

Երբեմն նա երկար նստում էր և կարծես մոռանում էր, թէ ինչու է եկել սրճատուն, մինչև փոքրիկ Նինան սիրտ առնելով զգոյշ մօտենում էր և կամաց շշնջում.

— Ձեր սուրճը սառչում է:

Նա թեթև ժպիտով նայում էր նրան, շնորհակալութիւն յայտնում ու մի քանի գդալ մերթնայաբար կուլ տալուց յետոյ կրկին խորասուզւում մտքերի մէջ:

Նինան դռան շէմքից նայում էր նրան և նրա հետ միասին ինքն էլ տխրում, ցաւում, որ ոչնչով չի կարող օգնել, սփոփել էլ առուել տանջում էր նրան այն, որ ոչինչ, ոչինչ չգիտէ նրա մասին, չգիտէ ինչ մտքեր են տանջում նրան:

Երբեմն նա ծաղիկներ էր բերում և գնալուց թողնում սեղանի վրայ ու կամաց ասում.

— Նինա, ձեզ համար են:

— Շնորհակալ եմ, — կարմրելով պատասխանում էր աղջիկը, ուրախութիւնից պատրաստ արտասուելու:

Նրա գնալուց յետոյ, Նինան տխրում էր, որ այդ օրը էլ չի տեսնելու նրան: Վերցնում էր բաժակը, ծաղիկները, արագ անցնում հարևան սենեակը սղմում ծաղիկները շրթունքներին զգոյշ ու գաղտնի, որ ոչ ոք չտեսնի և ուրախութիւնից լալիս էր:

Բոլոր նրա բերած ծաղիկները նա խնամքով տաւն էր հասցնում. իսկ երբ սկսում էին թառամել, նա հանում էր ջրից և դնում արդ ու զարդի աղքատիկ սեղանի վրայի վազայում, միւսների մօտ:

Չորացած ծաղիկների մի ամբողջ փունջ էր կազմել նրա բերած ծաղիկներից:

Նինան սիրահարւել էր անկիւնի հիւրի վրայ: Գիտէին սրճարանի բոլոր աղջիկները: Բայց ինչպէս է վերաբերւում հիւրը Նինային, այդ ոչ ոք չգիտէր:

Երբեմն երբ ծաղիկներ էր բերում, բոլորը վճռում էին, որ նա էլ Նինային է սիրում: Բայց լաճախ այնքան սառն էր լինում, որ նոյնիսկ չէր էլ նայում Նինային, որն այնպես սրտատրոփ սպասում էր նրան: Այնքան անտարբեր, որ կարծես այդտեղ չէր, այլ հեռու, շատ հեռու:

Այդպիսի դէպքերում վճռում էին, որ չի սիրում, որ եթէ սիրի կր սպասի սրճարանի փակելուն, ճանապարհ կը կը ձգի, այնպես, ինչպես իրենց սիրած երիտասարդները: Այս մէկը այդ երբէք չէր անում, ուրեմն չի էլ սիրում:

Նինան խուսափում էր այդ նիւթի վրայ խօսելուց ընկերուհիների հետ և աշխատում էր որքան կարող է անտարբեր ձևանալ, բայց այդ նրան չէր յաջողում:

Այդ զգացմունքը քանի գնում աւելի էր ուժեղանում և նա այլևս անկարող էր կրծքի տակ պարփակել այդ ուժեղ ճիչը, որ ինքն իրեն դուրս էր ցայտում, և եթէ լուէր, կուրծքը կը պատուէր:

Մի օր նա թղթէ անձեռոցիկի վրայ գրեց. «Ես ձեզ սիրում եմ», և դրեց պաքսիմատների տակը: Իսկ ինքը դողալով դռան շէմքից սկսեց դիտել: Բայց տղան չնկատեց էլ, սըրբեց բերանը, ճմուտեց և ձգեց արխէի մէջ:

Այդ օրը նա սովորական ժամից ուշ եկաւ:

Նինան իսկոյն նկատեց, որ սովորականից աւելի նեարդային և յուզւած է: Նա նստեց իր սեղանի մօտ, ծոցի գըրպանից մի նամակ հանեց պատուած ծրարով, նշան էր, որ առաջին անգամ չէ որ կարդում է:

— Բարև ձեզ, — սուրճը և պաքսիմատները դնելով սեղանի վրայ ասաց Նինան, մի խեղճ ժպիտ դէմքին՝ նայելով նրա վրայ:

— Ինչո՞ւ բարի լոյս չէք ասում, Նինա, մի՞թէ այդքան ուշ է:

— Այո, այսօր շատ ուշ էք գալիս: Սովորականից մէկ ու կէս ժամ ուշ: Ես կարծում էի էլ չէքգալ:

— Բանի ես այստեղ եմ միշտ կը գամ: Ես պէտք է ամեն օր տեսնեմ ձեզ:

— Ի՞նչ... շնչաց աղջիկը հազիւ զսպելով իրեն՝ որ չճչայ:

— Այո, ձեզ, դուք այնքան նման էք նրան...

— Ո՞ւմ:

— Նրան: Ես ամեն առաւօտ նրա համար ծաղիկներ էի տանում, իսկ այժմ նա այստեղ չէ. ձեզ համար եմ բերում, վերցրէք:

Նա կրծքին ամրացրած վարդը հանեց և դրեց սեղանի վրայ:

— Դուք շատ բարի էք... Նա ձեր սիրածն է:

— Այո, ոչ: Մի՞թէ ձեզ համար միևնոյն չէ:

— Միևնոյն... Այդ նամակը նրանի՞ց է:

— Այո, նա ինձ կանչում է:

— Դուք պէտք է գնաք...

— Մի քանի օրով... Նա մի քիչ տկար է:

— Միք գնալ... Անգիտակցաբար դուրս թռաւ աղջկայ բերանից: Բայց իսկոյն ուշքի գալով, լայն բացած աչքերով նայեց նրա վրայ և կարծես այլևս անկարող մի խօսք ասելու, արագ դարձաւ և համարեա վազելով անցաւ հարևան սենեակը, գլուխը ձեռներին մէջ առաւ, սղմեց պատին և հեկեկաց: Աղջիկները շրջապատեցին նրան, ջուր տւին, հարց ու փորձ արին, նա ոչ մի խօսք չասաց, լուռ սրբեց աչքերը, նստեց ցած նստարանի վրայ, գլուխը կախ, ձեռները ծնկների մէջ սղմած, անօգնական, թշուառ տեսքով:

Երկար նա անշարժ նստած էր:

— Նինա, անկիւնի պարոնը քեզ կանչում է, — ներս մըտնելով ասաց աղջիկներից մէկը:

— Ի՞նչ...

Շփոթեալ ու վախեցած ոտքի ելաւ Նինան:

Մի բոպէ կարծես չհասկացաւ թէ ինչ պէտք է անի. ո՞վ է կանչում, ինչո՞ւ: Բայց ուշքի գալով սրբեց աչքերը, ուղղեց մազերն ու գնաց:

— Ի՞նչ էք կամենում:

— Նինա, գուցէ ես այսօր գնամ... Մի շաբաթով... Նա մի քիչ տկար է: Ես նրան կը պատմեմ, որ մի շատ լաւ աղջիկ կայ, որ շատ նման է իրեն, անու՛նը Նինա... Նինա, եթէ դու տեսնես նրան շատ պիտի սիրես. նա այնքան լաւն է, բարի. նա շատ, շատ նման է քեզ... Դու հօ չես նեղանում, որ ես չդուռով եմ խօսում քեզ հետ:

- Ոչ, խնդրեմ:
- Կուզե՞ս բարևեմ քեզանից:
- Այո, բարևեցէք:
- Դէ, ցտեսութիւն...
- Դուք իսկապէ՞ս գնում էք:
- Այո, մի շաբաթից կրկին այստեղ կը լինեմ: Գուցէ յաջողւի նրան էլ բերել, ես ձեզ կը ծանօթացնեմ...
- Ցտեսութիւն...

Աղջիկը սառած նայեց նրա ետևից, մինչև նա դուրս եկաւ փողոց և խառնուեց ամբոխին: Տխուր վերցրեց դատարկ բաժակը և պնակը, վարդը, որ մնացել էր սեղանի վրայ և դանդաղ գնաց:

Որքան էլ տխուր, սարսափելի երկար թւային նրա բացակայութեան օրերը, այնուամենայնիւ անցան:

— Այսօր նա պիտի գայ:

Այդ օրը անցնում էր, միւս օրը նա սպասում էր ու մրտաժուժում. «Այսօր կը գայ»: Այդ օրն էլ գուր սպասելուց յետոյ, հետևեալ օրը նա սպասում էր, որ «գուցէ այսօր գայ»:

Բայց նա չէր գալիս:

Արդէն խոստացած ժամանակից երկու շաբաթ էր անցել: Նինան աւելի էր նիհարել ու գունատել: Ախորժակը փակւել էր, քունը կտրւել, գլուխը պտտւում էր, աչքերը սևանում: Բժիշկը ասաց, որ արեան պակասութիւն ունի և բժշկութիւն նշանակեց: Մի քանի օր այնքան թոյլ էր զգում, որ չկարողացաւ ծառայութեան գնալ: Ընկերուհու միջոցով սրճարանատիրոջը յայտնեց, որ մի քանի օր չի կարող գալ ու մնաց անկողնում, շարունակ նրա մասին մտածելով: Անհամբեր նա սպասում էր մինչև սրճարանը փակւի և ընկերուհիներից մէկն ու մէկը գար, որ հարցնի արդեօք չի՞ եկել:

Չորս օր պառկելուց յետոյ, նա առաւօտեան վաղ վերկացաւ, որ սրճարան գնայ, վախենալով զրկւել տեղից, մանաւանդ որ սրճարանատէրը լուր էր ուղարկել, որ եթէ հիւանդ է և չի կարող ծառայել, կարող է չգալ:

Նրա գլուխը պտտուեց, քիչ էր մնում ընկնի. նա նորից նստեց անկողնու վրայ, մի քանի րոպէ անց՝ նորից վեր կա-

ցաւ, լւացւեց, հագնւեց և օրօրելով հասաւ սրճատուն:

Սրճարանատիրոջից ներողութիւն խնդրեց, ասաց որ այժմ լաւ է և կանոնաւոր կը յաճախի. անցաւ իրենց սենեակը և նստեց: Դեռ սրճարանում ոչ ոք չկար: Ընկերուհիներէից իմանալով, որ դեռ չի եկել, խնդրեց որ մի բաժակ թէյ տան:

Տաք թէյը մի քիչ կազդուրեց նրան. նա վեր կացաւ և սկսեց օգնել ընկերուհիներին՝ բաժակները, ամանները մաքրել: Ժամը տասներկուսից անց էր, որ աղջիկները մէկը միւսի ետևից վազեցին Նինայի մօտ, աղմուկով իրար հրհրելով, որ առաջինը հաղորեն:

— Նինա, ուրախացիր, եկաւ...

— Յկաւ, եկաւ,— իրար ետևից կրկնեցին աղջիկները:

— Մենակ է նա,— մի փոքր լռելուց յետոյ հազիւ արտասանեց նա, բռնելով սիրտը և ոտի ելնելով:

— Այո:

— Ի հարկէ:

— Նա միշտ մենակ է գալիս:

Նա սկսեց վազել ընկնել նրա գիւղը, բոլորի առաջ ասել, որ սիրում է, որ կը մեռնի առանց նրան, բայց շուտով հասկացաւ, որ խելագար կը կարծեն և իսկոյն և եթ սրճարանի տէրը դուրս կը վճնդի փողոց:

Նստեց առաջւայ տեղն ու անմիտ աչքերով նայում էր մի կէտի:

— Նինա, գնա. քեզ է սպասում:

Նա անգիտակցաբար վեր կացաւ, մի քանի քայլ արեց դէպի դուռը ու էլի ետ եկաւ:

— Խնդրում եմ գնացէք, ես չեմ կարող:

Աղջիկներից մէկը գնաց իմանալու, թէ ինչ է կամենում:

— Բարև ձեզ պարոն. վաղուց է չէք երևում... Ի՞նչ կը կամենայիք:

— Իսկ ո՞ւր է Նինան:

— Այստեղ է նա, մի քիչ տկար է, մի շաբաթ է պառկած էր, նոր է վեր կացել:

— Խնդրեցէք նրան, որ գայ. ասացէք, որ կարևոր բան պիտի ասեմ:

— Իսկոյն:

— Նինա, քեզ է ուզում: Այնպէս տխուր է նա. գնա տես:

Նինան վեր կացաւ, օրօրւելով մօտեցաւ դռանը, նայեց դռան ձեղքից և թւաց թէ իսկոյն կը ընկնի. սիրտը այնպէս արագ էր բարախում, որ շնչառութիւնը արգելում էր: Մի բաժակ ջուր խմեց և հաւաքելով ուժերը դուրս եկաւ:

Ինքն էլ չիմացաւ թէ ինչպէս հասաւ նրա սեղանին, նըրան թւաց, թէ դա նա չէ սեղանի մօտ նստած, այլ մի օտար մարդ, որին նա առաջին անգամն է տեսնում:

— Նինա... Նինա...

Լսեց Նինան նրա ձայնը, բայց նրան թւաց, թէ հեռւից, շատ հեռւից է գալիս:

— Ի՞նչ է պատահել Նինա. դու ինձ չես ճանաչում:

— Ինչու այդքան ուշացաք, ուշքի գալով շնջաց Նինան, հազիւ արտասանելով խօսքերը:

— Նինա... գիտես... նա...

Նրա ձայնը դողաց և չկարողացաւ վերջացնել:

— Ի՞նչ...

— Նինա, նա այլևս նման չէ քեզ, այսինքն դու նման չես նրան, դու ապրում ես, իսկ նա...

— Ես ձեզ չեմ հասկանում:

— Նա մեռաւ, Նինա...

— Մեռաւ:

— Ծիծաղելին այն է, Նինա, որ ես շարունակում եմ և ուտել, և սուրճ խմել... Ծիծաղելի է չէ...

ՄԻՔ. ՄԱՆԻԷԼԵԱՆ

Տ Ր Ի Օ Լ Է Տ

Մաշուժ է իմ սիրտն անդադար
Հին երգ մի ծանօթ ու տրտուժ,
Կիզում է կարօտ մի արթուն,
Մաշուժ է իմ սիրտն անդադար:
Դրժել եմ կարծես մի երգում,
Մի ուխտ եմ թողել անկատար—
Մաշուժ է իմ սիրտն անդադար
Հին երգ մի ծանօթ ու տրտուժ...


Վահան Տէրեան

* * *

Նետում եմ աւէր իմ կեանքը ահա
Պատուհասների մեծ ճամբի վրայ.
Թող տանի բախտը հիմա ուր կուզի,
Էլ ոչ մի շուկ հոգիս չի յուզի:

Իմ հանդէպ հիմա կայ մի գերեզման,
Ուր լուռ թաղեցի սէրըս յաւիտեան.
Ի՞նչ փոյթ, էլ որքան հողմ ու ցուրտ փչի՝
Հանգած կրակը նորից չի հանգչի...

Արմենուհի Տիգրանեան



Ա Ղ Օ Թ Ք

Լուռ ու դանդաղ
Դիերն անթաղ՝
Հողն է դնում ծեր քահանան:
«Ցաւ ու չարիք,
Արեան մըրիկ՝
Այս աշխարհից միշտ չքանան...

Ոխը սրտին,
«Վրէժ» շրթին,
Ատելութեամբ վառւած անգոր,
Քանի քանի
Վառ պատանի,
Ծեր ու մանուկ ընկան այսօր:

Թէ ունես դեռ
Պատուհաս, Տէր,
Անցողը մեզնից ու խնայի:
Ներիր, որ մեր
Հոգին անմեռ
Վրէժ սնեց, ձգտեց մահի:

Խաչը մէկ-դին
Նետած գետին,
Քինախնդիր բոցով վառւած,
Մարտիկների
Շարքին արի՛
Ես մաղթեցի հատու հարւած:

Ներիր, որ քո
 Հովի ներքոյ
 Բորբոքեցինք պայքար ու թոյն.
 Մեր խեղճ սրտին
 Տնւր վերստին
 Խաղաղութիւն, խաղաղութիւն...»

Մութի միջին
 Պարտքը վերջին՝
 Կատարում է ծեր քահանան...
 «Ցան ու չարիք,
 Արեան մըրիկ
 Այս աշխարհից մէջտ չքանան»:
 Գ. Զեալաշեան

Որպէս հողմածեծ տերևը աշնան,
 Որպէս մոռացած որբը դժգունակ,
 Երկնքից ընկնող ասուպի նման՝
 Անյոյս դողում եմ լուսամուտիդ տակ:

Դու չգիտես այդ... Քնած ես անդորր,
 Դճւ, իմ երազած քնքոյշ հրեշտակ...
 Իսկ ես՝ հոգեզմայլ ու արտասււթոր
 Անուշ հալւում եմ լուսամուտիդ տակ:

Անուրջ

ՍՊԻՏԱԿ ՏԱՆ ԲՆԱԿԻՉՆԵՐԸ

Կան մենաւոր մենակ սրտեր
անյայտ անտես հեռուներում,
խոր ու մթին անտառներում...
—Ո՞վ է նրանց ողջոյն բերում...

Մոլորակահան երգից

Այդ տունը վաղուց, շատ վաղուց է կանգնած այդ անտառի մէջ:

Ես նրան յիշում եմ դեռ մանկութիւնից:

Այնտեղ, ուր փոշոտ խճուղին, ինչպէս մի գորշ ժապաւէն, օձապտոյտ ոլորումներով, իմ ծննդավայրից վազում է դէպի Սեան, այնտեղից միշտ երևում է նա՝ անտառապատ սարի բարձրում բազմած: Ծառերի միապաղաղ կանաչի մէջ այդ սպիտակ շէնքը անցնորդներին թւում է ինչ-որ խորհրդաւոր բան: Աղօթասէր օտարականին նա թւում է մատուռ կամ վանք, իսկ Ռուսաստանից նոր եկած պետական պաշտօնիայի սրտում զարթեցնում է հազար ու մի կասկածներ, թէ արդեօք հակապետական գործերի մի որջ չէ՞ դա, արդեօք այնտեղ կեղծ դրամներ չե՞ն կտրւում... Բայց թէ օտարականը և թէ պետական պաշտօնեան սխալւում են միշտ: Այդ սպիտակ տունը, որ գոռոզ կերպով բազմել է անտառի գլխին, — հանրակացարան է ծծումբի հանքի բանւորների, որոնցից սակայն նա դատարկ է հիմա: Կար ժամանակ, որ նա այդ վայրի տեղում իրենից ներկայացնում էր մարդկային մի փեթակ, որի մէջ բազմաթիւ ձեռքեր էին աշխատում առաւօտից մինչև երեկոյ և բազմաթիւ գլուխներ էին ննջում երեկոյից մինչև առաւօտ: Բայց այժմ դատարկ է նա, ինչպէս ծառի վրայ հիւսւած թռչունի մի բուն, որի մէջ եղած ձագերն իրենց մօր հետ թռել են վաղուց. նրա տէրերը թղթախաղում սնանկանալով, փակեցին հանքը, փակեցին հանրակացարանը և գնացին հանգստանալու քաղաքում... Բայց նրանք այնքան բարի

եղան, որ չհեռացրին իրենց ծեր ծառային և թողին նրան այդ տանը պահապան:

Այդ ծառան քեռի Վարոսն է, սպիտակ միրուքով մի փոքրիկ ծերունի, որ շաբաթը մի քանի անգամ՝ երկաթածայր գալազանը ձեռին, ռուս գինւորի հաստ կօշիկներով, իջնում է գիւղ և կէս օրին վերադառնում մի փոքրիկ կապոցով կամ մի տոպրակով:

Վաղուց ապրում էր նա այդտեղ իր պառաւի հետ միասին, իրենց հաւերով և ծեր շնով:

Ծեր ամուսիններն իրենց փոքրիկ, կնճռոտ դէմքով, խօսելու եղանակով, շարժ ու ձևով, այնքան նման էին իրար, որ կարելի էր կարծել, թէ խստապահ կրօնաւորից դաստիարակւած քոյր ու եղբայր են: Երկուսն էլ խօսում էին ծոր տալով, զգոյշ և իրարից ակնածելով, ինչպէս նորապսակ ժամանակ: Ինչպէս պսակի առաջին օրերին, այնպէս էլ հիմա, նրանք չէին վստահանում իրար անուն տալ, և միմեանց կանչում էին «Ա՛յ տօ»:—«Էսօր հաւերին կուտ տւել ես, այ տօ» —հարցնում էր ծերունին:—«Ի հարկէ, այ տօ, ի հարկէ, տւել եմ»,—պատասխանում էր պառաւը: Չաւակներ չունենալով, ծերերն այդ անտառի մէջ իրենց հոգատարութիւնն ու խրնամբը նւիրում էին հաւերին, պառաւ շանը, այդ տանը և նրա մէջ եղած իրերին:

Առաւօտները զարթնելով, պառաւը նախ և առաջ կուտ էր տալիս հաւերին, մաքրում էր նրանց բունը, երբեմն յանդիմանում նրանց. ապա օջախի վրայ լափ էր պատրաստում շան համար: Իսկ ծերունին նախ պտտում էր տան շուրջը, յետոյ մտնում էր սենեակները մէկ-մէկ դիտում, տեսնելու հօ մի բան չի՞ պատահել:

Առհասարակ տունը և նրա մէջ եղած իրերը մեծ անհանգստութիւն էին պատճառում ծերերին: Աւելի անհանգստանում էր պառաւը:

— Ա՛յ տօ, մի բան չպատահի տանը,—երբեմն ասում էր նա խորհրդաւոր, կարծես մի բան գուշակելով:

— Ի՞նչ, այ տօ,—հարցնում էր ծերունին թագուն երկիւղով:

— Ո՛վ է իմանում, այ տօ. հարամին շատ,—աւելացնում

էր պառաւը, նոր կասկած գցելով իր ծերունու սիրտը:—Բան չգողանան...

— Ով կը համարձակի,—ասում էր ծերունին աշխատելով հանգստացնել և՛ պառաւին և՛ իրեն, —եթէ մի բան ըլի, Բողարը կիմացնի...

Բողարը ծեր շունն էր. նա իսկապէս զգաստ և աչքաբաց էր. հարկ եղա՛յ դէպքում նա միշտ հնչեցնում էր իր խռպոտ ձայնը անտառի լռութեան մէջ:

— Որ իմացնի, ինչ պիտի անես,—առաջ էր տանում իր խօսքը պառաւը, ակնարկելով ամուսնու ծերութիւնը:

— Ա՛յ,—ասում էր ծերունին աչքերը յառելով պատից կախած հրացանին:

— Յիսուս ու Քրիստոս,—խաչակնքում էր երեսը պառաւը տագնապով,—ինչէր ես ասում, ա՛յ տօ...

Նրանց անհանգստութիւնն աւելանում էր մանաւանդ այն ժամանակ, երբ գիշերը փոթորիկ էր լինում անտառում. Երբ տունը շրջապատող վիթխարի ծառերը խուլ, անվերջ շառաչում էին քամուց և խոր անտառը տրնգում էր խաւարի մէջ, ու դրա հետ միաժամանակ քամին ծղրտում հալածական դևի նման, —ծերերին թւում էր թէ ծառերի արանքում և թէ տան պատերի տակ վխտում են հազար չար, հազար աւաղակ: Անկողնի մէջ, համակ լսողութիւն դարձած, ականջ էին դնում փոթորիկի ձայնին և մինչև լոյս քուն չէր գալիս նրանց աչքին: Նրանց անհանգստութիւնն աճում էր աւելի ձմեռ ժամանակ: Երբ ձիւնն սպիտակ շուրջառ էր քցում ծառերի վրայ, և հաւքերը, նոյնիսկ ագռաւները հեռանում էին նրանց բնակարանի մօտից, ծեր ամուսինները փակւում էին իրենց սենեակում: Պառաւը նստում և բրդէ գուլպայ էր գործում, իսկ ծերունին շուտ-շուտ փայտ էր աւելացնում վառարանի կրակին: Ախորժելի ջերմութիւնը ձմեռ ժամանակ զարթեցնում է հին-հին յիշողութիւններ. և նրանք պատմում էին իրար անցած դէպքեր, մոռացած զրոյցներ, երբեմն պառաւը երանի էր տալիս գիւղում ապրողներին, որ տեղեակ են մնում աշխարքի բանին և շուտ-շուտ ժամ են գնում:

— Ոչինչ, ա՛յ տօ, Զատիկը գայ, ճամբէն բացւի, դու էլ կերթաս,—մխիթարում էր ծերունին այդպիսի դէպքերում:

Բայց յաճախ պառաւին պաշարում էր տխրութիւն և նա դառնում էր ծերունուն.

— Ա՛յ տօ, ի՞նչ պիտի անենք, եթէ յանկարծ էստեղ մի բան պատահի մեզ:

— Ի՞նչ կարող է պատահել, — միամիտ հարցնում էր ծերունին:

— Ո՛վ է իմանում, ա՛յ տօ, յանկարծ հիւանդացանք. ո՞նց պըտի տէրտէր կանչենք ճաշակելու:

— Է՛հ, — խնդում էր ծերունին, — տէրտէրն ինչ ենք անում, ա՛յ տօ. առանց տէրտէրի էլ եօլա կերթանք:

— Ո՞նց թէ... առանց ճաշակելու մեռնել, — զարմանում պառաւը, և փոքր ինչ լռելուց յետոյ աւելացնում.

— Ձէ, ա՛յ տօ. ես առանց ճաշակի չեմ կարող մեռնել... էսօրւանից ասում եմ — հէնց որ ծանր հիւանդանամ՝ տէրտէր կը կանչես:

— Է՛հ, ա՛յ տօ, ինչի ես տխուր բաներ ասում, — նկատում էր ծերունին ակնյայտ դժգոհութեամբ, — ուրախ բաներից խօսի...

Պառաւը լռում էր մի փոքր՝ մտքի ետևից ընկած և կրկին դառնում ծերունուն.

— Ի՞նչ լաւ կը լինէր, ա՛յ տօ, եթէ գեղում ապրէինք:

— Ի հարկէ, — պատասխանում էր ծերունին, — իհարկէ, լաւ կը լինէր. իսկ եթէ մի զաւակ էլ ունենայինք, որ մեզ պահէր...

Եւ նրանք, երկուսը միասին, հառաչում էին այս խօսքերի վրայ, առանց իրար երեսի նայելու:

Հառաչում էին ու լռում...

Երևի այսպէս երկար կը շարունակէր նրանց կեանքը, եթէ չպատահէր մի տխուր դէպք:

* * *

Ծերունին ազատ ժամերին սիրում էր պատել անտառի մէջ: Ամառայ և աշնան օրերին նա երկար տարածութիւններ էր անցնում չոր փայտ ու պտուղներ հաւաքելու: Այդ պիտի դէպքերում ծեր, բրդոտ շունը զառամ քայլերով միշտ հետևում էր իր տիրոջը, իսկ պառաւը շէմքում՝ ձեռը ճակատին, նայում էր նրանց ետևից:

Մի անգամ գարնանը այդպիսի շրջագայութիւնների ժամանակ, ծերունին շան շնորհիւ գտաւ եղնիկի մի փոքրիկ ձագ՝ սուր-սուր ականջներով, որն այնուհետև դարձաւ ծերերի հոգատարութեան ամենասիրելի առարկան։ Սկզբով փոքրիկ կենդանուն նրանք կերակրում էին գիւղից բերած կաթով, ապա երբ նա սկսեց իրեն հաւաքել, նրան ուտեցնում էին թրջած հաց, սառը կերակուր, կանաչ խոտ և ծառի տերեւներ։

Պէտք էր տեսնել, թէ ինչպէս ծերերը խնամքով, փոխէ-փոխ, խոտ էին մօտեցնում փոքրիկ եղնիկի դնչին, ինչպէս էին գուրգուրում նրան և սովորեցնում ման գալու եղանակը։ Պառաւը նրա համար փափուկ խոտերից շինել էր մի անկողին, ուր միշտ հանդարտ մշշոցով հանգստանում էր փոքրիկ կենդանին։ Քնած տեղը նա այնքան անօգնական ու թոյլ էր երևում, որ պառաւը երկիւղով մտածում էր, թէ չլինի մի բան պատահի նրան։

— Ա՛յ տօ, վախենում եմ թէ մի բան պատահի սրան, — երբեմն կասկած էր յայտնում պառաւը, — ի՞նչ ուտացնենք, որ լաւ ըլի։

Ծերունին մի փոքր միտք էր անում և ասում.

— Ի՞նչ-որ իրա մէքն է ուտում՝ խոտ, տերեւ՝, ջուր։

Բայց պառաւը դրանով չէր գոհանում. նա պահանջում էր, որ ծերունին շուտ-շուտ կաթ բերի գիւղից։ Եղնիկի ձագը նրան թւում էր իբրև մի որբ երեխայ, որին պէտք է լուռ ուտեցնել, խնամել, գուրգուրել. և նա շատ ափսոսում էր, որ չի կարող իմանալ փոքրիկ կենդանու սրտի ուղածը։ Յաճախ նա գրկում էր նրան ու հարցնում.

— Ի՞նչ կուզես, բիժօ ջան։

Փոքրիկ անասունը միամիտ, մոլոր հայեացքով նայում էր պառաւին և տրտում խոնարհում թախծոտ աչքերը։ Այդ տեսնելով պառաւը սղմում էր նրան գրկին և համբուրում նրա գլուխը, աչքերը, ականջները։

— Բիժօ ջան, բիժօ ջան։

Կարճ ժամանակում ծերերը, մանաւանդ պառաւը, այնպէս սովորեցին եղնիկի այդ ձագին, որ երբ նա մի ըրպէ չէր երևում, նրանք երկիւղով հարցնում էին իրար.

— Բիժօն ո՞ւր է, ա՛յ տօ։ Զլի թէ...

Ու տազնապով այս ու այն կողմն էին ընկնում նրանք

«բիժօյին» որոնելու: Յաճախ նրան գտնում էին շան մօտ նստած կամ նրա հետ խաղալիս: Ինչպէս որդին կորցրած ծընողը գտնի իր զաւակին, այդպիսի դէպքերում մեծ էր լինում ծերերի ուրախութիւնը. փոխէ-փոխ համբուրում էին նրանք եղնիկին և գրկած տանում էին տուն՝ ժպտալով, հանդիսաւոր, ինչպէս մի կնուէր:

Մի անգամ սակայն, աշնան առաջին օրերին, փոքրիկ եղնիկը անյայտացաւ յանկարծ:

Այդ օրը ծերունին տանը չէր. նա գնացել էր գիւղն ալիւրի: Ուստի պառաւը մենակ դուրս ելաւ որոնելու: Երկար նա փնտրեց եղնիկին տան շուրջը, պատերի տակ, հաւանոցում, շան մօտ, և ոչ մի տեղ չգտաւ:

— Բիժօ, բիժօ, — կանչում էր նա և ինքն իր հետ խօսում. «Տեսնես ի՞նչ եղաւ, տեսնես ո՞ւր գնաց»:

Ինքն իրեն խօսելով, նա մի առ մի նայեց մասրի թփերը, մտաւ մացառների մէջ, կանչեց, որոնեց, բայց եղնիկը չերևաց:

Այդ տեսնելով, նա տան դուռը կողպեց, շանը վերցրեց և մտաւ անտառ: Նրան թւում էր, որ եղնիկը տեսել է իր նման մէկին և հետևել նրան, թէ չէ, մտածում էր նա, ինչ պէտք է պատահած լինէր:

Մի չոր ճղափայտ ձեռին, պառաւը, շունն ետևից, քայլում էր նեղ արահետով և շուտ-շուտ կանչում.

— Բիժօ, բիժօ...

Սակայն նրա ձայնը կորչում էր շառաչող ծառերի աղմուկի մէջ: Բարձրացած խուլ փոթորիկն ալեկոծում էր ծառերը և հողմավարտերենները, ինչպէս դեղնագոյն թիթեռների անհամար խմբեր, պտտւում էին ծառերի արանքում, ասես մի չար ձեռքից հալածւած:

Չնայելով վատ եղանակին, պառաւը շարունակում էր առաջ գնալ և խրախուսել շանը: Անցնելով սայթաքուն սարփ տեղերից, չոր ճղափայտերի կոյտերի վրայից, անելով անսովոր վերելք ու վայրէջք, նա թէև սաստիկ յոգնել էր, բրտինքը թափւում էր քունքերից, բայց և այնպէս չէր դադարում որոնելուց ու կանչելուց: Շունը լեզուն հանած, հոտոտելով վազում էր այս ու այն արահետով և շուտ-շուտ իր տիրու-

հուն նայում, ըստ երևոյթին իմանալու, թէ բաւական չէ արդեօք որքան փնտրեցին:

Երբ նրանք հասան մի փոքրիկ բացատի, շունը յանկարծ կանգ առաւ ինչ-որ ձայնի ունկնդիր: Պառաւը նոյնպէս կանգ առաւ և ականջները սրեց: Մօտ, շատ մօտից լսեց ինչ-որ մնչոց, որ նման էր անասունի ձայնի:

— Բօղար, նա է. բիժօն, — ձշաց պառաւն ուրախացած:

Շունն իսկոյն հասկացաւ տիրուհու միտքը և առաջ վազեց: Պառաւն ուրախութիւնից դողացող քայլերով հետևեց նրան:

— Նա է, նա... Բիժօ, բիժօ...

Նրանք անցան բացատը և նորից մտան ծառերի մէջ, դիմելով ձայնի կողմը: Սակայն այնտեղ, ուսկից լսեց այդ մընչոցը, ոչինչ չերևաց. միայն վերևում, մի ծառի կատարից ինչ-որ մի թռչուն թռաւ թևերը թափահարելով:

Մի քանի րոպէ պառաւը մնած կանգնած՝ խաբւածի պէս շուրջը նայելով: Ապա դարձաւ շանը.

— Չէ, Բօղար, նա չէր. նա չէր... նա չկայ...

Արդէն իրիկնաժամ էր, երբ պառաւը ձեռնունայն ու յուսահատ տուն վերադարձաւ: Փոքրիկ եղնիկը չերևաց ոչ մի տեղ: Տուն դառնալով, նա զգաց մի խոր դատարկութիւն տան մէջ և իր սրտում: Նրան թւում էր, որ մի հարազատ բան պակաս է, և ամեն բան այնպէս չէ, ինչպէս միշտ: Նրան վշտացնում էր ոչ այնքան կորուստը, որքան անօգնական վիճակը փոքրիկ կենդանու: Եւ նա մտածում էր, թէ ինչ պիտի պատահած լինէր նրան. տեսնես գէլ հանդիպեց, թէ մի ուրիշ գազան, իմ խեղճ բիժօ...

Ծերունին գիւղից եկաւ մի փոքրիկ տոպրակ ալիւրով: Տեսնելով պառաւին տխուր, նա անհանգստացաւ:

— Ի՞նչ է պատահել, այ տօ, — հարցրեց:

Պառաւն իր մոլոր հայեացքը յառեց ծերունու դէմքին:

— Բիժօն չկայ, այ տօ... ման եկայ. չկայ...

Ծերունին զարմացաւ: Պառաւը մանրամասն պատմեց նրան եղելութիւնը:

Այդ գիշեր նրանց քունը չտարաւ: Երկար մտածում էին, խօսում, թէ արդեօք ինչ պատահած կը լինի փոքրիկ կենդանուն, արդեօք ո՞ղջ է:

— Ա՛յ տօ, տեսնես սրտեղ կը լինի հիմի, — շուտ-շուտ հարցնում էր պառաւը:

-- Եսիմ, այ տօ, ո՛վ է իմանում:

— Զըլի՛ որսկան մարդիկ բռնեցին:

— Դժւար թէ...

— Ը՛վ գիտի մի գէլ պատահեց, այ տօ:

— Դժւար թէ... Շատ կարելի է մոլորել է մի տեղ:

— Կամ ո՛վ գիտի ո՞րքերն ընկել է պատատուկների մէջ...

-- Էդ էլ կը պատահի, այ տօ, — հաւանութիւն տւեց ծերունին. — առաւօտը կերթամ ման կը գամ:

— Հա՛, այ տօ, հա, գնանք, ես էլ կը գամ... Իմ խեղճ բիժօ... Իմ խեղճ բիժօ...

* * *

Առաւօտեան վաղ ծերերն ելան կորած եղնիկին որոնելու: Ծերութիւնից կքած ուսերով նախ անցան նրանք տան շուրջը, նայեցին բոլոր անկիւնները, փոսերը, խոռոչները, և ոչինչ չգտնելով, տունը փակեցին ու մի-մի փայտ ձեռներին մտան անտառ:

Շունը հետևեց նրանց:

Արևը նոր ծագում էր: Խոտերի և ծառերի վրայ փայլում էր ցօղը, աշնանային այն առատ ցօղը, որ երբեմն յիշեցնում է գիշերը տեղացած անձրև: Հազիւ մի քանի քայլ էին արել նրանք, բայց արդէն նրանց ոտքերն ու փէշերը թրջւել էին շաղից: Նրանք այժմ գնում էին այն կողմը, ուր պառաւը չէր եղել առաջին օրը: Ծառերի կախ ընկած ճիւղերը թաց տերևներով շուտ-շուտ դիպչում էին նրանց գլխին, երեսին, երբեմն էլ ճիւղերին հիւսւած ոստայնը կպչում էր նրանց դէմքին, բայց նրանք այս ամենին անուշադիր՝ առաջ էին գնում չորս կողմն աչք ածելով:

— Ա՛յ տօ, ով գիտի մի տեղ քնել է, — կասկած յայտնեց պառաւը:

— Շատ կարելի է, գիտես, այ տօ, — կանգ առաւ ծերունին, — լաւ կանեմ մի կանչեմ:

Եւ նա մի քանի անգամ իրար վրայ կանչեց Վրիժօ-ին:

Զայն չկար: Անտառի մէջ շարժում չէր լսուում: Միայն ծառերից կաթում էր ցօղը՝ հատ-հատ, ծանր կաթիլներով:

Մի փոքր տեղ գնալուց յետոյ, ծերերը բաժանուցին իրարից առանձին որոնելու: Շունը գնաց պառաւի հետ, իսկ ծերունին մնաց մենակ: Նա գիտէր, որ եղնիկները սովորաբար նստում են ծառերի բների մօտ, ուստի և շուտ-շուտ նայում էր ծառերի բներին: Իսկ պառաւը հետևում էր միայն շան գնացած ուղղութիւններին:

Տօղը շարունակում էր կաթել անտառում, ինչպէս խախուտ տանիք ունեցող բնակարանը անձրևի ժամանակ:

Առանձին-առանձին երկար որոնում էին նրանք և շուտ-շուտ կանչում իրար ծառերի խորքից.

— Ա՛յ տօ, հէ՛յ... գտա՛ր...

— Չէ, ա՛յ տօ, չէ... Դու գտա՛ր:

— Չէ... չէ...

Եւ արձագանքը, կարծես նրանց ծաղրելու համար, կըրկնում էր. «Չէ, չէ...»:

Երկար ու ապարդիւն որոնելուց յետոյ, նրանք վերջապէս նորից գտան իրար և վերադարձան տուն: Պառաւը չէր ուզում դատարկ ձեռքով տուն դառնալ և կամենում էր շարունակել որոնումը. բայց ծերունին համոզեց նրան, որ դա զուր է: Այժմ պառաւի ուսերն աւելի էին կքել, քրտինքը ծածկել էր նրա դէմքը, և նա դժլարանում էր խօսել: Ծերունին նոյնպէս լուռ էր:

— Ես ախր երազը տեսայ, ա՛յ տօ... Տեսայ, որ էսպէս բան պըտի պատահի, —ասաց պառաւը խորհրդաւոր, հազիւ-հազ շնչելով. — Հիմի դու ինձանից վախեցիր, ա՛յ տօ, —աւելացրեց նա աւելի խորհրդաւոր:

— Ինչէր ես ասում, ա՛յ տօ...

— Է՛հ, — հառաչեց պառաւը և լռեց:

Երբէք նա այնքան յուզւած չէր եղել, որքան այդ երկու օրը, մանաւանդ այդ բոպէին... Փոքրիկ եղնիկի անհետացումը վրդովել էր նրա հանգիստը և նա մի վայրկեան չէր կարողանում մոռանալ նրան:

Հետևեալ ամբողջ օրը պառաւն անցրեց տխուր: Մի օրւայ մէջ նա կարծես նիհարեց, իսկ երկրորդ օրը մնաց անկողնում պառկած: Նա թեթեւ հազում էր:

— Ի՞նչդ է ցաւում, ա՛յ տօ, — ասում էր ծերունին նայելով պառաւի պղտոր աչքերին, — դու բիժօյի համար իսկի մի

մտածի. եկող տարի մի ուրիշը կը գտնեմ... Փառք Աստծու,
մեր մէջրում նրանցից շատ կան...

Պատասխանի փոխարէն պառաւը խզզացնում էր միայն
և թաց աչքերով նայում ամուսնուն: Միւս օրը նա ծերու-
նուն կանչեց իր մօտ և ասաց.

— Ա՛յ տօ, լաւ կը լինէր, որ ես ճաշակէի:

Ծերունին լուռ նրան նայեց:

— Տխուր բաներ մի խօսա, այ տօ,— ասաց նա:

— Չէ, այ տօ. չէ... Տեսնում եմ որ՝ չէ...

— Պառաւի աչքերում փայլեցին արցունքներ:

Քիչ լռելուց յետոյ, նա շարունակեց.

— Դու քեզ լաւ կը պահես, այ տօ... Շորերդ չթողնես
կեղտոտ, շանը սոված չպահես, խեղճ կենդանի է... Հաւերին
էլ լաւ մտիկ արա...

Ծերունին ջանում էր արցունքները զսպել:

— Ինչի ես տխուր բաներ ասում, այ տօ:

— Չէ, այ տօ,— շարունակեց պառաւը,— լաւ կը լի, որ
ես ճաշակեմ: Բայց ամենից լաւ կը լինէր, այ տօ, եթէ մի
անգամ էլ ժամ գնայի, խորանը համբուրէի... էլ բան հար-
կաւոր չէր: Կամ թէ չէ մին էլ տեսնէի իմ հէրանց տունը...

— Դեռ կը տեսնես, այ տօ, կը տեսնես,— յոյս տւեց
ծերունին,— օրերը չհատան: Եթէ կուզես մի շաբաթից յետոյ
կերթանք:

Պատասխանի փոխարէն պառաւի բերանից թռաւ մի խոր
հառաչանք: Նա լռեց:

Ծերունին կռացաւ դէպի նա:

— Ա՛յ տօ, ի՛նչ եղաւ քեզ, այ տօ,— կանչեց ծերունին,
— այ տօ, կուզես գնամ տէրտէր կանչեմ:

Պառաւը չէր պատասխանում:

Նա արդէն մեռել էր:

Յաջորդ օրը ծերունին իջաւ գիւղ և մի սայլ տարաւ
սպիտակ տուն՝ պառաւի մարմինը փոխադրելու: Թաղեցին
նրան գիւղի գերեզմանատան ծայրում: Թաղումից առաջ ծե-
րունին խնդրեց տէրտէրին, որ պառաւին ճաշակի: Քահանան
կատարեց նրա խնդիրը, և ծերունին շատ գոհ մնաց, որ ան-
կատար չթողեց իր պառաւի փափագը:

Այժմ սպիտակ տան մէջ ծերունին ապրում է մենակ՝ իր շան հետ միասին: Շուտ-շուտ նա իջնում է գիւղ և այցելում պառակի գերեզմանը: Առաջւայ պէս նա դարձեալ հսկում է իրեն պահպանութեանը յանձնւած տանը և նրա մէջ եղած իրերին, սպասելով կրկին, որ տէրերը կը գան մի օր և հանքը նորից կըսկսի գործել: Յաճախ նստում է նա իր կացարանի շէմքին և, հայեացքը հեռուն նետած, յիշում է իր պառակին ու ինչ որ լուռ դնդնում ինքն իրեն: Երբեմն էլ, — այս լինում է առանձնապէս երեկոները, — երբ մութն իջնում է անտառի վրայ, նա դառնում է ոտքերի մօտ պառկած շանը և խօսում նրա հետ.

— Էդպէս, Բօղար, այ տօն էլ չկայ, — ասում է նա մեղմ, մտերիմ ձայնով, — նա մեզ մենակ թողեց ու գնաց: Նա էլ չի գայ, Բօղար, էլ չի գայ: Անխիղճ այ տօ, խեղճ այ տօ:

Շունը դունչը թաթերի վրայ դրած, լուռ նայում է տիրոջ դէմքին ու աչքերը խոնարհում: Նա հասկանում է, որ խօսքն այն պառակի մասին է, որն իր համար լափ էր պատրաստում, և որը հիմա ուր-որ գնացել է:

Տեսնելով շան կարեկից լռութիւնը, ծերունին ոգևորւում է աւելի և շարունակում իր զրոյցը:

Մինչ այդ մութն աւելի ու աւելի թանձրանում է անտառում, և նրանք երկաթ-երկար մնում են միևնոյն տեղը նստած...

ՍՏ. ԶԹԵԱՆ

ԿԱՅԱՐԱՆԻ ՄՕՏ

Տխրում եմ վհատ, արտասւում առատ՝
Այս ցուրտ, ձիւնամած դաշտերի դիմաց,
Յիշում եմ մէկի դէմքը անարատ,
Սիրում եմ մէկի ուղին ամպամած...
Գնացքը, թովիչ, թողել է թախիժ
Երկաթագծի սառնութեան վրայ.
Դաշտերում սառոյց, անձրև ու կսկիժ,
— Ա՛խ, ես ինչպէս տամ անուշդ հիմա...

Ն. Աֆրիկեան

Ս Օ Ս Ի Ն

Պատուհանիս տակ սօսին երկնամբարձ,
Մեղմիկ սոսափում, երգում է կամաց:
Ես այդ երգի մէջ ըս երգն եմ լսում,
Միշտ նա է հնչում իմ ախուր սրտում:
Ուզում եմ յանկարծ, յանկարծ գրկել ըեզ,
Բայց դու հեռու ես, հեռու ու անտես:
Յուզում է հոգիս, յուզում ու լալիս,
Շուրթերս դողդոջ՝ անունդ են տալիս:
Նայում եմ երկար, նայում ըս ճամբին,
Դու չես երևում, դու չկաս կրկին:
Թափում են անվերջ, թափում շիթ առ շիթ,
Գիշեր աչերէս արցունքներս վճիտ:
Եւ սօսին, սօսին, սօսին երկնամբարձ,
Պատուհանիս տակ երգում է կամաց:
Ո՞վ գիտէ, գուցէ իր ցուն է երգում.
Ես չեմ հասկանում... ըս երգն եմ լսում:
Վարսենիկ Աղասեան

Բ՛նուորէն, վայրիօրէն, անվերջօրէն՝ սիրել կուզեմ ես.
Փաթթւիլ ծունգերուդ դողդոջուն ձեռներով,
Բարախուն կուրծքով զգալ նայւածքը աչքերուդ,
Զգալ անհանգիստ շունչդ լուծի խորութեան մէջ...
Ու յետոյ՝
Անսանձօրէն, խենթօրէն գրկել ըեզ,
Թաղել գլուխդ կուրծքիս վրայ...
Մազերդ, այտերդ, շուրթերդ համբուրել, համբուրել...
Ու նորէն ծնրադրել, յոգնած, դժգունած պատկերիդ առաջ...
Նորէն գրկել ծունգերդ...
Եւ արտասուել ու սիրել, փայփայել ու հեկեկալ,
Բ՛նուորէն, վայրիօրէն, անվերջօրէն...

Ռաֆայէլ Զարդարեան

ԵՐԿԻՐՆ ԿՈՎԿԱՍ

(Ռուս ժանգարմի նամակներից)

Վլադիկավկազ, ապրիլ ամսի 16, 1910 թվին:

Իմ սիրելի և թանգագին եղբայր Պետր Օնուֆրիչ! Ես արդէն հասայ Կովկաս և այժմ գտնուում եմ Վլադիկավկազ քաղաքում: Քաղաքի միջով մի գետ է անցնում, որ կոչւում է Տերեկ: Շատ աղմկալի գետ է, ինձ դուր եկաւ քաղաքը:

Սիրելի եղբայր Պետր Օնուֆրիչ! Ես Կովկասում կը գործեմ եռանդով և մեծ անձնւիրութեամբ: Իւրաքանչիւր մարդ, որ ունի խելք ու խղճմտանք, պարտաւոր է իր անձը նւիրել մեր պաշտելի Ինքնակալ և Ամենաողորմած Կայսր Նիկոլայ II Ալէքսանդրովիչին: Եթէ Աստուած տայ՝ Ազրաֆէնան տղայ ծնի (երեք ամսից յետոյ, Ազրաֆէնայի իրա ասելով ծնելու ժամանակն է) — անունը կը դնեմ Նիկոլայ: Իսկ եթէ աղջիկ լինի՝ այն ժամանակ մեր պաշտելի Թագուհի Կայսրուհի Ալէքսանդրա Ֆեոդորովնայի անունով կը կոչեմ՝ Ալէքսանդրա:

Սիրելի և թանգագին եղբայր Պետր Օնուֆրիչ, դու, անշուշտ, շատ կը հետաքրքրուես իմ վիճակով. և ես պէտք է անկեղծ կերպով յայտնեմ քեզ, որ գոհ եմ իմ վիճակից: Ես առաջ եմ գնում պաշտօնիս մէջ և իմ մեծաւորները արդէն ուշադրութիւն են դարձնում ինձ վրայ. որովհետև ես մեծ հեռատեսութիւն եմ ցոյց տւել՝ յեղափոխականներին և տերրորիստներին բռնելու համար: Բայց ես, իհարկէ, չեմ ուզում գովել ինձ, հարկաւոր է համեստ լինել: Ո՛չ ոք այնքան հաւատարիմ չի ծառայի Ցարին և Հայրենիքին, որքան որ ես հաւատարիմ կը ծառայեմ:

Սիրելի և թանգագին եղբայր Պետր Օնուֆրիչ Ձեմ հասկանում, Աստուած վկայ, ինչո՞ւ յեղափոխականները և տերրորիստները հակառակ են մեր պաշտելի Ցարին: Ձէ՛ որ նա իսկական Ցար է, համայն Ռուսաստանի Ինքնակալ և Թագա-

ւոր Կայսր Նիկոլայ II Ալեքսանդրովիչ: Դէ իհարկէ, աւագակների համար ինչ ծար, ինչ օրէնք... Բոլոր յեղափոխականներին ու տերրորիստներին պէտք է կախենք կամ թէ Սիրիւր աքսորենք — թո՛ղ կորչեն՝ սատկոտեն այնտեղ ցրտից և քաղցից: Եթէ ես լինէի ներքին գործոց մինիստր՝ այն ժամանակ բոլոր ջհուղներին կը բռնէի մեր երկրից. իսկ հայերին կասէի. «ԱՅՈՒՆ! Թէ չէ աչքներդ կը հանեմ: Քրիստոնեայ էք՝ ձեզ հանգիստ պահէք, լաւ պահէք, ինչպէս որ վայել է Քրիստոսի հետևորդներին»:

Սիրելի եղբայր Պետր Օնուֆրիչ, մեր վախճմաստրի ազգանունը Գէօրգի Գարէնկօ է: Այս Գէօրգի Գարէնկօն երեք տարի է ինչ այստեղ ժանդարմութիւն է անում և կարողացել է ահագին հարստութիւն դիզել... Ի հարկէ, ինչ կայ որ: Մարդ որքան շատ հարստանայ՝ այնքան աւելի է սիրում թագաւորին և Հայրենիքը:

|| Սիրելի եղբայր, աշխարհիս երեսին երկու տեսակ մարդկութիւն կայ. առաջին տեսակը՝ ազնիւ մարդկութիւն, երկրորդ տեսակը՝ հասարակ մարդկութիւն: Ազնիւ մարդկութիւնը իսկական ազնիւ մարդկանց մարդկութիւն է. օրինակ՝ ներքին գործոց մինիստրը, պալատի մինիստրը, ֆինանսների մինիստրը, պոլիցիայի դեպարտամենտի գլխաւորը, ժանդարմների կորպուսի շէֆը, թագաւոր Կայսրի բոլոր ազիւտանտները, թագուհի Կայսրուհու բոլոր ֆրէյլինաները, ռուսական զօրքի գններալները, մասամբ պոլկովնիկները (որովհետև սրանք գնեւորալ են դառնալու). պոզպոլկովնիկն էլ հետը, կապիտանն էլ հետը, շտաբս-կապիտանն էլ հետը և այլն: Միտրոպոլիտները և բոլոր եպիսկոպոսները և այլն և այլն և այլն: Կայսրանների գլխաւորները (բայց ոչ նրանց օգնականները) և այլն, և այլն: Սենատորները և կարևոր անձինք և այլն և այլն և այլն: Ես բանաստեղծօրէն կը նմանեցնեմ մի պարտէզի. այսինքն՝ թագաւոր Կայսրը մի մեծ ծառ է՝ պարտիզի կենտրոնում և ամեն կողմ ճիւղեր է արձակում: Ծիւղերը՝ Օգոստափառ Զաւակներն են. ծառի շուրջը՝ աւելի փոքր ծառեր կան. դրանք՝ մեր բոլոր նշանաւոր մարդիկն են: Յետոյ ուրիշ ծառեր են շարւած, այսինքն էլի ուրիշ մարդիկ՝ նոյնպէս նշանաւոր, բայց մի քիչ պակաս նշանաւոր: Յետոյ էլի ուրիշ մարդիկ, էլի ուրիշ մարդիկ... Վերջը շորս կողմից շրթայ են կազմած

մեր բոլոր ժանդարմները: Մենք պատնէշ ենք և պահապան:

Մեր նոր պոլկովնիկը երէկ ճառ կարդաց մեզ համար և ասաց. «Ժանդարմներ, այո, դուք պատնէշ էք և պահապան: Դուք էք այն հաստատուն վէժ քարը, որի վրայ կառուցւած է կայսերական Սրբազան Գահը: Ամբողջ Ռուսաստանը ձեզ է մտիկ տալիս. երբէք չվախենաք մեր թշնամիներից, այլ կըռլեցէք և յաղթեցէք, հող ու մոխիր արէք մեր բոլոր հակառակորդներին այնպէս, որ նրանք թաւալեն ցեխի ու փոշու մէջ՝ մեր ոտքերի տակ»:

Սիրելի և թանգագին եղբայր Պետր Օնուֆրիչ, ինչ որ մեր նոր պոլկովնիկը ասաց՝ ես արդէն առաջուց գիտէի բոլորը: Եւ երբ նա կարդում էր ճառը՝ ես շարունակ ասում էի մտքիս մէջ թէ՛ «Իհարկէ ճիշտ է. ես էլ գիտեմ, որ ճիշտ է»: Բայց մեր պոլկովնիկը կարծում է թէ մենակ ինքը ճառ կարդալու շնորհք ունի: Ի դուր է այդպէս կարծում... Վասիլիչն անցեալ օր ասում էր, որ իրենց ռոտմիստրը հազիւ-հազ կարողանում է խօսելիս՝ բառերը կապել միմեանց: Մինչդեռ դու շատ լաւ ես իմանում, սիրելի եղբայր, որ ես կատարեալ շնորհք ունեմ: Ես, սիրելի եղբայր, ամեն աշխատանք կը թափեմ, գիշերները չեմ քնի, շան պէս պէտք է չարչարւեմ, որպէսզի ես էլ դառնամ ռոտմիստր: Դու, սիրելի եղբայր, շուտով ուղարկիր ինձ վկայական, որ ես սովորել եմ քաղաքային դպրոցում: Գնա՛ և պահանջիր, որ վկայականը անպատճառ տան: Վկայականի կողքին պէտք է աւելացնեն, որ ես հեռացել եմ դպրոցից իմ յօժար կամքով, որովհետև որոշել էի մտնել գիմնազիա ու համալսարան:

Սիրելի եղբայր Պետր Օնուֆրիչ! Ազրաֆէնան քեզ շատ բարև է ուղարկում և համբուրում սիրով: Երկուսս էլ առողջ ենք: Միայն ինձ համար անախորժ է, որ կինս այսքան երկար ժամանակ յղի է մնում: Այսուհետև ես քեզ մանրամասն կը գրեմ միշտ կովկասի մասին: Շատ լաւ երկիր է — չճրս կողմդ սարեր: Սարերի վրայ ամառ-ձմեռ շարունակ ձիւն է լինում:

Այս նամակը կարգա Օնիպկոյի և Արկադի Սաևելիչ Վորոնուլի առաջ: Նրանք էլ թող իմանան, թէ որքան մեծ եռանդով եմ գործում կովկասի մէջ: Եւ առհասարակ դու այդտեղ աշխատիր, որ իմ անունը հասնի մինչև պոլիցիայի դեպար-

տամենտի շէֆի ականջը: Քեզ համար էլ պարծանք կը լինի,
երբ ես նշանաւոր մարդ դառնամ:

Քո կրտսեր եղբայր՝ Վլադիկաւկազի կայարանի ժանդարմական
բրիգադի ժանդարմ Ծօմա Օնուֆրիշ Պիրաժկով:

1910 թի սպրիլի 21. քաղաք Վլադիկաւկազ:

Սիրելի և թանգագին եղբայր! Գիշերս վեց յեղափոխա-
կան բռնեցինք մի տան մէջ. մէկը ուսանող է, միւսն էլ ու-
սուցիչ: Ես իսկոյն հասկացայ որ նրանք կատարեալ տերրո-
րիստներ են. աչքս հիմա փորձել է բոլորովին և ես ամեն
ինչ իմանում եմ:

Նրանց մէջը մէկը կար, որ լրագիրներ է ծախում կայա-
րանում: Իմ բարկութիւնս եկաւ ու յետոյ ծիծաղելով ասի
մտքիս մէջ. «Լաւ վզակոթ ունի սա, ձեռքս չփորձեմ...» — և
այնպէս հասցրի վզակոթին, որ բթամատս ցաւեց: Լրագրա-
վաճառը, ի հարկէ ձայն չհանեց. կարո՞ղ է համարձակել որ:
Բայց ուսանողը մէջ ընկաւ՝ «իրաւունք չունէք խփելու» աս-
աց. ես մի լաւ հայհոյեցի նրան ու ասի. «Շուտով դու էլ
կիմանաս իմ բռունցքի նշանակութիւնը...», հա-հա. հա...

Վասիլիչն էլ շատ ծիծաղեց: Դէ, իհարկէ որ շատ ծիծա-
ղելու բան էր. ախր նրանք տերրորիստներ լինեն և մենք ի-
րաւունք չունենանք նրանց ծեծելու: Ամերիկայում այդպիսի
բան չկայ. օրէնքները ես լաւ գիտեմ: Տերրորիստներին և յե-
ղափոխականներին կախաղան ենք հանում, չէ՞. ուրեմն նրանց
հարկաւոր է ծեծել, որպէսզի մինչև Սիրիը ուղարկեն՝ բա-
ւական խրատւած լինեն: Եւ մի՞թէ վատ բան է ծեծը: Դու
յիշում ես. սիրելի եղբայր, որ մեր հանգուցեալ հայրը ամեն
օր թակում էր մեզ, որպէսզի յայտնի մարդ դառնանք:

Սիրելի եղբայր, մեր կայարանի մօտ մի հարուստ ձկնա-
վաճառ կայ՝ լաւ խանութ ունի և խանութում ամեն օր թարմ
սուղակ ու ասէտրինա է լինում: Ես մտածեցի, թէ հարկաւոր
է նրա հետ բարեկամանալ, որպէսզի տօն օրերին թարմ սու-
ղակ և ասէտրինա գնեմ նրա խանութից: Բայց ձկնավաճառը
վերին աստիճանի կոպիտ, անկիրթ մարդ դուրս եկաւ, այ-
սինքն չուզեց ինձ վրայ ուշադրութիւն դարձնել, որովհետև,
կարծում էր, երևի, թէ ես կաշառք եմ կամենում վերցնել...

Յիմար անձնաւորութիւն է, և ես երկու օր առաջ խիստ ընդհարւեցի հետը: Դէպքը այսպէս պատահեց, սիրելի եղբայր:

Խանութի մօտով անցնում էի: Աչքերս շորս կողմ ածելիս՝ տեսայ, որ խանութի առաջին, մայթի վրայ, կեղտոտ ջուր է թափւած: Իսկոյն ձայն տւի ծառայողին և կտրուկ պահանջեցի.

— Դուք պարտաւոր էք մաքրութիւն պահպանել:

Ինքը ձկնավաճառը կոպիտ-կոպիտ դուրս եկաւ, ձեռքերը դրեց քամակին ու անխօս նայեց վրաս.

— Դ՞ու ես, — հարցրի, — այս խանութի տէրը — որպէս թէ չգիտէի, որ նա է հէնց տէրը:

Նա պատասխան չտւեց, այլ շարունակեց նայել աչքերիս, կարծես ապուշ լինէր:

— Դ՞ու ես... — նորից հարցնել ուզեցի. բայց խօսքս փոխեցի և միայն ասի. «Բարի եղէք, պարոն, կարգադրէք, որ...» և այլն՝ ձկնավաճառը ինքնըստինքեան հասկացաւ իմ հրամանը և ես աւելորդ համարելով այլևս խօսել՝ շարունակեցի իմ ճանապարհը:

Այսուհետև ցոյց կը տամ այդ մուժիկ ձկնավաճառին, թէ ինչ է նշանակում այդպէս արհամարհանքով, վերաբերւել ուս ժանդարմի հարցերին: Անպիտան վրացիք ու հայերը բոլորն էլ այդպէս են պահում իրենց: Շատ բարի: Ես ուշի-ուշով կը հետևեմ ձկնավաճառին, որովհետև նա անկասկած, յեղափոխականների հետ բարեկամութիւն է անում: Մի՞թէ ձկնավաճառները հակառակ չեն լինում մեր կառավարութեանը... Իմ կարծիքով, սիրելի եղբայր, երբ աղքատ մարդն է յեղափոխական լինում՝ ուրիշ բան է. բայց երբ հարուստ մարդն է յեղափոխութիւն կատարում և դու նրան բռնում ես — սա արդէն բոլորովին ուրիշ բան է: Այնպէս չէ, սիրելի եղբայր. հարուստը միշտ էլ հարուստ է, այսինքն նա միշտ փող կունենայ. և հարուստ յեղափոխականը կաշխատի փող «ծախսել», որպէսզի ազատւի՝ եթէ որ մենք նրան բռնելու լինենք... Մեր վախճանատր Գէօրգի Գարէնկօն, Վասիլիչի ասելով, տասը հազար ռուբլի ունի բանկում պահած: Բայց ես կարծում եմ, որ ոչ թէ տասը, այլ քսանուհինգ հազար կունենայ, որովհետև Գէօրգի Գարէնկօն վերին աստիճանի խորամանկ և անամօթ անձնաւորութիւն է:

Սիրելի ու թանգագին եղբայր Պետր Օնուֆրիշ! Ես էլ շարունակ պէտք է խորամանկ լինեմ: Որքան, օրինակ, շատ բարեկամանամ յեղափոխականների հետ՝ ես այնքան աւելի հեշտ կերպով նրանց բոլոր գաղտնիքները կիմանամ: Հարկաւոր է մէկ-մէկ այնպէս ձևանալ, իբր թէ ինքս էլ տերրորիստ եմ: Տերրորիստները վերին աստիճանի նենգամիտ մարդիկ են, նրանք ամեն ինչ ծածուկ են անում, որպէսզի մենք դժւար գտնենք նրանց տեղը: Բայց ես նրանցից աւելի խորամանկ կը լինեմ ու ամենքին կը խաբեմ: «Ես ձեզ սիրում եմ, կասեմ, դուք հիանալի մարդիկ էք, կասեմ, եթէ ուզում էք՝ գնանք, կասեմ, մինիստրներին — որ մինիստրին էլ կամենաք — սպանենք, կասեմ: Համեցէք, ես պարտաւոր եմ կասեմ, ահա և իմ ձեռքը»: Հա՛ հա՛ հա՛-հա՛:

Գիտե՞ս ինչ, սիրելի եղբայր, երեք օր առաջ ես կայարանից Վասիլիշի մօտ գնալիս նկատեցի, որ մի մարդ աֆիշա էր կարդում, կզակը վեր տնկած: աֆիշան կարմիր էր և ես անմիջապէս գլխի ընկայ թէ բանն ինչու՞ն է: Մօտեցայ ու կանգնեցի կողքին, իբրև թէ ես էլ եմ աֆիշով հետաքրքրւում: Արմունկովս թեթև զարկեցի նրա թևին և իսկոյն ներողութիւն խնդրեցի:

— Ոչինչ, ոչինչ, — ասաց նա ու շարունակեց կարդալ: Ես աչքի տակով գննեցի նրան ոտից մինչև գլուխ ու մտքիս մէջ ասի՝ «Ե՛կ, հիմա էլ ոտքը կոխեմ ու նորից ներողութիւն խնդրեմ, տեսնեմ ինչ կասի»:

— Ներեցէք խնդրեմ, ձեր ոտքը չցաւե՞ց արդեօք, ներեցէք խնդրեմ, — և այդ ասելով՝ ես իսկոյն բարևի բռնեցի ձեռքս, ինչպէս որ վայել է կրթւած ուսու զինւորականին:

— Ոչինչ, ոչինչ, — ասաց նա կրկին, ու երկիւղով մտիկ տւեց երեսիս և մի քայլ հեռացաւ ինձանից: Իսկ ես ժպտացի ու աւելի մանրամասն դիտեցի նրա հագուստը:

Երբ Վասիլիշին պատմեցի՝ նա շատ զւարճացաւ: Իհարկէ, սիրելի եղբայր, փոքր նշաններով կարելի է խոշոր տերրորիստական դաւադրութիւնների հետքը գտնել ու երևան հանել: Ինչո՞ւ այն մարդը յատկապէս կարմիր աֆիշա էր կարդում: Ձէ՞ որ ուրիշ գոյնի աֆիշաներ՝ սպիտակ, կանաչ, կապոյտ, դեղին և այլն նոյնպէս շատ կային:

Սիրելի եղբայր, մեր Վասիլիշը շատ լաւ մարդ է, Աստ-

լած վկայ: Նա միշտ ինձ հետ է լինում և ամեն օր միասին լրագիր ենք կարդում, այսինքն նա կարդում է բարձր ձայնով, իսկ ես ականջ եմ դնում: Եւ յետոյ վիճում ենք իրար հետ, այսինքն Վասիլիչն է ինձ հետ վիճում, որովհետև ես նրանից խելօք եմ, չնայած որ Վասիլիչը աւագ ունտէր-օֆիցէր է վաղուց:

Ահա այսպէս, սիրելի եղբայր, ես օր ու գիշեր աշխատում եմ և յոյս ունեմ շատ առաջ գնալ: Մեր ոտամիտարը առանձին ուշադրութիւն է դարձնում ինձ վրայ և ամենագաղտնի գործերը ինձ է միայն վստահանում, որովհետև ես չեղած տեղից էլ բան եմ ստեղծում:

Այս նամակը կարդալու տուր նաև Սիդոր Պրօկօֆիչին և Սերգէյ Միտրօֆանիչին: Նրանց իմ կողմից շատ բարեկներ յայտնիր: Սիդոր Պրօկօֆիչին ասա՛ թող աշխատի փոխադրել Կովկաս, շատ հիանալի երկիր է, Աստուած վկայ. այստեղ ուստի ժանդարմներից սարսափելի վախենում են ամենքը, մանաւանդ հայերն ու վրացիք, որովհետև նրանք մեր թշնամիներն են. բայց վախենում են:

Քո կրտսեր եղբայր՝ Վլադիկաւկազի կայարանի ժանդարմական բրիգադայի ժանդարմ Ֆօմա Օնուֆրիչ Պիրաժկով:

Ըստիւք Թիֆլիս, 1910 թւի մայիս 12:

Իմ սիրելի եղբայր Պետր Օնուֆրիչ! Քեզ նամակ եմ գրում Կովկասի մայրաքաղաքից, որ կոչւում է Թիֆլիս: Հիանալի քաղաք է: Քաղաքի միջով հոսում է Կուր գետը, որ սկիզբն է առնում Կազբէկ սարից, և թափւում է Սև Մովի մէջ: Տասն օր է ինչ ինձ տեղափոխել են Թիֆլիս և ես արդէն բաւական բան եմ տեսել: Այստեղ կայ Նորին Կայսերական Մեծութեան Կովկասի Փոխարքայի պալատը, որ վերին աստիճանի գեղեցիկ շինութիւն է: Յետոյ կայ մի մեծ եկեղեցի, որ կոչւում է Չինւորական Տաճար: Տաճարի բակում մայիսի 6-ին հանդիսաւոր պարագ կատարեցինք, որովհետև այդ օրը, ինչպէս քեզ յայտնի է, Նորին Կայսերական Մեծութիւն թագաւոր Կայսր Նիկոլայ IX Ալէքսանդրովիչի Ծննդեան օրն էր:

Սիրելի եղբայր, Թիֆլիսում ես ինձ պէտք է բարձր պահեմ՝ աւելի լուրջ, աւելի խելացի, որովհետև Թիֆլիսը մայրաքաղաք է համարւում: Այստեղ ապրում են վրացիք, հայեր

ըը և թուրքերը՝ Վրացիք՝ грузо-голопятый! հայերը՝ армяшка-соленный! թուրքերը՝ татарская башка!

Ես չեմ սիրում ոչ վրացիներին, ոչ հայերին, ոչ թուրքերին, որովհետև նրանք այլազգիներ են և ոչ թէ ուսմանը: Մեր ազգը՝ տէր-ազգ է, իսկ հայերը, վրացիք և թուրքերը՝ ծառայ ազգեր: Ինչպէս որ կան ամեն տեղ հարուստ, լաւ մարդիկ և քոսոտ, անպէտք մարդիկ, — այնպէս էլ կան ամեն տեղ հարուստ լաւ ազգեր և անպէտք, յիմար ազգեր: Հայերի մասին տեղեկութիւններ կուղարկեմ քեզ, սիրելի եղբայր, որովհետև նրանք վերին աստիճանի վտանգաւոր ազգ են և մեզ կարգադրւած է յատկապէս հայ յեղափոխականներին հետևել: Հայերը ուզում են, որ մի հայ յեղափոխական թագաւոր լինի Կովկասում: Հայերը ուզում են ուսմանը իսկ Ռոստովի երկաթուղագիծը և մեզ վրայ իշխել: Իրենց շար նպատակին հասնելու համար՝ հայերը սպանում են մեր նահանգապետներին և գաւառապետներին:

Զգւելի, գարշելի, անպիտան, վնասակար մարդիկ են հայերը: Զարմանում եմ՝ ինչո՞ւ Աստուած ստեղծել է նրանց: Ես գոնէ չէի ստեղծի, եթէ որ ինձ ստեղծելու հրաման տային: Հայերին հարկաւոր է ուղարկել Սոդոմ-Գոմոր ու յետոյ երկնքից կրակ թափել գլխներին և կործանել: Բայց, սիրելի եղբայր, հայերը շատ հարուստ են: Ես լսեցի, որ մի վերին աստիճանի հարուստ հայ կայ թիֆլիսում, հարիւր միլիոն ունի, ազգանունը՝ Մանթաշև: Այս Մանթաշևը հարիւր միլիոն է հաւաքել նրա համար, որ բոլորը տայ հայոց յեղափոխական կոմիտէին:

Հայերն այստեղ երեք մեծ բան ունեն՝ կաթողիկոս, Մանթաշև, յեղափոխական կոմիտէ: Կաթողիկոսը մեր միտրոպոլիտի նման բարձր հոգևորական է. և Վասիլիչն ասում է, որ մեր թագաւոր Կայսրը կաթողիկոսին մի թանգագին ադամանդեայ խաչ է ընծայ տւել, որովհետև կաթողիկոսը սուրբ մարդ է: Եթէ ես երբևիցէ տեսնեմ կաթողիկոսին՝ ձեռքը պէտք է համբուրեմ և նրա օրհնութիւնը խնդրեմ: Սուրբ մարդիկ չեն կարող տերրորիստ լինել, որովհետև սուրբ են: Իսկ հայերի միւս բանը՝ Մանթաշևը՝ սուրբ մարդ չի, ուրեմն նա յեղափոխական է, որովհետև հայ է: Ես անպատճառ պէտք է ծանօթանամ նրա հետ — որոշ ծրագիրներ ունեմ: Համարձակու-

Թիւնը հերոսների ամենագեղեցիկ զարդն է, Զուր չէր հօ հապա, որ ինձ ու Վասիլիչին փոխադրեցին Թիֆլիս: Ներքին գործոց մինիստրը Թիֆլիս է ուղարկում ամենաընտիր և ամենահնարագէտ ժանդարմներ և գաղտնի ոստիկաններ:

Սիրելի եղբայր Պետր Օնուֆրիչ! Ազատ ժամանակ դըժբախտաբար քիչ եմ ունենում. ապա թէ ոչ ես ուրիշ՝ աւելի կարևոր ու հետաքրքրական բաներ կը գրէի հայերի մասին: Քեզ համբուրում ենք ջերմագին՝ ես և Ագրաֆէնան:

Քո կրտսեր եղբայր՝ Ֆոմա Օնուֆրիչ Պիրաժկով:

26 մայիսի 1910 թի, Թիֆլիս քաղաք:

Իմ սիրելի և խիստ թանգագին եղբայր! Մենք այստեղ անթիւ անհամար խուզարկութիւններ ենք կատարում, որովհետև հայոց յեղափոխական կոմիտէն վճռել է ապստամբութիւն առաջ բերել—մենք այդ հաստատ գիտենք:

Հարիւր հազար վինտովկա և մաուզէր ունեն հայ յեղափոխականները, որոնք այստեղ կոչւում են «դաշնացականներ»: Նրանք կապ ունեն մեր արտաքին թշնամիների հետ՝ Ռուսաստանը կործանելու նպատակով:

Եօթանասուն տերրորիստ զանազան կողմերից գաղտնի կերպով Թիֆլիս են եկել՝ որ ռումբեր պատրաստեն և մեզ ամենքիս տերրորի ենթարկեն:

Ես հիմա ինձ շատ խելացի և զգոյշ եմ պահում՝ փողոցով անցնելիս միշտ գիտում եմ չորս կողմս, որովհետև ինձ առանձնապէս շատ տերրորիստներ են հետևում: Նրանք իմացել են, որ ես սովորական, հասարակ ժանդարմ չեմ:

Հայոց յեղափոխական կոմիտէն երբ որ սովորական հասարակ ժանդարմ է ուզում սպանել՝ այսպէս է կարգադրում. «Դու, տերրորիստ կարապետ, դու գնա և ռումբ ձգիր այս ինչ հասարակ ժանդարմի վրայ: Երկու-երեք հասարակ ժանդարմ միասին սպանիր»:

Իսկ երբ ժանդարմը կարևոր անձնաւորութիւն է լինում, ինչպէս օրինակ ես, այն ժամանակ կոմիտէն նշանակում է տասը, քսան, երեսուն տերրորիստ, որ ամեն տեղ հետևեն ինձ նման ժանդարմներին, գաւառապետներին և նահանգապետներին:

Ես իհարկէ, բոլորովին չեմ վախենայ: Հէրն եմ անիծել... չեմ վախենում... Եթէ ուզում են՝ թող սպանեն: Ես պատրաստ եմ մեռնել մեր պաշտելի Թագաւոր Կայսրի համար... Չեմ վախենում, բոլորովին չեմ վախենում:

Սրանից յետոյ ես աւելի պիտի ատեմ հայերին: Ակն ընդ ական, ատամ ընդ ատաման: Եթէ որ նրանք լաւ վարւէին ինձ հետ, ես նոյնպէս լաւ կը վարւէի: Բայց ինչ խօսես հետները, անկիրթ ժլատ մարդիկ են և իրենց օգուտը չեն ըմբռնում՝ մարդու սիրտ շահել չեն իմանում, Աստուած վկայ: Նրանք կարծում են, երևի, թէ ես, Յօմա Պիրաժկովս, մեծ-մեծ պահանջներ կանեմ...

Սիրելի եղբայր Պետր Օնուֆրիչ! դու վստահ եղիր, որ ես պատուով դուրս կը գամ բոլոր նեղութիւնների միջից: Ես դեռ պէտք է երկար ապրեմ, որովհետև Աստուած որ ինձ ստեղծել է՝ ստեղծելիս կարգադրել է, որ ես ապրեմ մինչև մահ, և միայն Աստուած իրաւունք ունի հրամայելու, որ հոգիս տամ... այո՛, միայն Աստուած և ոչ թէ հայոց յեղափոխական կոմիտէն: Կոմիտէն վճռել է, երևի, ինձ ումբով սպանել, բայց նրանք չգիտեն միթէ, որ Աստուած այդ տեսակ բաներին խիստ հակառակ է:

Խնդրում եմ, սիրելի եղբայր, աշխատիր որ ինձ յետ ուղարկես կրկին Վլադիկաւկազ կամ աւելի լաւ կը լինի՝ Ռոստով: Թիֆլիսի կլիման չեմ կարողանում տանել, առողջութիւնս կը փչանայ բոլորովին:

Քեզ վերին աստիճանի սիրող և գնահատող՝ Յօմա Օնուֆրիչ Պիրաժկով, կրտսեր եղբայրդ, Կովկասեան մայրաքաղաքի ժանդարմական վարչութեան մէջ ծառայող ժանդարմ:

Թիֆլիս, 31 մայիսի, 1910 թի:

Սիրելի եղբայր, ուրախ բաներ պէտք է գրեմ քեզ այսօր, որովհետև տրամադրութիւնս շատ բարձր է:

Գիշերս մեր ռոտմիտրի հետ՝ ես խուզարկութիւն կատարեցի մի նշանաւոր հայ յեղափոխականի տանը: Մեզ հետ կային Զասիպկինը, Պէշկովը, Կամէնսկին, Մարտինովը և ուրիշները (պէտք է ասած, սիրելի եղբայր, որ սրանք բոլորն էլ յիմար, անօգուտ ժանդարմներ են):

Ուղղարկութեան գնալիս, ճանապարհին ոտամիստը անունս տուեց թէ՛ «Պիրաժկով!...» և ես իսկոյն հասկացայ որ նա ուզում է կարծիքս իմանալ, որովհետև իմ կարծիքները կարևոր նշանակութիւն ունեն գործի համար: Ես էլ յայտնեցի կարծիքս... Այսինքն ոչ թէ ուղղակի ոտամիստը յայտնեցի, այլ այն ժամանակ երբ ոտամիստը ուզում էր հարցնել իմ կարծիքը՝ այն ժամանակ ես արդէն մաքիս մէջ ինքս ինձ պատրաստուել էի, որ ոտամիստը կարծիքս հարցնէր թէ չէ՛ ես էլ անմիջապէս կարծիքս պէտք է յայտնէի...

Մտանք հայ յեղափոխականի տունը: Ինքը՝ հայ յեղափոխականը չէր կարողացել փախչել, որովհետև ես շտապեցի բռնել խոհանոցի դուռը, որպէսզի նա չծլկէր այն կողմով: Ամբողջ կւարտալը շրջապատուած էր զինւորներով:

Ես սկսեցի խուզարկել եռանդով: Ճոխ կահաւորուած տուն էր: Սկզբում ես վերին աստիճանի ապշեցի. բայց յետոյ ուղքի եկայ: Այնպէս ոգևորւեցի, որ նոյն իսկ բարձերը քրքրելով՝ փետուրը դուրս թափեցի: Նոյն իսկ գլխարկների աստառը քանդեցի, որովհետև յեղափոխականները սովորութիւն ունեն՝ իրենց հագուստի մէջ յեղափոխական թուցիկներ պահելու:

Յետոյ գնացի խոհանոց և բոլոր պղինձները փորձեցի, այսինքն՝ մատովս պարկեցի մէկ-մէկ, որպէսզի ձայն դուրս գայ և ես իմանամ թէ կրկնակի պատեր չկան արդեօք պղինձների մէջ: Հայ տերրորիստները խորամանկօրէն այնպիսի պղինձներ են, երևի, շինել տալիս, որպէսզի գաղտնի արանքներուձը բաներ թաքցնեն: Ես լաւ հասկանում եմ նրանց խորամանկութիւնները:

Յետոյ գնացի՝ արտաքնոցը նայեցի մանրամասն կերպով:

Յետոյ ես մի քլունգ ճարեցի և բերի՝ պատը քանդեցինք մի տեղ, որովհետև կասկածելի թւաց մեր ոտամիստըին: Կացնով էլ շարդեցինք յատակի տախտակները...

Այնպէս տակնուվրայ արինք ամեն բան, կարծես թէ երկրաշարժ եղաւ: Երեք ամիս էլ հերիք չի անի, որպէսզի տունը կարգի բերեն նորից:

Որտա պէտք է վարւել յեղափոխականների հետ: Շանք որքան թակես՝ նա այնքան կը վախի քեզանից: Միշտ պէտք է իմաստուն լինել:

Բայց իմ զայրոյթն եկաւ, սիրելի եղբայրս, որ անպիտան արմեաշկան բոլոր ուումբերն ու թուուցիկները փախցրել էր առաջուց և մենք ոչինչ չգտանք: Իմ ջանքերն ու հեռատեսութիւնը զուր անցան: Ես ուզեցի որ զայրացած գոռամ հայ յեղափոխականի վրայ թէ՛ «Յոյց տուր, ասու՛մ եմ, ուումբերի տեղը, ապա թէ ոչ քեզ Սախալին կուղարկենք, ասու՛մ եմ, իսկոյն...» - Բայց միտքս փոխեցի ու ասի միայն՝ «АХЪ ТЫ армяшка соленый!»... Մէկ ուրիշ խօսք էլ պէտք է ասէի, բայց հայը յանկարծ ինքը բարկացաւ վրաս և մեր ուումիստրից պահանջեց թէ. «Խնդրեմ, պրոտոկոլ կազմէք. ոչ որ իրաւունք չունի իմ ազգային արժանապատուութեանը դիպչելու»:

Ես սկզբում չուզեցի վախենալ, բայց տեսայ որ մեր ուումիստրը պատասխանեց նրան թէ. «Հանգստացէք խնդրեմ, ես ինքս կը պատժեմ այս յիմարին»:

«Կըպատժեմ»-ը ինձ էր վերաբերում և իմ տրամադրութիւնը իսկոյն փշացաւ բոլորովին: Մտքիս մէջ հայհոյեցի երկուսին էլ՝ հայ յեղափոխականին և ուումիստրին: Այնպէս կարծեցի թէ ուումիստրն էլ հայի գաւակ է, քանի որ նա պաշտպանեց հայ յեղափոխականին (կարող է պատահած լինել, որ ուումիստրի մայրը... և այլն):

Մինչև խուզարկութիւնը վերջացրինք՝ հոգիս դուրս եկաւ: Շարունակ մտածում էի թէ ուումիստրը ինչ պատիժ է ինձ նշանակելու: «Ի հարկէ, ասում էի մտքիս մէջ, ոչինչ չգտանք՝ որովհետև ուումիստրը կանխապէս իմաց է տւել այս արմեաշկային խուզարկութեան մասին...» - Եւ խիստ բարկանում էի ինքս ինձ մեր այն ուու կանանց վրայ, որոնք գործ են ունենում հայ տղամարդկանց հետ և ինձ այսպիսի անյարմար դրութեան մէջ են գցում...

Սակայն տէր Ասուած, փողոց ելանք թէ չէ՝ մեր ուումիստրը կանչեց ինձ և բոլոր ժանդարմների ու զինւորների ներկայութեամբ ասաց հետևեալը. «Պիրաժկով, ասաց, եռանդ չափաւորիր, սիրելիս. այդ արմեաշկան յայտնի մարդ է և մեր պոլկովնիկը նրա եղբորը լաւ ճանաչում է. անախորժութիւն կարող էր ծագել քեզ համար էլ, ինձ համար էլ... Բայց և այնպէս լաւ ասիր, МОЛОДЕЦЬ!»:

Ես խիստ ուրախացայ. մինչև հիմա դեռ ուրախ եմ վե-

ըին աստիճանի. և ուրախութիւնից մի բանաստեղծութիւն գրեցի հայ տերրորիստների մասին: Բանաստեղծութիւնս կարգացի Վասիլիչին և նա խիստ հաւանեց ու խորհուրդ տւեց, որ տպել տամ մայրաքաղաքի լրագրներում: Ուղարկում եմ քեզ, որպէսզի դու էլ կարդաս: Ահա.

Ахъ ты! ахъ ты дурь-армяшка!
Эхъ ты дрянъ и картошка!
Ты зачѣмъ, армяшка, хочешь
Бомбу бросить намъ въ окошко?

Ты опасный террористъ,
Тебѣ любовь самъ антихристъ,
Но нашъ грозный Батка-Царь
Покажетъ вамъ брость такъ брость!

Յաջող բանաստեղծութիւն է, այնպէս չէ՞, թանգագին եղբայր: Իմ սիրտը զարկում է հրճւանքից: Բանաստեղծ Պուշկինը երբ թիֆլիս էր եկել ինձանից բառասուն տարի առաջ, գրել է թէ՛ «Кавказъ подо мною». Հիմա նոյնը կարող եմ ասել և ես, որովհետև եթէ ես հենց սկզբից բանաստեղծութիւններով զբաղւէի՝ այժմ արդէն կը լինէի յայտնի բանաստեղծ:

Եթէ ես համալսարանում սովորէի՝ այժմ արդէն բարձր պաշտօն կունենայի, թէև ընդամենը քսանըվեց տարեկան եմ:

Եթէ ես ամուսնացած չլինէի՝ այստեղ կամուսնանայի և լաւ օժիտ կը ստանայի: Սիրուն և հարուստ օրիորդներ շատ կան թիֆլիսում, սիրելի եղբայր: Թէև այլ ազգի են, բայց ունեն գեղեցկութիւն և փող միաժամանակ:

Եւզէնիյ Օնէգինը երբ մօտենում է Տատիանային, ձեռքը համբուրելով՝ այսպէս է երգում. «Вы мнѣ писали! Вы мнѣ писали!...» Շատ հիանալի է երգում, Աստուծ վկայ:

Ես շատ եմ սիրում, երբ որ թատրոնում փոթորիկ են ներկայացնում... Երկինքը տմպած: Սև-սև ամպերը մթնացրել են ողջ երկնակամարը: Յետոյ ամպերը զարկւում են իրար և որոտում են սարսափելի կերպով, կարծէս թնդանօթներ լինեն՝ գը՛ռռռ... բո՛ւմ-բո՛ւմ-բո՛ւմ... Գ՛րռ-ռռ... բո՛ւմ-բո՛ւմ-բո՛ւմ-բո՛ւմ-բո՛ւմ-բո՛ւմ-բո՛ւմ...

Յգրութիւն, սիրելի եղբայր: Ես քեզ միշտ կը սիրեմ, չեմ հպարտանայ երբէք քո առաջ, որովհետեւ դու իմ մեծ եղբայրն ես և ես պարտաւոր եմ քեզ յարգել, նոյն իսկ եթէ ես պոլկոմիկ դառնամ:

Գո Ծօմա Պիրաժկով:

Քիֆլիս, 4 յունիսի 1910 թ.

Սիրելի եղբայր Պետր Օնուֆրիչ. Այսօր առաւօտից սկսած ես մտածմունքի մէջ էի ուստի գրում եմ քեզ այս նամակը տխուր տրամադրութեամբ: Յոյս ունեմ, որ դու, իբրև իմ աւագ եղբայր, ինձ խորհուրդներ կը տաս, թէ ինչպէս պէտք է վարուեմ:

Առաւօտը ժամը 8-ին պոլկոմիկը բարկացած մտաւ ներս և այսպիսի խօսքեր ասաց. «Շատերդ, ասաց, անձնէր եռանդով չէք ծառայում Թագաւորին և Գահին, ասաց: Եռանդ, և՛ եռանդ: Հաւատարիմ մարդիկ էք, ասաց, կասկած չունիմ, ասաց, բայց դուք, ասաց, պարտաւոր էք աւելի եռանդով աշխատելու»:

Այսքանը լաւ էր ի հարկէ. և ես մեծ ուշադրութեամբ լսում էի, որպէսզի պոլկոմիկը տեսնէր, որ ես լսում եմ մեծ ուշադրութեամբ: Բայց յանկարծ պոլկոմիկը ձայնը բարձրացնելով՝ բարկացաւ. «Ձեր մէջ կան անհատներ, ասաց, որ բանաստեղծութիւններ են գրում յիմար յիմար: Կարուկ կերպով արգելում եմ, ասաց, և այսուհետև չարաչար կը պատժեմ բանաստեղծներին, թէկուզ նրանք Պուշկին ու Լերմոնտով լինեն!»:

Ամբողջ օրը մտածելուց յետոյ՝ ես համոզուեցի, որ անպիտան Վասիլիչն է գործը խառնել: Դու չգիտես, սիրելի եղբայր, թէ ինչ սրիկայ անձնաւորութիւն է եղել Վասիլիչը: Նա վերին աստիճանի նախանձում էր, որ ես աւելի առաջ եմ գնում, քան թէ ինքը: Նախանձեց նաև այն բանի համար, որ ես բանաստեղծելու տաղանդով եմ օժտուած, իսկ նա չունի ոչ կրթութիւն, ոչ էլ խելք: Սորչէնկոն, Պլատովը, Զասիպկինը, Պէշկովը, Մարտինովը՝ բոլորն էլ անկեղծ սրտով հաւանեցին իմ բանաստեղծութիւնը. բայց անպիտանը (այսինքն Վասիլիչը) երեսանց դովեց ու յետոյ դնաց ոտամիտըին դա-

նազան ամեղացիներ բաներ պատմեց իմ մասին. ոտամիտքն էլ պոլկովնիկին իմաց արեց: Ես վաղճաց կասկածում էի Վասիլիչի վերաբերմամբ:

Իէ որ այդպէս է, ես էլ այսուհետև թշնամաբար կը վարւեմ նրա հետ: Նա ինձ շարունակ ծաղրում էր՝ թէ ես գիրք չեմ կարդում բոլորովին. «Ի ու, Թոմա, ասում էր, թիչ բան գիտես աշխարհագրութիւնից և պատմութիւնից...» և այլն: Իսկ ինքը շատ բան է իմանում— ոչինչ չի իմանում, տգէտ է վերին աստիճանի: Խայտառակ մարդ... Ամերիկայում այդպիսի մարդ հազիւ թէ ճարես: Այնտեղ մարդիկ կրթւած են ու վերին աստիճանի քաղաքավարի. մեր ուս մուժիկների նման չեն: Մեր ժողովուրդը շատ յետ է մնացել, որովհետև մեր ժողովուրդը կրթութիւն չունի:

Վասիլիչը հիմա կասկածելի է երևում աչքիս, փաստակար անձնաւորութիւն է, և ես պէտք է գաղտուկ հետևեմ նրա գործունէութեանը, որովհետև նա գառնազգեստ գայլ է մեր մէջ:

Քո եղբայր Թոմա:

Թիֆլիս, 8 յունիսի, այս տարի:

Յարգելի եղբայր Պետր! Ի՞նչ մինչև այսօր մտածում եմ մեր պոլկովնիկի ասած խօսքերի մասին: Ես հնարներ եմ որոնում, թէ ի՞նչպէս անեմ, որ պոլկովնիկը գոհ մնաց ինձանից և այլևս չբարկանայ թէ՛ «Եռանդով չէք աշխատում»:

Պատմեմ քեզ թէ ի՞նչ եմ մտածել և ի՞նչ ծրագրով պէտք է այսուհետև գործեմ:

Իմ կարծիքս այն է, որ յեղափոխականը— յեղափոխական է. և իբրև յեղափոխական նա միշտ որևէ տեղ պահած կունենայ կամ ուժեր կամ թուլցիկներ: Բայց յեղափոխականները յաճախ այնպիսի ծակերում են պահում իրենց ամեն բաները, որ սատանաների շէֆն էլ որ ժանդարմ դառնայ և խուզարկի՝ դժւար թէ գտնի:

Ի՞նչպէս վարւել: Ի ու, օրինակ, հաստատ գիտես, որ ձրկնավաճառը, Մանթաշեր և այլն և այլն՝ իսկական յեղափոխական են. ի՞նչպէս պէտք է վարւես այսպիսի դէպքերում:

Մեր ոտամիտքը երէկ սրտնեղւեց ու ասաց ինձ. «Իրա-

կան փաստեր, փաստեր բերէք և ոչ թէ դատարկ ենթադրութիւններ: Գտէք փաստեր, թուղթիկներ գտէք, ուումբեր գտէք բացարձակ ապացոյցներ գտէք»:

Ճիշտ է, ի հարկէ: Ուստի ինձ թւում է, որ հարկաւոր է խորամանկութիւն բանեցնել: Բայց շատ եմ խնդրում, սիրելի եղբայր, գաղտնիքս ոչ ոքի մի յայտնի, միայն քեզ եմ գրում:

Ենթադրենք օրինակ, որ ես խուզարկում եմ յայտնի յեղափոխականի բնակարանը, բայց ոչինչ չեմ գտնում: Եւ որովհետեւ ոչինչ չեմ գտնում՝ չի՞ կարելի միթէ, որ ես ինքս որևէ հակակառավարչական թուղթ կամ գիրք՝ ծածուկ կերպով կոխեմ մահճակալի արանքը կամ գցեմ կամոզի արկղը: Իմ կոխած թուղթը կը գտնի մէկ ուրիշ ժանդարմ. իսկ ուրիշ ժանդարմի կոխած թուղթը՝ ես կը գտնեմ. կամ թէ կարելի է այնպէս անել, որ ինքս թաքցնեմ ու ինքս էլ գտնեմ»:

Այսպիսով մեծ օգուտ տւած կը լինեմ մեր ընդհանուր գործին: Դա կը նշանակի, որ յեղափոխականին բռնում եմ տեղն ու տեղը, առանց այլևայլութեան, վճռական հարւածով... Մէկ երկու-երեք... մարդ:

Յեղափոխականը հօ չի կարողանայ հաւատացնել, որ թուղթը իրենը չի. ո՞վ կը հաւատայ նրա խօսքերին. փաստը կը մնայ փաստ. «Ահա, կասեմ, ահա ապացոյց, կասեմ, որ դու վտանգաւոր յեղափոխական ես, կասեմ, ահա անհերքելի ապացոյց»:

Հաւանում ես իմ ծրագիրը, սիրելի եղբայրս: Այս գիշեր եթէ որ խուզարկութեան գնացինք՝ կը փորձեմ: Ես գրպանիս մէջ արդէն պատրաստ ունեմ երկու հատ յեղափոխական գիրք: Ծածուկ գողացայ ռոտմիստրի կարինետից, ուր ահագին բանակութեամբ յեղափոխական գրքեր կան հաւաքւած աշխարհի ամեն կողմից: Մի գիրքը կոչւում է «Ազրարային հարցը Ռուսաստանում», իսկ միւսը «Կոմմունիստական մանիֆեստ»...

«Մանիֆեստ...» չէ-չէ մի ոտներ: Միայն մեր թագաւոր Կայսրը կարող է մանիֆեստ արձակել: Օրինակ, երբ որ պատերազմ է լինում Եսպանիայի հետ, այն ժամանակ թագաւոր Կայսրը մանիֆեստ է արձակում: Օրինակ, երբ թագաժառանգ Տեսարևիչ Ալեքսէյ Նիկոլաևիչը ծնւեց այն տարին՝ թագաւոր Կայսրը մանիֆեստ արձակեց, որպէսզի որքան հին պարտքեր կային՝ բոլորը ջնջւեն: Օրինակ, երբ որ Ռումանովները Տան

100-ամեակը եղաւ՝ այն տարին թագաւոր Կայսրը էլի մանիֆէստ արձակեց և ո՛վ որ մարդ է սպանել կամ գողութիւն արել՝ ներուժն ստացաւ: Բայց Յեղափոխականներին չի կարելի ներել: Մանիֆէստ են ուզում հա՛, որ չպատժեն: Ամենքիդ մէկ-մէկ կախաղան կը շնորհենք՝ մէկ-մէկ կախաղան, որպէսզի բոլորդ կախւէք... Армяшки проклятые!

Այո, սիրելի և թանգագին եղբայր, երկաթը պէտք է տաք-տաք ծեծել... Ձերբակալել, շղթայել և աքսորել... Ձերբակալել, շղթայել, աքսորել!..

Յուլիոս Կեսարը միշտ ասում էր. «Եկայ, տեսայ և բռնեցի»... Ձերբակալեցի, շղթայեցի, աքսորեցի: Ոչ քննութիւն է հարկաւոր, ո՛չ դատավարութիւն: Նորից եմ ասում, որ երկաթը տաք-տաք կը ծեծեն. եթէ ուշացնենք՝ կը սառչի: Սուպը որ սառչում է՝ համն էլ կորչում է: Օրինակի համար, միշտ պէտք է տիկին բարեկամուհիներ ունենաս, որովհետև ամուսնացած կանայք աւելի ևայլ են լինում, քան թէ օրիորդները, որոնք դեռ ամուսնացած չեն: (Իմ խեղճ Ագրաֆէնան դժբախտաբար այնպիսի վիճակումն է, որ ես ստիպւած եմ խնայել նրան):

Առայժմ մնաս բարև, սիրելի եղբայր, ես և Ագրաֆէնաս քեզ գրկում ենք և համբուրում՝ ցանկանալով քեզ ամենայն բարիք:

Քո սիրելի եղբայր Ֆոմա Պիրատկով:

Շատ և շատ սիրելի եղբայր Պետր Օնուֆրիչ Պիրատկով:

Թանգագին եղբայր! Շտապում եմ յայտնել քեզ, որ ես այսօր ստացայ ս. Աննայի մեղալ՝ «за усердіе»: Արդէն կըրծքիս կախած՝ ման եմ գալիս: Ինձ շատ է սազում, որովհետև կուրծքս լայն է: Շուտով էլի նոր «Աննա» կը ստանամ. յետոյ «Ստանիսլաւ». յետոյ ուրիշ-ուրիշ շքանշաններ:

Բայց խիստ տարօրինակ եմ գտնում, որ Միտինին, Սորչէնկոյին ու Ջասիպկինին ևս մեղալներ են տւել: Չէ՞ որ նրանք անշնորհք և անօգուտ ժարդարմներ են և բոլորովին չպէտք է մեղալ ստանային: Մեր պոլկովսիկը, երևի, դիւմամբ է այդպէս արել՝ ինձանից վրէժ հանելու համար, որով-

հետև ես մի ժամանակ բանաստեղծութիւններ էի գրում:

է՛հ, Աստուած վկայ, աշխարհիս երեսին անարդարութիւն շատ կայ: Մեր պոլկովնիկը կամաց-կամաց ընկնում է հայ յեղափոխականների ազդեցութեան տակ: Նա Միտինին որ մէդալ է տւել՝ չգիտէ միթէ, որ Միտինը հաւատարիմ մարդ չէ: Նա Սորչէնկոյին որ մէդալ է տւել՝ չգիտէ միթէ, որ Սորչէնկոն մի հայ աղջիկ է հաւանել և կամենում է ինքն էլ հայերի հաւատքն ընդունել, որպէսզի վերջը հայ յեղափոխական դառնայ և մեր ամենքիս գաղտնիքները դուրս հանի:

Անցեալ օրը ես Սորչէնկոյին կողմնակի կերպով ասի. «Սորչէնկօ, Տէր-Պետրոսեանցի խանութը գիտես հօ... Հարուստ վաճառական է երևում: Արի, ես ու դու միասին ուսուցորտ տանք ռոտմիսարին, որ Տէր-Պետրոսեանցի խանութում շատ գէնք կայ պահած»... Բայց Սորչէնկոն չհամաձայնեց, որովհետև հայի աղջիկ է սիրում:

Ես հիմա Սորչէնկոյին անւանում եմ *полуармяшка*!... Այգւլէս էլ հարկաւոր է:

է՛հ, Աստուած վկայ, աշխարհս անկատար է, մարդկութիւնը գեռ էս չի հասկանում թէ ինչ է հարկաւոր անել, որ խաղաղութիւն հաստատւի արտաքին և ներքին թշնամիների դէմ: Մեր Թագաւոր կայսրը պէտք է խիստ հրաման արձակի՝ բոլոր տները (այսինքն ինչքան տուն որ Ռուսաստանի մէջ կայ) միանգամից խուզարկելու՝ երեք գիշեր անդադար... Եւ այն ժամանակ մենք Ամերիկայից էլ կանցնենք:

Սրանով վերջացնում եմ նամակս: Այս անգամ վերին աստիճանի կարճ գրեցի, որովհետև ժամանակ չունիմ բոլորովին: Հայ յեղափոխականները վճռել էին ինձ տերրորի ենթարկել, բայց ես այնպէս խորամանկ տարայ գործը, որ երեսուն ութ դաշնացական բռնեցինք և նրանք հիմա բանտարկւած են նկուղի մէջ՝ մեր ժանդարմական վարչութեան տակին: Այս գիշեր ձերբակալեցինք և վաղը ուղարկելու ենք Մետելի բանտը, իսկ այնտեղից՝ մի շաբաթ յետոյ էտապով կաքսորենք Սիբիր և աւելի հեռաւոր երկրներ:

Այնպէս որ, սիրելի եղբայր, ես խիստ զբաղւած եմ: Պոլկովնիկը եկաւ տեսաւ մեր ձերբակալած յեղափոխականներին և շատ գոհ մնաց, որ այդքան մեծ գործ ենք կատարել: «Բայց, ասաց պոլկովնիկը, շատ նեղւածք է, հարկաւոր է, ասաց, եր-

կու մասի բաժանել սրանց»։ Ես էլ լիովին համաձայնեցի պոլկովնիկի նկատողութեան հետ, որովհետև նկուղը իսկապէս փոքր է. արմեաշկաները այնպէս են թափւած իրար վրայ՝ ինչպէս որ սելեօդկաները տակառի մէջ։ Ոչինչ, սելեօդկաները աղած են լինում, — նոյնը և բոլոր արմեաշկաները։

Քեզ մի ծիծաղաշարժ բան պատմեմ։

Սրանից հինգ թէ վեց օր առաջ, փողոցում մի փոքրիկ արկղիկ գտայ՝ վարդագոյն թղթի մէջ փաթաթւած։ Արկղիկը բաց արի՝ միջին ինչ որ դեղին փոշի կար, կարծես դեղին ալիւր լինէր։ Տոյց տւի Զասիպկինին, բայց նա էլ չիմացաւ թէ ինչ բան էր։ «Բատիւշկոյին ցոյց տուր», ասաց նա։ Բատիւշկոն, սիրելի եղբայր, մեր Ֆէլդշերն է։

Բատիւշկոյին ցոյց տւի իմ գտած արկղիկը և նա իսկոյն ասաց թէ՝ «դա լուծողական փոշի է. ջրի հետ խառնում-խամում են կամ կերակրի մէջն ածում»։

Ես լուծողականը պահեցի մօտս. «Եթէ, մտածեցի ինքս ինձ, մի օր մրսեմ և փորս պնդանայ, ասի, այն ժամանակ կընդունեմ, ասի, որպէսզի առողջանամ»։ Պահեցի մօտս։

Ահա այդ դեղին փոշին այսօր ծածուկ լցրի ամբողջը բորշի մէջ և այնպէս տարայ՝ բորշը տւի բանտարկւած արմեաշկաներին, որ ուտեն։ Նրանք էլ կերան, որովհետև խիստ բաղցած էին...

Եւ հիմա, սիրելի եղբայր, հիմա նրանք... Հա-հա-հա-հա... Ուղղակի ծիծաղաշարժ բան է...

Առաւօտն էլ գնացել էի սափրիչի մօտ որ սափրւեմ (ես հիմա աշխատում եմ սափրւել շաբաթական երեք անգամ, որովհետև այդպէս է ինձ վայել)։ Այնտեղ հինգ հոգի հերթի էին սպասում, բայց ես առանց այլևայլի առաջինը նստեցի ու պատւիրեցի՝ «Շոտ, երեսս ածիլէք, ասի, ծառայութեան եմ գնում, ասի, շուտ արէք»։

Սափրիչը թէ՛ «Հերթ պէտք է պահէք, ասաց. ձեր հերթը յետոյ է»։ Ես այնպէս նայեցի վրան, որ նա իսկոյն վախեցաւ և ներողութիւն խնդրեց։ Նրան պատժելու համար՝ ես էլ ոչինչ չվճարեցի... Թող իմանան ոուս ժարդարմի պատիւը։ Սովորական մարդ չեմ հօ. իմ ձեռքին հազար տեսակ գործ կայ։ Ուզենամ կը մատնեմ, ուզենամ կը ծածկեմ։ Ամեն ինչ կախւած է ինձանից։

Իմ առողջութիւնը շատ լաւ է, սիրելի եղբայր. Առհասարակ, ես հիմա լաւ եմ ապրում. ինչ որ սիրտս տալիս է՝ առնում եմ, որովհետեւ եկամուտս աւելանում է օրէցօր: Երէկ, օրինակ, մեր տանը այսպիսի ճաշ ունէինք. առաջին տեսակը՝ կանաչ շշի, по моророссийски, թարմ սմէտանով. երկրորդ տեսակը՝ լաւ հիւթալից կատլէտներ՝ տապակած գետնախնձորով և թթու վարունգով. երրորդ տեսակն էլ՝ կիսէլ: Գինին մեր տանը առատ է.— իսկական կախէթի գինի: Յաճախ քէֆեր ենք անում և վերին աստիճանի ուրախ ենք:

Հետևեալ անգամ ես քեզ մանրամասն կը գրեմ ամեն բանի մասին:

Վաղը ամսի 20-ն է. թէև մենք ռոճիկներս պէտք է ըստանանք, բայց ես բոլորովին չեմ մտածում, որովհետև դրամի առանձին կարիք չեմ զգում: Ես կարող եմ նոյն իսկ տոկոսով փող տալ մէկ-երկու տարի ժամանակով, եթէ որ քեզ հարկաւոր լինի:

Քո կրտսեր եղբայր՝ ժանդարմական
ունտէր-օֆիցէր Յօմա Պիրաժկով:

19 յունիսի, քաղաք Թիֆլիս:

1910 թ. յունիս ամիս 30, քաղաք Թիֆլիս:

Շատ սիրելի և ամենաթանգագին եղբայր Պետր Օնուֆրիչ!

Այսօր ամբողջ քաղաքը վաղ առաւօտեանից զարդարւած է դրօշակներով, որովհետև այսօր Նորին Կայսերական Բարձրութիւն թագաժառանգ Յեսարևիչ Ալէքսէյ Նիկոլաևիչի ծննդեան օրն է: Երեկոյեան բոլոր փողոցներում կը լինի մեծ հրավառութիւն և կը լինի մեծ ցնծութիւն:

Չորս օր է ես քաղաքում ման եմ գալիս սովորական մարդու՝ շտատակի հագուստով, այսինքն՝ սև շեապա ունեմ, պինջակ և ընդհանրապէս այն ամենը, ինչ որ սովորաբար հագնում է սովորական ամեն մի մարդ, որ ոչ զինւորական է, ոչ էլ ժանդարմ: Պաւել Կորսակովն ևս հագել է շտատակի, երևի նրան էլ մեր ռոտմիստրն է այդպէս կարգադրել, որովհետև ինձ ռոտմիստրն է այդպէս կարգադրել:

Ես իմ նոր շորը հագած պէտք է ամեն տեղ մտնեմ ու շորս կողմս շարունակ ականջ դնեմ թէ ինչ են ասում մարդիկ իրար մէջ: Եւան ականջ դիր, ասաց մեր ռոտմիստը, ականջներդ լաւ սրիր, ասաց, շորս կողմդ լաւ դիտիր, ասաց:

Ի հարկէ, ես շատ լաւ ականջ եմ դնում: Ոչ ոք չի կարողանում ենթադրել, թէ ես ոչ թէ հասարակ մարդ եմ, այլ իսկական ժանդարմ եմ: Բայց եթէ մի հասարակ մարդ որևէ շար նպատակով ուզենայ ժանդարմի շոր հագնել, որ մեզ խաբի,— ես անմիջապէս կիմանամ, կը հասկանամ որ դա սուտ է, կեղծիք է և իսկոյն կը ձերբակալեմ այդ տեսակ գառնազգեստ գայլերին: Իսկ ինձ ոչ ոք չի կարող հասկանալ թէ ժանդարմ եմ, և ոչոք իրաւունք չի ունենայ ինձ ձեռնամուխ լինելու:

Լաւ բան է եղել ուրիշների խօսելուն գաղտուկ ականջ դնելը: Այս երեք օրւայ մէջ ես շատ հետաքրքրական նորութիւններ իմացայ:

Երկու հայ ռուսերէն խօսում էին տրամւայի վագոնում: Ես էլ նստած էի նրանց կողքին: Դիտմամբ նրանց կողքին նստեցի, որովհետև առաջին իսկ հայեացքից կասկածելի երեւացին:

— Այսօր երեկոյեան,— ասաց երկու հայերից մէկը, որ երկար սև մօրուք ունէր ու կապոյտ ակնոցներ,— այսօր երեկոյեան հանդիպեմք անպատճառ:

— Ի հարկէ, ի հարկէ, ես անպատճառ կը գամ,— պատասխանեց երկրորդը, որ մօրուք չունէր, այլ միայն ակնոցներ, բայց ոչ նոյնպէս կապոյտ, այլ սովորական ակնոցներ:

Եւ յետոյ երկուսն էլ իսկոյն լռեցին: Մօրուքաւորը ծածուկ արմունկով հրեց անմօրուքին և ինչ որ բան ասաց իրենց լեզուով: Ես զլխի ընկայ ու մտքիս մէջ ասի. «Շանորդիք իմացան, որ ես սովորական մարդ չեմ»:

Բայց ես իսկոյն երեսս շուռ տւի՝ որպէս թէ բոլորովին չեմ հետաքրքրւում նրանց խօսակցութեամբ, և սկսեցի մտիկ տալ աջ կողմս՝ փողոցի խանութներին ու ցուցանակներին:

Ականջներս լարած պահեցի: Նրանք մկների պէս՝ ակնոցների տակից նայում էին ինձ վրայ. իսկ ես կատուի նման հանգիստ՝ քթիս տակ մրմռում էի Եւգէնի Օնէգինի եղանակով. «Ахъ ты, ахъ ты дурь-армяшка, ахъ ты дрянъ и картошка!...»

Հասանք Երևանեան հրապարակ: Նրանք երկուսն էլ շտապով իջան վագոնից և ուզեցին անյայտանալ աչքիցս: Բայց ես արժևի հայեացքով հետևում էի նրանց: Եւ որպէսզի չկորցնեմ նրանց, գնացի ու կանգնեցի բաւականի մօտիկ՝ իբրև թէ սպասում եմ ուրիշ վագոնի:

— ЭТОТЪ ШПИКЪ СЛѢДИТЪ ЗА НАМИ, — ասաց անմօրուքը և մատով ցոյց տւեց դէպի ինձ: Ես ուզեցի բարկանալ, բայց զսպեցի ինձ: Անզգամը երես առաւ իմ լսութիւնից ու բարձր կանչեց ինձ. «ШПИКЪ, ШПИКЪ, ШПИКЪ!... ПАДИ КО МНѢ, ПОДИ КО МНѢ!»... Շուն կանչելու ձևեր արեց:

Ես նրանց շնչն ցոյց կըտամ: Նրանց դէմքերը լաւ յիշում եմ, կը գտնեմ մի օր:

Եթէ մէկ ուրիշ ժանդարմ լինէր իմ տեղակ՝ չէր համբերի ի հարկէ և աղմուկ պէտք է ծագէր: Բայց ինչ օգուտ կը ստացւէր աղմուկից — ոչ մի օգուտ: Մինչդեռ ես ինձ սառը պահեցի, որովհետև կամքի մեծ ոյժ ունեմ: Մարդ կարող է բարկանալ, եթէ ուզենայ բարկանալ, և կարող է չբարկանալ՝ եթէ ուզենայ չբարկանալ:

Օրինակ, իմ բարկութիւնս հիմա գալիս է ոչ թէ այն պատճառով, որ երկու արմեաշկաները ինձ անպատուեցին ու փախան վախկոտ նապաստակների պէս, այլ ես բարկացած եմ դեռ ևս սաստիկ՝ Վասիլիչի դէմ... Սրիկան դիտմամբ եկել-կանգնել էր տրամալայի վագոնների մօտ և մեծ բաւականութեամբ լսեց արմեաշկայի հայհոյանքը: Պէտք է ասեմ քեզ, սիրելի եղբայր, որ Վասիլիչն էլ շրջում է քաղաքում սովորական մարդու հագուստով: Այս մասին նամակիս սկզբում չգրեցի, որովհետև ընդհանրապէս չեմ ուզում խօսել Վասիլիչի անձնաւորութեան մասին: Նա այժմ ինձ համար մի ոչնչութիւն է՝ մի կենդանի դիակ, որի հոտից մարդ պէտք է քիթը հուպ տւած պահի շարունակ:

Հաստատ համոզւած եմ, որ Վասիլիչը հայ յեղափոխականների հետ գաղտնի ընկերութիւն է անում: Դրա համար նա ինձանից աւելի շատ բաներ գիտէ յեղափոխականների կեանքից: Առաջ ես ուղղակի զարմանում էի թէ իրտեղից նա այնքան մանրամասն տեղեկութիւններ էր հաղորդում:

Ուստի ես երկու օր առաջ գաղտնի ռապորտներ կայացրի մեր ռոտմիստրին հետևեալ բովանդակութեամբ. «Պատիւ ու-

նեմ տեղեկացնելու ի գիտութիւն Վашего Высокоблагородія, որ Ձեր սատրաղրեալ ծառայող՝ վախճաբար Ա.Ֆանասիյ Վասիլևիչ Մէշկովը բարեկամական կապեր ունի հայ յեղափոխական կոմիտէի անդամների հետ, և նրանցից մեծ գուժարներ է ստանում իբրև կաշառք: Նրա այս տեսակ գործունէութիւնը մնաս է բերում Գահին և Հայրենիքին:

Ռոտմիստրը կարգաց իմ ապուրտը և յետոյ իսկոյն գնաց պոլկովնիկի մօտ, պոլկովնիկն էլ, հեռագիր ուղարկեց, կարծեմ, ներքին գործոց մինիստրին:

Ինչ արած թէ Վասիլևիչը իմ և քո հին ծանօթն է: Ես աչքի առաջ ունեմ նախ և առաջ մեր ընդհանուր Հայրենիքի շահը՝ և եթէ դու էլ, սիրելի եղբայր, երբևիցէ հակառակ գնալու լինես (օրինակի համար եմ ասում, ի հարկէ) գոյութիւն ունեցող կարգերին՝ այն ժամանակ ես օրհասական կռիւ կը մղեմ նաև քո դէմ:

Ամենից առաջ՝ եռանդ և հաւատարմութիւն... Կեցցէ մեր պանծալի թագաւոր Կայսրը!

Կեցցէ Մեծ Ռուսաստանը! Թող կործանւի հայ յեղափոխութիւնը! Թող կործանւեն բոլոր հայերը, վրացիք և թուրքերը! Կեցցէ մեր պոլկովնիկը!

Ֆ. Պիրաժկով:

Թիֆլիս քաղաք, 22 յուլիսի 1910 թւի:

Իմ եղբայր Պետր Օնուֆրիչ Պիրաժկովին յարգալի և սիրով բարևներ:

Յարգելի եղբայր, քո նամակը ստացել եմ երկու շաբաթ առաջ: Բայց հիմա եմ պատասխանում, որովհետև գործերս թոյլ չեն տալիս ինձ՝ զբաղելու կողմնակի հարցերով:

Իմ հաւաքած ամենաճիշտ տեղեկութիւնների հիման վրայ, պոլկովնիկը կարգադրեց խուզարկել մի հայ դերձակի արհեստանոց, որ գտնւում է հայոց դպրոցի հենց կողքին: Խուզարկութիւնը տւեց կարևոր արդիւնք. արհեստանոցում գտնւել են՝ հրացանի ու ատրճանակի փամփուշներ մեծ քանակութեամբ և յեղափոխական թռուցիկներ՝ նոյնպէս մեծ քանակութեամբ:

Պոլկովնիկը վերին աստիճանի գոհ է ինձանից: Ռոտ-

միստրն էլ, իհարկէ, նոյնքան գոհէ. բայց ես հիմա նրա կարծիքներին այլևս արժէք չեմ տալիս: Շատախօս յիմար մարդ է, իրէն ծանր պահել չի իմանում՝ շարունակ գոռգոռում է մեր միւս ժանդարմների վրայ:

Յարգելի և սիրելի եղբայր, այն բանաստեղծութիւնները, որ մի ժամանակ ուղարկել եմ քեզ, բարի եղիր՝ դէն գցիր, հարկաւոր չեն, որովհետև ես այլևս չեմ գրում բանաստեղծութիւններ: Գրում են միայն ծոյլ ու պարապ մարդիկ:

Մեր նորածինը վերին աստիճանի առողջ, կայտառ և մեծ ապագայ խոստացող երեխայ է: Անդրանիկները սովորաբար հօրն են նմանում: Արդէն կնքել ենք երեխային և մեծ ընթրիք պատրաստեցինք այդ առթիւ: Տղայիս անունը դրինք Բորիս (մեր պոլկովնիկին ի պատիւ):

Հնդուներ իմ խորին յարգանքի զգացմունքներս. քո եղբայր՝ ժանդարմական ունտէր-օֆիցեր Ֆ. Օ. Պիրաժկով:

Ք. Թիֆլիս, 15 օգոստոսի 1910 թ.

Սիրելի եղբայր! Հաճոյքով կատարում եմ քո խնդիրը և ուղարկում եմ քեզ պատճէնը այն ռապորտի, որ ես ներկայացրի Բորիս Պաւլովիչին (մեր պոլկովնիկը)՝ հայոց յեղափոխական կոմիտէի անդամներին միանգամից ձերբակալելու համար: Դու թէև ուրիշ տեղեկութիւններ ես խնդրել ինձանից՝ այստեղի տաք բաղանիսների մասին և այլն. բայց անշուշտ, քո վերջին նամակդ գրելիս՝ դու իմացած չես եղել իմ ռապորտի մասին. ուստի և հիմա որոշեցի անմիջապէս ծանօթացնել քեզ նրա բովանդակութեան հետ:

Իսկ ինչ վերաբերում է այստեղի տաք բաղանիսներին և այլն, պէտք է քեզ ասեմ, սիրելիս, որ ես կանոնաւոր կերպով, ամեն երկու շաբաթը մէկ, գնում եմ բաղանիս՝ կամ Ագրաֆէնայի հետ միասին, կամ բոլորովին առանձին: Երբ Ագրաֆէնան հետս է լինում՝ այն ժամանակ մեր երկուսիս համար յատուկ համար ենք վերցնում և մի ժամ լողանում:

Բայց ճիշտն ասած, ես այնքան էլ չեմ ուզում, որ Ագրաֆէնան հետս լինի: Ես աւելի գերադասում եմ ընդհանուր աղամարդկանց լողարանը մտնել (իսկ Ագրաֆէնային հօ չեմ տանի այնտեղ), որովհետև զանազան մարդկանց հանդիպելու,

ծանօթանալու առիթներ են լինում: Չէ որ յեղափոխականներն
ևս լողանալու կարիք են ունենում: Բաղանիսում նրանք ի-
րենց ապահով են զգում, որովհետև մերկ են և այնպէս են
համոզւած թէ ոչ ոք չի հետևում նրանց: Նրանք ազատ կեր-
պով լողանում ու խօսում են՝ բարձրաձայն երգում են, իրար
վրայ կատակով ջուր շաղ տալիս և առհասարակ իրենց լուրջ
չեն պահում:

Թէև նրանք հայերէն են խօսում (որովհետև ուսերէն
չեն իմանում. հայ յեղափոխականները վերին աստիճանի հա-
կառակ են ուսաց լեզւին). այնուամենայնիւ նրանց շար-
ժումներից կարելի է շատ բան հասկանալ:

Ինչևիցէ, ես չեմ կարող, ի հարկէ, քեզ հիմա մանրա-
մասն նկարագրել թէ ինչպէս եմ հասկանում նրանց գաղտնի
մտքերն ու ծրագրները: Չնայած որ դու իմ հարազատ եղ-
այրն ես, բայց և այնպէս կան որոշ կարևոր գործեր և ծրա-
գրներ, որոնց մասին քեզ չեմ կարող յայտնել: Օրինակ, մի-
թէ ներքին գործոց մինիստրը ուրիշներին կը պատմի իր գաղտնի
ծրագրների մասին: Ի հարկէ չի պատմի, որովհետև խելօք,
լուրջ հեռատես ու վերին աստիճանի զգոյշ մարդ է:

Հարցը համարում եմ փակւած:

Ստորև կցում եմ իմ ուսուցիչի պատճէնը: Քեզ իրաւունք եմ
տալիս ցոյց տալու ուսուցիչս քո պաշտօնակիցներին ու մեծա-
ւորներին:

Ազրաֆէնայի առողջութիւնը լաւ է: Նա իմանալով որ
քեզ եմ նամակս գրում խնդրեց բարևել քեզ իր կողմից: Ըն-
դունիր միաժամանակ նաև իմ բարևները:

Սղմում եմ ձեռքդ: Բո եղբայր՝ Ծօմա:

Պատնէն.

Նորին Բարձրաբարեօնութիւն Թիֆ-
լիսի ժանդարմական վարչութեան
պարոն գլխաւորին. ժանդարմական
կրտսեր ունտէր-օֆիցէր Ծօմա Պի-
րաժկովից:

Ռ Ա Պ Ո Ր Տ

Չերդ Բարձրաբարեօնութիւն! Հաւատարմութեամբ և անձ-
նելիրութեամբ ծառայելով Գահին ու Հայրենիքին և չխնայելով
իմ եռանդը, առողջութիւնը, խելքս ու գիտութիւնս և պատ-
րաստ լինելով այսուհետև էլ աշխատել նոյն ոգւով և բնաւ

չունենալով որևէ անձնական ակնկալութիւն՝ շքանշաններ ստանալու, և նկատի առնելով մեր ընդհանուր գործի շահն ու նպատակը, — ես թոյլ եմ տալիս ինձ ամենախոնարհաբար գեղուցանելու Ձերդ Բարձրաբարեծնութեան՝ հայոց յեղափոխական կոմիտէի բոլոր անդամներին, որոնք յանցաւոր գործունէութիւն են վարում գոյութիւն ունեցող կարգերի դէմ, ձերբակալելու մասին:

Հայ ժողովուրդը վերին աստիճանի ապերախտ է դէպի Ռուսական Գահը և այդ պատճառով էլ հայերի մէջ առաջ է եկել տերրորիստների շարամիտ կազմակերպութիւնը, որ նպատակ ունի շարունակ մահացնել՝ Գահի ու Հայրենիքի համար անձնւէր կերպով աշխատող բոլոր կարևոր ուսու պաշտօնեաներին: Հայոց յեղափոխական կոմիտէն անցել է կովկաս թիւրքիայից և Նապոնիայից, որովհետև թիւրքական և եապոնական թագաւորները, որոնք խիստ հակառակ են մեր Ռուսաստանին և դեռ չեն ուզում խրատել մեր տւած մահացու հարւածներից, ահա այդ թագաւորները ահագին գումարներ և մեծ քանակութեամբ զէնք են տալիս հայ յեղափոխական կոմիտէի անդամներին և շարունակ գրգռում են հայերին, որ նրանք ապստամբւեն մեր դէմ:

Երկար ժամանակ, օր ու գիշեր, յաճախ անքուն մնալով, ամենուրեք ու ամենքին հետևելով՝ ես հսկայական ջանքեր եմ թափել և ահա այժմ ի վիճակի եմ ամենաստոյգ և ամենակարևոր տեղեկութիւններ հաղորդել հայոց յեղափոխական կոմիտէի գաղտնի որոշումների ու ծրագրների վերաբերմամբ:

Կոմիտէն արել է հետևեալ որոշումները.

1. Պայթեցնել դինամիտով ժանդարմական վարչութեան ամբողջ գլխաւոր շէնքը՝ իր բոլոր ֆիզիկէլներով:

2. Պայթեցնել դժոխային մեքենաներով Նորին Կայսերական Մեծութեան Կովկասի Փոխարքայի սլալատը:

3. Պայթեցնել Ձինւորական Տաճարը:

4. Յարձակումներով գրաւել արսենալի կազարմաները:

5. Իրենց Կաթողիկոսին թհհրանից բերել թիֆլիս և թագաւոր յայտարարել:

6. Մի շարք ուրիշ որոշումներ, որոնք երկրորդական նշանակութիւն ունեն:

Այս որոշումների իրագործումը մեծ դժբախտութիւն կը լինի ամենքիս համար. ուստի անհրաժեշտ է հիմիկեւանից այնպիսի միջոցներ ձեռք առնել, որոնք կտրուկ լինելով՝ մահացու հարւածների պէս իջնեն հայ յեղափոխութեան գլխին: Օրինակ, հարկաւոր է մեր ժանդարմական վարչութեան տակին՝ գետնի մէջ մի լայն ծակ փորել ու հեռախօս սարքել: Հեռախօսի մօտ միշտ մի հերթապահ պէտք է նստած լինի, որպէսզի վտանգի մասին իսկոյն իմաց տայ, որովհետև հայ տերրորիստները նըպատակ ունեն՝ գետնի միջով անցկացնել դինամիտը:

Յետոյ ամենից առաջ հարկաւոր է կարգադրել, որ բոլոր լուսանկարիչները երկու օրը մէկ անգամ կանոնաւոր կերպով ուղարկեն ժանդարմական վարչութեանը՝ իրենց մօտ նկարւող մարդկանց պատկերները, ազդանունները և բնակարանի հասցէները: Դէմքերից միշտ էլ կարելի է իմանալ, թէ ո՞րն է իսկապէս տերրորիստ:

Աւելի կարևոր են հետևեալ միջոցները.

1. Հայերի բոլոր տպարանները փակել, որովհետև յեղափոխական թռուցիկները նրանք են տպում:
2. Փակել հայոց դպրոցները. ուսուցիչներին ուղարկել ուրիշ քաղաքներ, իսկ վարժուհիներին կարելի է պահել:
3. Բոլոր հայ դերձակների արհեստանոցները խուզարկել իւրաքանչիւր շաբաթ ու չորեքշաբթի օրերը, գիշեր ժամանակ:
4. Բոլոր նամակները, որ հայերի հասցէով կլինեն, բաց անել և մանրամասն կերպով կարդալ:
5. Բոլոր հայ ճանապարհորդներին խուզարկել, որպէսզի ուղմբեր չանցկացնեն գաղտնի կերպով:
6. Չերբակալել բոլոր կասկածելի հայերին ու առժամանակ ուղարկել ներքին նահանգները:
7. Հայերի հարսանիքներին ու թաղումներին գաղտնի ոստիկաններ կանգնեցնել:

Չերդ բարձրաբարեծնութեան խոնարհ ծառայ և ստորագրեալ՝ կրտսեր ունտէր-օֆիցէր և ս. Աննայի 4-րդ աստիճանի շքանշանի կաւալէր՝ Ծօմա Պիրաժկով:

Յ. Գ. — Պէտք է քեզ նախապէս ասեմ, եղբայր Պետար, որ Բորիս Պաւլովիչը ինձ հետ համարեա թէ ընկեր է դարձել: Նա արդէն այցելում է ինձ: Երէկ օրինակ առաջին անգամ ե-

կաւ մեզ մօտ, նստեց երկար ժամանակ և շատ ուրախ անցկացրինք երեկոն: Ես էի, Բորիս Պաւլովիչը և Ազրաֆէնա Պաֆնուտենան. և ուրիշ ոչ ոք: Բորիս Պաւլովիչը հիանալի անէկզոտներ պատմեց և ես սաստիկ ծիծաղեցի:

Հրաշալի մարդ է և վերին աստիճանի խելօք ու զարգացած: Ես կարծում եմ, որ նա շուտով կը դառնայ ներքին գործոց մինիստր:

Երէկ նա Ազրաֆէնա Պաֆնուտենայի համար երկու ֆլակօն ընտիր օգէկօլօն բերեց նւէր: Թանգագին բաներ են: Իսկ այսօր էլ՝ յատուկ մարդու ձեռքով ուղարկեց մի ծաղկեփունջ:

Ես և Ազրաֆէնան անկեղծ սրտով յարգում ենք Բորիս Պաւլովիչին, որ նա կարողանում է յաջող ընտրութիւն անել իր ստորագրեալների մէջ:

Ֆ. Օ. Պ.

22 սեպտեմբերի, Թիֆլիս:

Սիրելի եղբայր Պետր Օնուֆրիչ! Ես ստացայ առաջ ունտէր-օֆիցէրի աստիճան և պագոններիս վրայ երեք շերտիկ եմ կրում:

Ազրաֆէնան շատ գոհ է և օրէցօր աւելի է գեղեցկանում անպիտանը: Ես հպարտանում եմ, որ նրա պէս գեղեցկուհի կին ունեմ:

Բորիս Պաւլովիչը խոստացել է՝ ներկայացնել ինձ ս. Աննայի 3-րդ աստիճարի շքանշանի: Ես այսուհետև արագ քայլերով առաջ կերթամ, ինչպէս որ շոգեմեքենան՝ սկզբում կամացկամաց է շարժւում ու յետոյ արագացնելով-արագացնելով... փո՛ւ-փո՛ւ-փո՛ւ՝ վշշալով ու դղրդալով՝ սլանում է դէպի դաշտերը, լեռները և այլն:

Բորիս Պաւլովիչին պատմել եմ քո մասին, որ դու իմ եղբայրն ես և դեպարտամենտի մէջն ես ծառայում:

Առաջ ունտէր-օֆիցէր՝ Ֆ. Օ. Պ. (այսինքն՝ Ֆ. Օ. Պ.՝
րաժկով):

3 հոկտեմբերի, Թիֆլիս:

Թանգագին եղբայր, կարող եմ յայտնել քեզ, որ ես ստացայ այսօր առաւօտեան ս. Աննայի 3-րդ աստիճանի շքանշանը:

Ի՞նչպէս է քո Թանգագին առողջութիւնը, ինչպէս են ընթանում գործերդ, հետ:սքրքրական է իմանալ: Յոյս ունեմ, որ

դու կը պահես քեզ արժանաւոր կերպով և իմ անունիս վրայ սուտեր չես ձգի: Աշխատիր լինել միշտ զգոյշ, հեռատես և անձնւէր:

Ազրաֆէնա Պաֆնուտենային հաղորդեցի քո ուղարկած բարևները, նա շնորհակալութիւն յայտնեց:

Ընդունիր իմ կողմից ամենաշերմագին և ամենաանկեղծ բարևներ:

Աւագ ունտէր-օֆիցէր և ս. Աննայի 4-րդ և 3-րդ աստիճանի շքանշանների կրկնակի կաւալէր՝ Յովա Օնուֆրիեւիչ Պիրաժկով:

15 հոկտեմբերի, 1910 թ.

Նամակներդ ստացել եմ, սիրելի եղբայր, բայց չեմ կարող քո խնդիրը կատարել:

Ներկայումս զբաղւած ենք հայ յեղափոխականների դատով: Զերբակալած ունենք երկու հազարից աւելի մարդ: Գլխաւոր մեղադրողներից մէկը ես եմ:

Նոր բնակարան ենք վարձել՝ երեք սենեակ, խոհանոց և ուրիշ շատ յարմարութիւններ: Բորիս Պաւլովիչն ինքը ջոկեց՝ իրա ճաշակով:

Ազրաֆէնա Պաֆնուտենան համարեա իւրաքանչիւր ամիս նոր հագուստ է կարել տալիս և միշտ թատրոն է գնում:

Բորիս Պաւլովիչը իմ մասին յատուկ զեկուցում է ուղարկել ներքին գործոց մինիստրին և խնդրում է օֆիցերական կոչում տալ ինձ:

Աւելորդ եմ համարում մանրամասն գրել իմ գործունէութեան մասին. կարծում եմ, որ ամեն ինչ պարզ պէտք է լինի քեզ համար:

Յամենայն դէպս դու կարող ես, եթէ ուզենաս, ինձ նամակներ ուղարկել. ես սիրով կը կարդամ: Բայց միայն լուրջ բաներ գրիր, որպէսզի Ազրաֆէնան ևս կամենայ հաճոյքով կարդալ:

Պատրաստում եմ մէկ ընդարձակ և փաստաւոր զեկուցում՝ հայ յեղափոխական շարժումի նպատակների վերաբերեալ: Զեկուցումը կուղարկի Պետերբուրգ, որպէսզի տալի:

Եղբայրդ:

Վ. Վ. Ա. Ա. Գ. Ն. Ն.

ՀԱՐԱԻԻ ԾԱՂԻԿՆԵՐ

I

* * *

Ես էլ աղօթել չեմ կարող,
 Տաճարի ճամբան եմ մոռացել.
 Իմ գիտցած ճամբի վրայ
 Սոտ ու մացառն է բուսել.

Իմ տեսածներից ո՛չ մէկը
 Աստուծոյ նման չէ,
 Միայն քո գունատ դէմքն է,
 Որ ինձ աղօթք կը ներշնչէ
 Իմ աղօթքները և սաղմոսները բիւր.
 Քեզ է միայն, քեզ, որ կը կանչէ:

II

Միայն ինձ համար

Երբ որ փակում ես աչերդ ծաւի,
 Գիտե՞ս, որ այնտեղ թաղում ես դու ինձ,
 Ո՛վ ոճրագործ...

Երբ որ բանում ես կողերտ յստակ,
 Գիտե՞ս, որ դու ինձ նոր կեանք ես տալիս,
 Ո՛վ դու իմ Աստուած:

Ա՛խ, իմ թաղումն ու յարութիւնը
 Քո ծով աչերում, եզեմ ինձ համար,
 Միայն ինձ համար...

Սար-Յով






* * *

Թող ես մոռանամ ընկեր ու ծանօթ,
 Ապրեմ երազը, խորհուրդն աշխարհի,
 Քաղաքի կեանքին չլինեմ ես մօտ,
 Օթևանս անեմ լեռներն ամայի:

Եւ մինչև աստղոտ, պայծառ իրիկուն
 Անցնեմ հանդ ու գիւղ, շէներ շարէշար,
 Վանք ու սրբավայր՝ լեռների գոգում,
 Ոսկեծուփ արտեր, ճամբայ, գետ ու սար:

Կամ հսկայ հօտով ոչխարս լինի
 Իրիկնամուտին որոճի նստած,
 Մայունին ձուլեմ մեղեդիս ի մի,
 Ունկնդիր լինեն կանաչները թաց:

Թող ես մոռանամ ընկեր ու ծանօթ,
 Քաղաքի կեանքին չլինեմ ես մօտ:
 Պահարէ



* * *

Մանուկ, միամիտ մանուկ էի հեզ,
 Ծովի եզերքին խխունջը առնում,
 Աւազը ոսկի նախշում էի ես.
 Ալիքը գալիս աւազին զարնում
 Ու ջնջում էր իմ նախշերը պէս-պէս...
 Եւ այսօր թէև էլ մանուկ չեմ ես,
 Բայց նոյնն եմ անում...

Մանուկ, միամիտ մանուկ էի հեզ,
 Ու ձեռքս դէպի աստղն էի պարզում,
 Որ բռնեմ իսկոյն, ներքև բերեմ ես,
 Բայց աստղը հեռո՛ւ՝ ձեռս չէր հասնում.
 Ու լալիս էի, ո՛հ, ինչպէս, ինչպէս...
 Ու թէև այսօր մանուկ չեմ էլ ես,
 Բայց նոյնն եմ անում...

Նղիա Տէր-Հայրապետեան

ՅՈՒՍԱԼՔՈՒՄ

Pauvre âme, c'est cela!
Paul Verlaine

Կուզես փոթորկւիր, կուզես գազազիր,
 Կնոջ գրկին մէջ լոկ թոյն կայ զազիր...
 Սիրտ, կուզես մեռիր, կուզես գազազիր:
 Ոչ ոք չունեցար, որ քեզ յոյս մը տար,
 Զուր կնոջ հոգու ներսերը մտար...
 Սիրտ, ոչինչ չկար, որ քեզ յոյս մը տար:
 Եւ երազեցիր հոգեկան մի սէր,
 Բայց սէրը կնոջ պատրանք ու միս էր...
 Սիրտ, չկայ, չկայ հոգեկան մի սէր:

Կուզես փոթորկւիր, կուզես գազազիր,
 Կնոջ գրկին մէջ լոկ թոյն կայ զազիր...
 Սիրտ, կուզես մեռիր, կուզես գազազիր:
 Ազատ Վշտունի



Կ Ե Ց Ց Է Կ Ե Ա Ն Ք Ը

Գրամա 3 գործողութեամբ

ԳՈՐԾՈՂՈՒԹԻՒՆ Ա.

Ուռնկլեանի առանձնասենեակը՝ մուգ-բորդօ գոյնի պաստառով, ճաշակով զարդարւած: Պատից կախւած նշանաւոր գրողների նկարներ՝ շրջանակներում: Երկու իւղաներկ պէյզաժ: Գրասեղանի վրայ Շէքսպիրի բիւստը: Պահարանի մէջ երևում են փառակազմ գրքերի կողերը: Սենեակը ընդհանրապէս շատ կոկոն հաճելի ապաւորութիւն է թուշում: Մուտքը աջից: Դիմացի դուռը տանում է ննջօրան: Զօխ՝երկու պատուհան, որոնք նսյում են դէպի փողոց: Ն՝ջարանի ձախ կողմում կա մի: Առաւօտեան ժամը 11-ին մօտ:

Վարագոյրը բացելիս Ուռնկլեանը նստած գրասեղանի առաջ լրագիր է կարդում: Կամինի մօտ՝ ճօճաթոփի մէջ ընկղմած ընթերցանութեան մէջ նստած է Շահումեանը: Մի քաւի վայրկեան լուռութիւն:

ՈՒՌՆԵԿԼԵԱՆ.—Առողջ, գեղեցիկ դէմքով 45-ի մօտ: Պէնսնէի տակից երևում են Նրա խոշոր ու սև ս չքերը. քունքի մազերը սկսել են ճերմակել: Նա շուտ-շուտ ցնցում է գլուխը և ետ ձգում ճակատին թափւած մազերը, որ չխաղաքի. բացի սյդ՝ նա ինչ որ գեղեցկութիւն է տեսնւմ գլխի սյդ շարժման մէջ: Հագնւած է ճաշակով:

ՇԱՀՈՒՄԵԱՆ.—36 տարեկան: Հագնւած է պարզ ու մաքուր: Նիհար է. մի փոքր հաստ շրթունքներն ու կալճատես աչքերը չեն խաղաքում դէմքի գրաւիչ և հետաքրքիր լինելուն: Յանկարծ դադարում է ճօճել ու ոտքի է էլնում:

ՈՒՌՆԵԿԼԵԱՆ.—(Գլուխը մի վայրկեան քարձոսացնելով) Դէ... Ի՞նչ կասես:

ՇԱՀ.—Տաղանդաւոր բան է:

ՈՒՌՆԵԿԼ.—(Թեթեւ հեզնանքով) Այդպէս մի անգամից: Դու, ըստ սովորութեան, կարծեմ էլի չափազանցնում ես:

ՇԱՀ.—Գուցէ: Ես չեմ պնդում, որ նա անթերի մի բան է, բայց շնորհքը անպայման է: Մեր թատրոնական գրականութիւնը ոտք է դնում իր իսկական, ուղիղ ճանապարհի վրայ:

ՈՒՌԵԿԿԼ. — Ճաշակի խնդիրներում չեն վիճում:

ՇԱՀ. — Ոչ, սա արդէն ճաշակի խնդիր չէ: Ես գիտեմ. ձեզ վախեցնում է ամեն մի նորութիւն... Բայց բաւական է, մի քիչ աւելի լայն սիրտ ունեցէք: Ես չեմ հաւատում, որ դուք իսկապէս չէք հաւանել. ոչ, մի ներքին վախ ձեզ ստիպել է փակել ձեր աչքերը: Դու հոտառութիւնից զուրկ չես և չէիր կարող չնկատել, որ մի ինչ-որ նոր, թարմ բան կայ նրա մէջ, որ արժէր խրախուսել հեղինակին, բայց ոչ, մերժել էք, որովհետև նեղ սիրտ մարդիք էք, չէք ուզում խոստովանել, որ ձեր երգը երգւած է, որ ինչ կաք, այն էլ կը մնաք: Ձեզանից բան դուրս չեկաւ:

ՈՒՌԵԿԿԼ. — Ես ուղղակի ապշած եմ. դու յիմար չես, բայց առանց կարմրելու կարողանում ես այդպիսի յիմարութիւններ դուրս տալ:

ՇԱՀ. — Ինչպէս երևում է՝ ինձ լաւ չես ճանաչում. յիմար եմ. Թողէք այդ նեղսրտութունը: Դիմաւորե՛նք գրկաբաց, որպէս զի գոնէ նրանք կարողանան լայն տարածել իրենց թեւերը և կուչ չգան անկիւններում: Դուք այլևս ոչինչ չունիք ասելու: Առանց վախի, որ կը նսեմանաք, լսենք թէ ինչ են ասելու սրանք:

ՈՒՌԵԿԿԼ. — Վախ... Կարծեմ դու սկսում ես ինձ մեղադրել, որ ես նախանձում եմ այդ Սարումեանին: Դու չափազանց վատ կարծիքի ես իմ մասին: Ինձ զարմացնում է քո այդ ինքնահաւան տոնը. կարծես Սինա լեռան բարձունքներից ես խօսում մեզ, միջատներիս հետ, կարծես ինչ-որ անհերքելի պատգամներ ես բերել քեզ հետ արտասահմանից: Եթէ մենք, ինչպէս դու ես ասում, վախենում ենք ամեն մի նորութիւնից, դու էլ տարւում ես ամեն մի նորութեամբ: Վերցնենք հենց այս պիէսը (Վերցնում է ու կրկին ձգում սեղանի վրայ). ինչն է քեզ այնպէս նոր, տաղանդաւոր թւացել, որը մենք չենք հասկացել: Դու տեսար մի նորութիւն և այն բոլորը, ինչ առաջ տաղանդաւոր ես համարել, ոչնչացան, անտաղանդ դարձան և միայն սա մնաց, և ոգևորութիւնդ հասնում է անհեթեթութեան...

ՇԱՀ. — Ընդհանրապէս ես չեմ հասկանում, ինչ է նշանակում առաջ... Շատ յիմարութիւններ եմ ասել ու գրել առաջ. դա դեռ չի նշանակում, թէ պէտք է պինդ-պինդ բռնեմ այդ յիմարութիւնների փէշերից, որովհետև մի ժամանակ ասել եմ:

Դեռ դպրոցական նստարանի վրայ էի, որ ուէցէնզիաներ էի գրում, հասկանում էի, չէի հասկանում՝ այդ միևնույն էր. առանց կարմրելու կրկնում էի այն, ինչ լսում էի. ով որ տաղանդաւոր էր ճանաչւած, նրան էլ ես տաղանդաւոր էի համարում: Բայց այժմ մեծացել եմ, աչքերս բացւել են. պէտք է ամեն մէկին իր տեղը տալ: Նայիր մեր շուրջը, սովքեր են առաջ անցել. նրանք, որոնք գտել են յաջողութեան կարճ ճանապարհը: Այժմ ես անխնայ կը ջախջախեմ այն ամենը, ինչ արհեստական միջոցով է բարձրացել. պէտք է մաքրել մեր կեանքը այդ ուէկլամի հերոսներից. պէտք է մի քիչ թարմացնել ճահիճը:

ՈՒՌԵԿԼ. — Արդեօք չափազանց ծանր բեռ չե՞ս առնում ուսերիդ: Տես, որ կէս ճանապարհին չմնաս:

ՇԱՀ. — Իմ ընկած տեղից կը գտնւի մի ուրիշը, որ կը շարունակի առաջ տանել այդ բեռը...

ՈՒՌԵԿԼ. — Թողնենք այս խօսակցութիւնը: Մենք սկսել ենք իրար չհասկանալ: (Մտնելով է պատուհանին): Արտասահմանն էլ քեզ մարդ չդարձրեց, միշտ նոյն ֆանտազիաները, միշտ նոյն ոգևորւողը... (Նայում է պատուհանից դուրս):

ՇԱՀ. — (Մի քիչ լռութիւնից յետոյ) Քեզ մօտ մարդ է գալու:

ՈՒՌԵԿԼ. — Այո:

ՇԱՀ. — Մի բաժակ սուրճ տուր և ես կերթամ, իսկ եթէ շուտ գայ, սուրճ էլ չեմ խմի:

ՈՒՌԵԿԼ. — Դու մեզ չես խանգարի:

ՇԱՀ. — Ով գիտէ: Թերևս աւելորդ լինեմ:

ՈՒՌԵԿԼ. — (Անցնում է խորքը, բենզին է լցնում բենզինկայի մէջ, վառում է ու սրճամանը դնում կրակի վրայ: Զանգ):

ՇԱՀ. — Նա է:

ՈՒՌԵԿԼ. — Երեի:

ՇԱՀ. — Ինչպէս երևում է ստիպւած կը լինեմ կաֆէ գնալ:

ՈՒՌԵԿԼ. — Յիմարութիւն...

ԼԻԶԱ. — (Դուռը քաղխում է) Կարելի է:

ՈՒՌԵԿԼ. — Ի հարկէ: (Մի քանի քայլ ընդառաջ):

ԼԻԶԱ. — (25-ի Տօտ: Գիղցիկ, նիհար. լաւ կազմւածքով: Հագնւած է մեծ ճաշակով: Լայնեզր գլխարկ): Ես երևի ձեզ խանգարեցի... Բարև:

ՇԱՀ. — Մենք սկսել էինք ձանձրանալ, սպասում եմ մի բաժակ սուրճի ու պիտի գնամ:

ԼԻԶԱ. — Շուտով այստեղ է գալու Լուսիկը:

ՇԱՀ. — Օ... Այդ դէպքում ինձ թոյլ տւեք սպասել նրան այստեղ...

ԼԻԶԱ. — Բայց ո՞վ է ձեզ դուրս անում այստեղից:

ՇԱՀ. — Մի՞թէ կարիք կայ, որ ասեն՝ «Դու այստեղ աւելորդ ես». այդ ամեն մարդ ինքը պէտք է հասկանայ:

ԼԻԶԱ. — (Կատակով սպաննում է մատով): Պարոն Շահումեան: (Դառնալով Ուտեկեանին): Ես եկել եմ ձեզ մի լաւ յանդիմանելու:

ՈՒՌԵԿԷԼ. — (Ժպտալով) Սկսենք:

ԼԻԶԱ. — Ես կատակ չեմ անում:

ՈՒՌԵԿԷԼ. — Օ, ես գիտեմ, որ դուք կատակներ չէք սիրում: (Մտնեցել է եւ օգնում է նրան վերարկուն հանելու: Կամիսց) Ես վախենում էի, որ դուք իսկապէս կը կատարէք ձեր խօսքը...

ԼԻԶԱ. — Եւ չեմ գո՞յ... Ես դեռ կարծեմ սիրում եմ ձեզ:

ՈՒՌԵԿԷԼ. — Դեռ...

ԼԻԶԱ. — Ինչո՞ւ երէկ չեկաք:

ՈՒՌԵԿԷԼ. — Դուք առանց ինձ էլ բաւականաչափ երես էք տալիս այդ պարոնին: Շահումեանը գտնում է, որ նա միակ տաղանդաւոր մարդն է մեր գրականութեան մէջ:

ՇԱՀ. — Ես այդպիսի բան չեմ ասել: Բայց որ տաղանդաւոր է, ասել եմ:

ԼԻԶԱ. — Ճշմարիտ չէ... Ա՛յ, երեկ ես կարդացի՞ նրա մի պատմւածքը. մի փոքրիկ բան է, բայց ինչքան շատ բան է կարողացել ասել: Հերոսը մի երիտասարդ է. բոլոր տւեալները կան տաղանդաւոր լինելու, բայց նա չի հաշտւում ոչ կեանքի հետ, ոչ ինքն իր հետ: Միջավայրը նրան սառտիկ նեղ է թւում. նա ուզում է կամ բոլորը, կամ ոչինչ, և որովհետեւ համողւած է, որ այդ միջավայրը նրան չի թողնի հասնելու գազաթնակէտին, աւելի լաւ է համարում մեռնել և սպանում է իրեն, որ կարողանայ հոգարտ (մեռնել) որ ստիպւած չլինի ցածանալ մինչև այդ շրջապատը, որտեղ միջակութիւնից այն կողմ ոչ ոք չի անցել:

ՈՒՌԵԿԷԼ. — (Սեղանի վրայից վերցնում է ձեռագիրը) Ահա այդ տաղանդաւոր մարդու մի ուրիշ գործը. Շահումեանը հիա-

ցած է: Նա գտնուում է, որ ինչ մինչև այժմ լոյս են տեսել, յիմար և անշնորհք բաներ են: Մենք քիչ առաջ նրա մասին էինք խօսում:

ԼԻԶԱ.— Շատ հետաքրքրական մարդ է. դու անպատճառ պէտք է ծանօթանաս նրա հետ:

ՌԻՌԵԿԼ.— Յոյս ունեմ դեռ այստեղ է և ոչ մի տեղ չի գնում այդ շատ հետաքրքրական մարդը. չենք ուշանայ:

ՇԱՀ.— (Մի գիրք էր թերթում. թողնում է գիրքը) Ձեր սուրճն էլ ուշացաւ, նա էլ. ես գնացի:

ԼԻԶԱ.— Նա ուր որ է, կը գայ:

ՌԻՌԵԿԼ.— Ձուրն իսկոյն կեռայ: (Մօտենում է խորքի սեղանին):

ՇԱՀ.— Երբ նա գայ, ասացէք, որ սպասեցի, սպասեցի և գնացի: Նա ինձանից վերցրել է Մարքսի «Կապիտալը», թող անպատճառ այսօր բերի. հարկաւոր է:

ԼԻԶԱ.— Կարծեմ դա շատ հին պատմութիւն է:

ՇԱՀ.— Այո, վաղուց է, երէկ էլ յիշեցրի:

ԼԻԶԱ.— Բայց սպասիր, նրա ձեռքին կարծեմ մի շատ հաստ գիրք կար:

ՌԻՌԵԿԼ.— Ձարմանում եմ. ախր ինչ կնոջ կարդալու բան է. Մարքս ու կին: Այդ յիմար թէօրիաները հազիւ թէ մտնեն Լիւսիի փոքրիկ սիրուն գլուխը:

ԼԻԶԱ.— Այո, ինչպէս կարող ենք հասկանալ:

ՌԻՌ.— Դուք բարկացա՞ք:

ԼԻԶԱ.— Ամենեին:

ՌԻՌ.— Այո, մի քիչ... խոստովանեցէք: Ես սիրում եմ, երբ դուք բարկանում էք:

ԼԻԶԱ.— Եւ միշտ աշխատում էք բարկացնել:

ՌԻՌ.— Ոչ, երբեմն... (Հանգ):

ԼԻԶԱ.— Նա է... Օ՛յ, ջուրը եռում է. հանգցնե՛մ:

(Հանգցնում է):

ԼՈՒՍԻԿ.— (Դրան ևտելից) Կարելի է:

ՌԻՌ.— Ի հարկէ:

ԼԻԶԱ.— Մտիր, մտիր: Այստեղ քեզ անհամբեր սպասում են:

ԼՈՒՍԻԿ.— Ուրախ, աշխոյժ, վարդագոյն այտերով ու փայլուն աչքերով. մօտ 22 տարեկան, հագնւած է ճշակով: Բարև: Օհօ... Դ՞ուք էլ այստեղ էք:

ԼՈՒՍԻԿ.— Առէք ձեր գիրքը. հոգիս դուրս եկաւ մինչև տեղ հասցրի:

ՇԱՀ. Ի հարկէ՛ չկարդացած:

ԼՈՒՍԻԿ. — Այդ ինչո՞ւ:

ԼԻԶԱ.— Սա էր բամբաստում, որ դու ի հարկէ չես էլ մտածում կարդալ, որ այդ յիմար թէօրիաները քո սիրուն գլուխը չի մտնի և աւելացնում էր, թէ առհասարակ ի՞նչ կնոջ կարդալու բան է: Մարքս՝ ու կին...:

ԼՈՒՍԻԿ.— Այո, նա գտնում է, որ կինը ինչքան յիմար է, այնքան աւելի գրաւիչ է:

ՈՒՌ.— Հա՛, հա՛, հա՛... Օրիորդները ինձանից լուրջ նեղացել են: Բայց դուք միք աղաւաղի իմ ասածի իմաստը: Ես ասում եմ՝ «Կինը պիտի մնայ կին, այն ինկոգնիտօն, որ մենք...»

ԼՈՒՍԻԿ.— Լսել ենք, հազար անգամ լսել ենք. անցեալ օրն էլ Սաֆարեանի հետ էինք վիճում: Աւելի լաւ է սուրճ տէք... Կայ... (Մօտենում է խոռքի սեղանին):

ՈՒՌ.— Իսկապէս, բոլորովին մոռացանք:

ԼՈՒՍԻԿ.— Դուք էլ չէք խմել:

ՇԱՀ.— Դեռ ոչ. ես մի քիչ էլ կը մնամ և մի բաժակ սուրճ կը խմեմ:

ԼՈՒՍԻԿ.— Դուք ուզո՞ւմ էիք գնալ:

ՇԱՀ.— Այո, բայց դուք եկաք և ես մնում եմ:

ԼՈՒՍԻԿ.— Խնդրեմ առանց հաճոյախօսութիւնների. այդ ձեզ չի սազում: Նստեցէք. ես ձեզ բոլորիդ համար էլ կը լցնեմ: Այս ի՞նչ է, դեռ սուրճ էլ չի գցած: (Նորից վառում է եւ սկսում սուրճ սլատրաստել) Ամբողջ ճանապարհը գալիս էի և չէի կարողանում ծիծաղս զսպել: Անցորդները երևի յիմար կը կարծէին:

ԼԻԶԱ.— Ի՞նչ է պատահել:

ՈՒՌ.— Երևի մի նոր հաճոյախօսութիւն է լսել մի երկտասարդ պարոնից՝ վարդագոյն այտերի կամ աչքերի մասին: Մենք լսում ենք:

ԼՈՒՍԻԿ.— (Չեռքով քացասական նշան է անում): Ոչ, ոչ, ոչ... Երևակայեցէք գալիս եմ, գլուխս կախ, ինքս էլ չգիտեմ ինչ եմ մտածում. յանկարծ փողոցի անկիւնում առաջս է դուրս գալիս մի երկու ձի լծած օտոմօբիլ... (Ծիծաղում է):

ՇԱՀ.— Լաւ, ի՞նչ թուլանալու բան կայ, երևի կոտրւել է, մի

տեղը փաստել է և այդպէս են տանում... Թէև իսկապէս որ ծիծաղելի է:

ԼՈՒՈՒԿ. — Դուք պէտք է տեսնէիք: Բոլորը կանգնել և ծիծաղում էին քսաներորդ դարու այդ մեծ հրաշքի վրայ... Այո, հեշտ է այդպէս արագ եզրափակել՝ կոտորել է, փչացել է և տանում են ձիերով... Բայց ծիծաղելի է, երբ աչքով տեսնում ես... (Չանգ) Հա՛, ո՞վ կարող է լինել:

ՈՒՌ. — Ո՞վ կարող է լինել. երևի էլի մի գրող է, որ իր դրաման է բերել. հիմա մոզա է. բոլորն էլ դրամաներ են գրում: Չանձրացրին. շուտով. կարծեմ, կը փախչեմ քաղաքից:

ԼՈՒՈՒ. — Ձեր օրինակը վարակիչ է... Օ, դժւար է մեծ մարդ լինել. ամեն մէկը ցանկանում է իմանալ՝ ի՞նչ կասէ Ուռեկլեանը... Պէտք է ներողամիտ լինել:

ՈՒՌ. — Խնդրում եմ առանց իրօնիայի: (Մտնում է աղախինը):

ԱՂՊԽԻՆ. — Մի պարոն ցանկանում է ձեզ տեսնել:

ՈՒՌ. — Ո՞վ է:

ԱՂՊԽԻՆ. — Չգիտեմ. ես նրան երբէք չեմ տեսել:

ՈՒՌ. — Խնդրեցէք: (Աղախինը գնում է. մի քիչ անց մըտնում է Սարումեանը):

ՍԱՐՈՒՄԵԱՆ — (Մօտ 37 տարեկան, հագնւած է հասարակ: Գունատ, նեարդային շարժումներով, թախծոտ աչքերով: Դռներում) Ներեցէք... Կարող եմ տեսնել պարոն Ուռեկլեանին:

ՈՒՌ. — Խնդրեմ:

ԼԻՉՊ. — Պարոն Սարումեան... (Մօտենում է): Որքան ուրախ եմ. սա ի՞նչ գուգադիպութիւն է... Դուք ծանօթ չէք. Գէորգ, ծանօթացիր. պարոն Սարումեան, Ուռեկլեան:

ՍԱՐՈՒՄ. — (Չեղք է տալիս Ուռեկլեանին, Շահումեանին եւ գլխով հեռից Լուսիկին):

ԼԻՉՊ. (Ներկայացնելով) Օրիորդ Բարսամեան:

ՍԱՐ. — (Մի քանի քայլ դէպի Լուսիկը):

ԼՈՒՍ. — Ներեցէք. ես սուրճ եմ պատրաստում և ձեռքերս ազատ չեն... Շատ ուրախ եմ. ես ձեր մասին այնքան շատ եմ լսել...

ՍԱՐ. — Յուսով եմ, բոլորն էլ աննպաստ չեն:

ԼՈՒՍ. — Ընդհակառակը, մեծ մասը նպաստաւոր:

ՍԱՐ.— Չափազանց ներողամիտ մարդիկ են ձեզ իմ մասին պատմողները: (Դառնալով Ուռեկլեանին): Ես եկել եմ ձեզ մօտ մի փոքրիկ գործով:

ՈՒՌ.— (Աթոռ է առաջարկում): Խնդրեմ, ինչո՞վ կարող եմ օգտակար լինել:

ՇԱՀ.— Մենք չե՞նք խանգարի:

ՍԱՐ.— Ոչ, ոչ, գաղտնիքներ չեն, որ պիտի ասեմ պարոն Ուռեկլեանին:

ԼԻՉԱ.— Պարոն Սարուսեան, մինչ դուք կը սկսէք գործի մասին, ասացէք ինձ ռոտեղ ենք մենք հանդիպել. ձեր դէմքը այնքան ծանօթ է թուում:

ՍԱՐ.— Մենք ծանօթ ենք եղել սրանից երեք տարի առաջ... Դուք ինձ ի հարկէ մոռացել էք, իսկ ես մի ընդհանրապես չեմ դադարել ձեզ յիշել:

ԼՈՒՍ.— Դա արդէն սիրոյ խոստովանութիւն է, պարոն Սարուսեան:

ՍԱՐ.— Թէկուզ...

ԼԻՉԱ.— Ռոտեղ:

ՍԱՐ.— Ամարանոցում. այն ժամանակ ես խենթի պէս սիրահարւած էի... Ես պատրաստ էի ձեր մի քմահաճոյքի համար մեռնել, բայց դուք այդ չէիք էլ նկատում: Ես ընդհանրապէս գոյութիւն չունէի ձեզ համար: Ես այդ նկատում էի, գիտէի և լուում էի: Իսկ այժմ այդ բոլորը անցել են և առանց կարմրելու այսքան մարդու մօտ խոստովանւում եմ:

ԼՈՒՍ.— Դ՞նչ էլ սիրահարւած էք եղել Լիզայի վրայ, հա՛, հա՛, հա՛:

ՍԱՐ.— Այո, բայց ինչո՞ւ էք ծիծաղում:

ԼՈՒՍ.— Երջանիկ մարդ է Լիզան. բոլորը սիրահարւում են նրա վրայ. մէկը մինչև անգամ իրեն թունաւորեց, բայց չմեռաւ:

ԼԻՉԱ.— Լուսիկ...

ԼՈՒՍ.— Ի՞նչ, սո՞ւտ է... Իսկ ինձ ոչ ոք չի սիրում, մենակ սա է (ցոյց է տալիս Շահումեանին) մի քիչ սիրահարւած, դրան էլ ես չեմ հաւատում: Արտասահմանում ո՞վ գիտէ քանիսին է գլխից հանել. մի մարդ, որ վեց լեզուով գիտէ խաբել, ինչ կարելի է սպասել նրանից:

ՇԱՀ.— Ուղիղ 12-ը:

ՀՈՒՍ.— Իսկ ինձ հրէական դիւթինը լրացնելու համար է սիրում: Դա ի՞նչ սէր է. այնպէս չէ՞ պարոն Սարումեան... Երեք գդալ բաւական է... Դէ լաւ, սա էլ թող աւել լինի (Մի գդալ սուրճ էլ է զգում):

ՈՒՌ.— (Ժպտալով): Պարոն Սարումեան, ինչո՞վ կարող եմ օգտակար լինել... Ի՞նչ էրեք երևի եկել էք ձեր պիէսի՞ համար:

ՍԱՐ.— Ես մտայ գրասենեակ, այնտեղ ինձ ասացին, որ ձեզ մօտ են գտնւում պիէսները, որոնք ներկայացւած են ժիւրիին:

ՈՒՌ.— Այո, ինձ մօտ են:

ՍԱՐ.— Կարո՞ղ եմ ետ ստանալ իմը:

ՈՒՌ.— Ի հարկէ: Գիտէք պարոն Սարումեան, իմ կարծիքը ձեր գրւածքի մասին դրական էր, բայց...

ՍԱՐ.— (Ընդհատելով): Խնդրեմ, խնդրեմ, ինձ այդ բոլորովին հարկաւոր չէ գիտենալ, չէ՞ որ դա ձեր ժիւրիի գաղտնիքն է. ինչի՞ս է պէտք, թէ ինչ էք մտածում դուք կամ մի ուրիշը: Իմ գրւածքը հաւանութիւն չի գիտել, խնդրում եմ վերադարձնել:

ՈՒՌ.— (Զոր): Խնդրեմ: (Տալիս է ձեռագիրը):

ՇԱՀ.— Պարոն Սարումեան, գուցէ ձեզ համար անախորժ է, որ առանց ձեր թոյլտուութեան կարդացի ձեր գրւածքը... Բայց ներեցէք անկեղծութեանս, դուք դեռ շատ միամիտ էք: Ժիւրիի մէջ ոչ մի բարեկամ չունիք և յանկարծ մրցանակի էք ներկայացնում ձեր գրւածքը...

ՍԱՐ.— Դուք սխալւում էք: Ես այնքան էլ միամիտ չեմ. բայց ծայրայեղ փողի կարիք ունէի, իսկ այդպիսի դէպքերում մարդ մի քիչ յիմարանում է: Ես միշտ արհամարհել եմ զանազան ժիւրիների կարծիքը և յանկարծ գրւածքս տալիս եմ գնահատութեան. սոսկալի հակասութիւն է, և ինձ ներել չեմ կարողանում: (Դնում է ձեռագիրը ծոցի զրպանը): Ներեցէք, ես ձեզ անհանգստացրի: (Ուզում է գնալ):

ՀՈՒՍ.— Ես ձեզ համար սուրճ եմ պատրաստում:

ՍԱՐ.— Ոչ, շնորհակալ եմ. ես պէտք է գնամ: (Գլխով լուռ քարելում է ու գնում):

ՀՈՒՍ.— Ի՞նչ տարօրինակ մարդ է:

ՈՒՌ.— Մեծամիտ ու անկիրթ... Բայց չարժէ խօսել... Օր. Լուսիկ, սուրճ լցրէք:

ԼՈՒՍ. — Շաքարը շատ:

ՈՒՌ. — Բերէք, ով որքան կուզենայ՝ ինքը կը գցի: (Մի պահ լռութիւն):

ՈՒՌ. — Տէր Աստուած, ինչ յանդուգն են դարձել մարդիկ. գոնէ մի քիչ համեստութիւն. ինչ են իրենց երևակայում:

ՇԱՀ. — Թող Օր. Լուսիկ, ինչ եղաւ:

ԼՈՒՍ. — (Բերում է երկու գաւաթ, մէկը Ուռեկլեանին, միւսը Շահումեանին):

ՈՒՌ. — Իսկ օր. Լիզային:

ԼՈՒՍ. — Մի վախենաք, նրան էլ կը հասնի:

ՇԱՀ. — (Խառնելով սուրճը) Դուք հրաշալի տանտիկին կը լինէք:

ԼՈՒՍ. — Այո, մայրս էլ նոյն կարծիքին է, բայց արդէն պառակել եմ, իսկ ոչ ոք չի ուզում ինձ հետ ամուսնանալ. Երևի կարծում են, որ շատ եմ թեթևասօլիկ և հաւատարիմ չեմ լինի, բայց հաւատացնում եմ՝ ես շատ կը սիրեմ իմ ապագայ ամուսնուն: (Բերում է էյի երկու քաժակ Լիզայի և իրեն համար):

ՈՒՌ. — (Նեարդային է, քայքայ աշխատում է զսպել եւ քննազրօսիկ կերպով ծիծաղում է):

ԼԻԶԱ. — Նորից սկսեց յիմարութիւններ դուրս տալ: Ինչ որ անհասկանալի բան կայ այդ Սարումեանի մէջ...

ՇԱՀ. — Թողէք, տեսնում էք որ այդ նիւթը Ուռեկլեանի նեարդերին է դիպչում:

ՈՒՌ. — (Նեարդային): Շահումեան, գիտես որ կատակդ անտեղի է և յիմար:

ՇԱՀ. — Ես կատակ չեմ անում: Մի ինչ-որ Սարումեան յանդգնում է ձեզ վրայ արհամարհանքով նայել, չընդունել ձեր հեղինակութիւնը: Չէ՞ որ դուք սովոր էք, որ ձեզ շրջապատողների համար ձեր խօսքը սրբութիւն սրբոց լինի... Չէ՞ որ դուք կարող էք մի հարեւածով ոչնչացնել նրանց, որոնք գլուխները բարձր են պահում... Լաւ, լաւ, մի նեարդայնանալ. ես վերջացրի ու գնում եմ: (Խմում է վերջին ումպը եւ ոտի ելնում): Դուք, օր. Լուսիկ, կը մնաք, ես ուրախութեամբ մի պտոյտ կանէի ձեզ հետ:

ԼՈՒՍ. — Սպասեցէք սուրճս վերջացնեմ:

ՇԱՀ. — Լաւ: Միայն շուտ, ոչ այդպիսի փոքրիկ ու մպերով, այլ միանգամից. աեսա՞ք ես ինչ արագ վերջացրի:

ԼՈՒՍ.— (Սկսում է անելի արագ խմել) Դէհ, ես վերջացրի:
(Դնում է երկու դատարկ գաւաթները խորքի սեղանի վրայ եւ
հագնում վերարկուն): Գնանք:

ՇԱՀ.— Տեսուութիւն:

ԼՈՒՍ.— Տեսուութիւն:

ՈՒՌ.— Տեսուութիւն: (Դնում են):

(Նրանց գնալուց յետոյ Լիզան անցել է պատուհանի մօտ եւ
աննպատակ դուրս է նայում: Պատուգա):

ՈՒՌ.— (Մօտենում է նրան, բռնում է ձեռքը եւ լուռ համբուրով):

ԼԻԶԱ.— (Անտարքեր կանգնած է):

ՈՒՌ.— Լիզա, քեզ ի՞նչ է պատահել:

ԼԻԶԱ.— Ի՞նձ. ոչինչ:

ՈՒՌ.— Դու քիչ առաջ ասացիր, որ դեռ սիրում ես. ասա,
մի՞թէ կը գայ ժամանակ, երբ կը դադարես:

ԼԻԶԱ.— Չգիտեմ, ինձ այս բոլորէիս էլ թւում է, որ եկել է
այդ ժամանակը... որ մեր սէրը մի ինքնախաբէութիւն է ե-
ղի:

ՈՒՌ.— Լիզա, լսիր, մի խօսիր այդպէս:

ԼԻԶԱ.— Մի՞թէ սա սէր է: Սէրը կեանքի ոյժն է, որ եր-
կու սիրող էակների առաջ է մղում, այն խթանը, որ հարթել է
տալիս բոլոր խոչընդոտները... Գէորգ, ինձ թւում է, որ ես
այլ ևս չեմ սիրում:

ՈՒՌ.— Լիզա...

ԼԻԶԱ.— Գէորգ, ես այլ ևս չեմ ուզում խաբել ոչ ինքս
ինձ, ոչ քեզ: Ես քեզ երբէք չեմ սիրել:

ՈՒՌ.— (Գունատ, մի քայլ ետ է գնում, քայց ինքն իրեն
զսպելով, ժպտում է), Իսկ ես քեզ միշտ սիրել եմ և կը սիրեմ
մինչև կեանքիս վերջը: (Սեղմում է ձեռքը շրթունքներին: Պատուգա):

ԼԻԶԱ.— (Ընդհատելով լուրթիւնը): Լսիր Գէորգ, դու թոյլ
կը տաս, որ խղճալով սիրեմ քեզ:

ՈՒՌ.— Ոչ:

ԼԻԶԱ.— Ի՞նչ կանէիր, եթէ ես ասէի համաձայն եմ, որով-
հետև խօսք եմ տւել, խղճում եմ: Դու կընդունես այդ ողոր-
մութիւնը:

ՈՒՌ.— Ես անկարող եմ ապրել առանց քեզ:

ԼԻԶԱ.— Դու կը վերցնես այդ շարտած ողորմութիւնը: Դու
թոյլ կը տաս, որ խղճալով սիրեմ քեզ... Ես կարհամարհեմ

այդպիսի սէրը, կատեմ այդ մուրացկանութիւնը... Ես կարող եմ խղճալ նրանց, որոնց ատում, արհամարհում եմ, բայց խղճալով սիրել՝ ոչ, ես չեմ կարող:

ՈՒՌ. — Լիզա, ես քառասուն և հինգ տարեկան եմ. այդ սէրը իմ կեանքի օազիսն է, վերջին փայլուն կէտը, որ տեսնում եմ իմ կեանքի ճանապարհին, իմ հանգիստը:

ԼԻԶԱ. — Ամբողջ կեանքիս ընթացքում ես փնտրել եմ մէկին, որ մի քիչ բարձր կանգնած լինի միւսներից. ինձ երբեմն թւացել է, թէ ահա գտայ. բայց շատ չանցած՝ ես պարզ տեսել եմ, որ դա էլ նոյն խմորից է և նոյն շաբլոնները դրւթում... Ես քեզ սիրեցի...

ՈՒՌ. — Իսկ այժմ, ինչպէս երևում է, իմ գարունն անցել է:

ԼԻԶԱ. — Ես միշտ փնտրել եմ մարդիկ, որոնց գարունը յետոյ պիտի գայ... Առաջ միշտ աշնան օրեր, յետոյ ձմեռ, իսկ վերջը՝ գարուն, և այդ գարունը անթառամ, միշտ հոտաւէտ:

ՈՒՌ. — Մեզ մօտ տաղանդը մի որոշ սահման ունի. երբ անցաւ այդ կարճ ճանապարհը, կանգ է առնում, և էլ ոչ մի քայլ սկսում է ապրել անցեալ փառքով: Մեր միջավայրը չի կարող բարձր տաղանդներ ստեղծել: Իժբախտաբար մի խեղճ, թշուառ, մի բուռը ժողովուրդ ենք, կուլտուրայէս չափազանց ետ մնացած: Վերջ ի վերջոյ ամեն մէկը, որոշ տարիների հասնելուց յետոյ, ստիպւած է հաշտուել միջակութեան հետ:

ԼԻԶԱ. — Ատում եմ քո այդ համոզւած տոնը... Դու խելօք ես, ամեն բան գիտես, բայց վերջ ի վերջոյ ձանձրալի են այդ համոզւած ու խելօք մարդիկ. մի ժողովուրդ, քանի դեռ շնչում է, կարող է տալ իր իսկական տաղանդները:

ՈՒՌ. — Բայց դու մոռանում ես, որ մենք ծերացած ազգ ենք և գնում ենք դէպի «գերեզման»:

ԼԻԶԱ. — Ոչ, ոչ, դա սուտ է: Սա մի անցնող ժամանակ է. կը գայ մի աւելի լաւ, պայծառ շրջան. մի տաղանդ կարող է ցնցել, այս թմրութիւնը ալեկոծել և կեանքը կը սկսի նորից եռ գալ, մտքերը կը պարզւեն և այս զգւելի անտարբերութիւնն էլ կանցնի: Ես հաւատում եմ Շահումեանին. գարունը մօտենում է. դուք այդ չէք նկատում:

ՈՒՌ. — Նա կատարեալ երեխայ է. յիմար չէ, բայց ամեն մի նորութիւնից խելքը թոցնում է, ինչպէս մի պճնասեր կին:

ԼԻԶԱ.— Նա հաւատում է իր ներքին ձայնին. ինչ թելադրում է այդ ձայնը, այն էլ ասում է: Ես զնահատում եմ նրա այդ ոգևորութիւնը, այդ անկեղծութիւնը:

ՈՒՌ.— Բայց երբ պէտք է աւելի մնայուն մտքեր յայտնի. այսօր այս է դուրս տալիս, վաղը մի ուրիշ բան. հօ չի՞ կարելի օրը տասը դաւանանք փոխել:

ԼԻԶԱ.— Այսինքն կանգ առնել, էլ ասա՞ չգնալ: Ինձ թըւում է, որ այդպէս համոզւած մարդիկ ձանձրալի են, չկան որոնումներ: Շահումեանը դրանցից չէ. նա շարունակ որոնումների մէջ է և բնականաբար նրա հայեացքներն էլ ենթարկւում են փոփոխութիւնների:

ՈՒՌ.— Նայած քամին որ կողմից է փչում:

ԼԻԶԱ.— Ո՛չ, նա երբէք չի հետևել քամու ընթացքին. նա ազնիւ է և անկեղծ:

ՈՒՌ.— Դժւար է մարդկանց ձանաչել... Լիզա, կեանքի վրայ պէտք է նայել, ինչպէս որ նա կայ: Մենք բոլորս էլ սովորական մահկանացուներ ենք... Ես վաղուց եմ փշրել իմ վարդագոյն ակնոցները և այժմ կեանքը մերկ կանգնած է իմ առաջ... Սիրենք իրար և այդ սիրոյ մէջ փնտրենք մեր երջանկութիւնը, մեր հանգիստը:

ԼԻԶԱ.— Դու աւելի ես փոքրանում իմ աչքում քո այդ անդրդւելի համոզմունքներով... Երբէք կանգ մի առնիլ, միշտ վեր... Դէպի բարձունքները... Հաւատա...

ՈՒՌ.— Առանց քեզ կտրտւած են իմ թևերը:

ԼԻԶԱ.— Միշտ ուրիշների օգնութեամբ: Մենակ թռիր:

ՈՒՌ.— Միասին, միշտ միասին. ես սիրում, պաշտում եմ քեզ, սիրում եմ...

ԼԻԶԱ.— (Անթարթ նայում է տարածութեան մէջ) Առանց ուրիշների օգնութեան, մենակ, մենակ թռիր...

ՎԱՐԱԳՈՅԸ

ԳՈՐԾՈՂՈՒԹԻՒՆ Բ.

Սարումեանի սե՛ ես կը. սի պատուհանով, էրկրւ դու ո՛՞ ճակատին և ձգիսց: Պատի տակ մահճակալ, պատուհանի մօտ հասարակ սեղան, որը գրասեղանի տեղ է ծօռայում: Մահճակալից քիչ հեռու, պատի տակ, չեմոդան, երեք սթոն, պատից կախւած է լացարան: Պարզ օր է, բայց սենեակում զգացում է լոյսի պակասութիւն: Պատուհանի դէմ

բարձրանում է հարևան բարձր պատը, որը և խանգ օրում է լոյսի ներս թափանցելուն:

Վարագոյրը բացելիս Շահուժեանը նստած է սեղանի մօտ. Սարուժեանը սեղանի միւս կողմը, ձեռքերը ծնկների վրայ, գլուխը կախ՝ ծխում է:

ՇԱՀ.—(Շարունակում է ընդհատուած խօսակցութիւնը) Երջանկութիւնը տափակութիւնների բաժինն է. մեծութիւնը միշտ ապրել է մենակութեան և տանջանքների մէջ:

ՍԱՐ.—Ես նախանձում եմ նրանց, ինչ անուն էլ որ տալու լինես: Կեանքում ապրելու և երջանիկ լինելու համար ուրիշ տեսակի մարդ պէտք էր ծնւել:

ՇԱՀ.—Սյսինքն կարողանալ բոլորին ժպտալ, խմբագրութիւնից խմբագրութիւն վազվզել:

ՍԱՐ.—Եւ այդ, և ուրիշ շատ բան: Յաջողութիւնն էլ ունի իր գաղտնիքը: Եթէ յոյսդ դնես քո ընդունակութիւնների վրայ, այն ժամանակ պէտք է տասնեակ տարիներ ապրես, երիտասարդ՝ ամենալաւ տարիներդ մաշես զրկանքների մէջ, մինչև մարդիկ կը տեսնեն:

ՇԱՀ.—Վերջ ի վերջոյ կը տեսնեն, չեն կարող չտեսնել:

ՍԱՐ.—Բայց արդէն ճերմակած կը լինես: Ամեն բան լաւ է իր ժամանակին: Իմ կեանքս անցել է անգոյն, զրկանքների մէջ, շարունակ մտածել եմ՝ մի կտոր հացի համար: Գրակահոլութիւնը ինձ համար եղել է երկրորդական բան. հաց պէտք էր աշխատել, և ես քարշ եմ տւել իմ կեանքը, իսկ այժմ ձանձրացել եմ, յոգնել. յոգնել եմ դեռ կեանքից բան չհասկացած: Ես այժմ ոչինչ չեմ կարողանում անել. կեանքը բթացրեց, շրջապատը բթացրեց ինձ, իսկ այժմ ուրիշ ոչինչ չի մնում, բացի... Ես ձանձրացել եմ մի կտոր հացի համար ապրելուց, իսկ առանց հացի ոչինչ չի ստեղծւում: Ես արհամարհում եմ Ուռեկեանի նամաններին, բայց նախանձում եմ:

ՇԱՀ.—Նա կը մեռնի՝ երբ կը չորանայ նրան սնունդ տւող ծառը. պարագիտները արմատներ չեն ձգում: Ինչ ողորմելի կեանք է. ապրել ուրիշների սնունդով և մեռնել, երբ մեռնի այդ ուրիշը:

ՍԱՐ.—Բայց տեսել ես այդ պարագիտներին, որոնք իրենց

փոքրիկ ատամներով մեխւում են մի ծառից, ինչպէս թարմ են ու կայտառ: Ինչ անենք, որ յետոյ, երբ կը չորանայ ծառը, նրանք էլ կը մեռնեն: Գոնէ ունեն իրենց լաւ շրջանը: Դա աւելի լաւ է, քան ամբողջ կեանքում երբէք չժպտալ, չունենալ մի պայծառ յիշողութիւն:

ՇԱՀ.— Անմիտ բաներ մի ասի: Եթէ կեանքը մինչև հիմա խորթ մայր է եղել ձեզ համար, այժմ նա ժպտում է ձեզ... Ես արհամարհում եմ այն մարդուն, որը չի կարող համարձակ նայել կեանքի ճակատին, արհամարհել նրա բոլոր խոչընդոտները և յաղթող դուրս գալ կուից. փոքրոգութիւն է յուսահատուել և ցած դնել զէնքերը: Յիշեցէք բոլոր հսկաներին իրենց տանջանքներով: Տանջանքների մէջ մեծացան և կանգնեցրին իրենց արձանը: Տաղանդի առաջ ամեն բան խոնարհել է: Տաղանդը Աստուծոյ օրհնութիւնն է:

ՍԱՐ.— Կեանքը մի մեծ սարդ է, որ երկրագնդի ամեն մի անկիւնում հիւսել է իր ոստայնը և սպասում է որսի. վայ նրան, ով խճճեց այդ ցանցի մէջ: Ինչպէս սարդը ծծում է իր ցանցն ընկած թշուառ միջատին, ես էլ ընկել եմ կեանքի ոստայնը և կը թփրտամ, մինչև վերջին կաթիլ արիւնը դուրս կը գայ երակներիցս և կոչնչանամ. ինձ հետ կոչնչանայ և իմ տաղանդը... (Բարձրանում եւ մօտենում է պատուհանին. մի քանի վայրկեան գլուխը ձեռքերի մէջ, յենւած է պատուհանի փեղկին):

ՇԱՀ.— Դէհ, ամօթ է. չպէտք է այդքան փոքրօգի լինել. պէտք է արհամարհել կեանքի բոլոր այդ փոքրիկ յաջողութեամբ շփացած մարդկանց. պէտք է կուել, պէտք է նայել կեանքի վրայ համարձակ, ուղիղ նրա աչքերին և ոչ թէ նախանձել միջակ մարդկանց փոքրիկ յաջողութիւններին...

ՍԱՐ.— Ես տաղանդով միշտ էլ բարձր եմ եղել Ուռեկլեանից էլ, շատ-շատերից էլ, բայց կեանքը միշտ շոյել է նրանց, իսկ ինձանից երես դարձրել: Իմ հպարտութիւնը թոյլ չէր տալիս անել այն, ինչ նրանք էին անում... Գուցէ ես մեծամիտ եմ, գոռոգ... Ես աւելի շուտ կը մեռցնեմ իմ մէջ ամեն ինչ, քան կը բարձրանամ այն ճանապարհով: Արհամարհանքով երես կը դարձնէի ինքս ինձանից, եթէ հոգուս խորքում զգայի, որ ինձ ուռցրին: Ես չէի ցանկանայ, որ ծափահարեն, իսկ հոգուս խորքում զիտակցէի, որ բոլորը սուտ են, կամ Տարասկօնցի Տարտարէնի պէս ինքս էլ հաւատայի տարածւած ստին: Կը գայ

մի օր. չէ որ վերջ է վերջոյ դու պիտի զգաս քո հոգու դատարկը: Աւելի լաւ է անյայտութեան մէջ սատկել, ինչպէս մի սողուն, քան մի օր զգալ, որ ոչ թէ ընդունակութիւններիդ, այլ բարեկամներիդ ես պարտական:

ՇԱՀ.—Այո, մեր հասարակութիւնը ոչ խելք ունի, ոչ ճաշակ. նա դեռ չգիտէ սեր սպիտակից զանազանել: Նրան շատ բան պէտք է հասկացնել, պէտք է կուլել, տոկալ. եթէ չեն հասկանում՝ կը հասկանան:

ՍԱՐ.—Կեանքը իր երկաթէ ճանկերով սղմում է: Որ ես խոնարհեմ գլուխս, ցածանամ, գիտեմ այն ժամանակ կը շատանան իմ բարեկամները... Ոչ, թող նա ինձ ճմլի իր երկաթէ ճանկերում, թող ես ոչնչանամ, բայց չեմ թեքի գլուխս... Ինձ շատ տաղտկալի է թւում այս կեանքը: Եթէ հնարաւոր լինի հաւաքել բոլորը, ինչ գրել եմ մինչև այժմ, մինչև վերջին օրինակը, որ ինձնից յետոյ ոչ ոք չյիշէր և իմ անունը... Ես ատում եմ մարդկանց, բոլորին, ամեն ինչ... Ես ինձ վաղուց սպանած կը լինէի, բայց ամաչում եմ ինքս ինձանից... Մեռնել արհամարհած, ոչ ոքից չճանաչւած, այդ ինձ սարսափելի էր թւում. ես վախենում էի, որ խղճան ինձ... Ահա ինչն էր արգելում ձեռք բարձրացնել և մի հարւածով ոչնչացնել այս որդի կեանքը... Բայց այժմ ես համարձակ կանեմ այն, ինչ մինչև այսօր դժւարանում էի: (Դուռը քաղխում են):

ՍԱՐ.—Ո՞վ է... Մտէք:

ԼՈՒՍ.—(Դռներում, թեթեւ քարկուծեամբ) Լսիր, դա արդէն անքաղաքավարութիւն է. կէս ժամից աւելի է, որ պատրաստ սպասում եմ... Բարև, պարոն Սարումեան:

ՍԱՐ.—(Լուռ գլխով քարետում է):

ՇԱՀ.—Ներեցէք, խօսքի բռնւեցինք:

ԼՈՒՍ.—Ձեզ թողնեն խօսէք... Շան հացը կը կտրէք:

ՇԱՀ.—Օ՛յ, յօ՛յ, յօ՛յ. ինչ չարացած էք:

ԼՈՒՍ.—Դէհ, վեր կացէք: (Դուռը քաղխում են):

ՍԱՐ.—Ո՞վ է:

ԼԻՉԱ.—(Դռներում) Կարելի՞ է:

ԼՈՒՍ.—Օհօ, Լիզա, այդ սրտեղից դուրս պրծար: Մտիր, ինչո՞ւ ես կանգնել:

ԼԻՉԱ.—(Առաջ գալով) Բարև ձեզ: Ներեցէք պարոն Սարումեան, որ առանց ձեր թոյլտուութեան եկայ. դուք կարծեմ այնքան էլ չէք սիրում հիւրերը...

ՍԱՐ.— Խնդրեմ. ես շատ ուրախ եմ, բայց իմ սենեակը այնքան փոքրիկ է ու խեղճ, որ նա սուլոր չէ ձեզ պէս հիւրերի:

ԼԻԶԱ.— Ուռեկլեանը խնդրեց ձեզ տալ... (Մեկնում է մի փոքրիկ ծրար):

ՍԱՐ.— (Չարմացած) Ի՞նչ բան է:

ԼԻԶԱ.— Կարծեմ տոմսակ:

ՍԱՐ.— (Չընդունելով) Շնորհակալ եմ. նա չափազանց բարի է:

ԼԻԶԱ.— Բայց նա ուզեցել է ձեզ պատուել, պարոն Սարումեան:

ՍԱՐ.— Թէ՞ ողորմութիւն անել: Եթէ ես ուզենամ՝ ինքս կարող եմ գնել:

ԼՈՒՍ.— Ինչ վատն էք պարոն Սարումեան. նա, իբրև արւեստակցի, իր նոր պիէսի ներկայացման տոմսակ է ուղարկում... Դա սիրալիրութիւն է նրա կողմից. դուք իրաւունք չունիք մերժելու:

ՍԱՐ.— (Մի քիչ լուսթիւնից յետոյ) Լաւ, շնորհակալ եմ:

ԼԻԶԱ.— Ձեզ հետ շատ զգոյշ պէտք է լինել: Ձեզ կարելի է վիրաւորել ակամայ, անզիտակցաբար:

ՍԱՐ.— Մանկութիւնից ես անհաշտ եմ, կոպիտ. ես չգիտեմ ձեր այդ նուրբ քաղաքավարական ձևերը:

ԼՈՒՍ.— Մենք ուշանում ենք:

ՇԱՀ.— Գնանք: Դուք տանն էք լինելու: Ես նորից կը գամ... Պէտք է տպարան մտնեմ:

ԼԻԶԱ.— (Սարումեանին) Ես ձեզ շէմ խանգարի:

ՍԱՐ.— Ոչ:

ԼՈՒՍ.— Պարոն Սարումեան, դուք հետաքրքրական մարդ էք. նման չէք, այ, սրանց: (Ցոյց է տալիս Շահումեանին):

ՍԱՐ.— Ծաղրեցէք, ծաղրեցէք...

ԼՈՒՍ.— Սա ծաղր չէ, այլ կոմպլիմենտ (Գնում են: Նըրանց գնալուց յետոյ Սարումեանը կանգնում է պատուհանի մօտ, Լիզան՝ սեղանի մօտ. երկուսն էլ լուռ են եւ կարծես չգիտեն ինչից սկսել):

ՍԱՐ.— (Ընդհատելով լուսթիւնը, մեղաւորի պէս) Եթէ այս պատը չլինէր, սենեակը այսպէս մութ, մռայլ չէր լինի: Առաւօտները չգիտեմ որտեղից մի ճառագայթ գողի պէս մտնում է այստեղ,

մի քանի վայրկեան թրթռում ու նորից գողի պէս դուրս փախ-
չում:

ԼԻԶԱ. — Նա ասաց, որ դուք նման չէք նրանց: Ես էլ
գտնում եմ, որ դուք նման չէք նրանց:

ՍԱՐ. — Չգիտեմ ինչպէս հասկանալ: Դուք սիրում էք նը-
րանց, իսկ եթէ ես նման չեմ նրանց, նշանակում է, չէք սի-
րում ինձ: Շատ ցաւում եմ, որ նման չեմ նրանց:

ԼԻԶԱ. — Նրանց մէջ էլ մենք ընտրում ենք այնպիսիներին,
որոնց կարծում ենք թէ նման չեն նրանց: Կնոջ լեզուով, նը-
ման չլինել ուրիշներին, դա առաւելութիւն է:

ՍԱՐ. — Ես այնպէս վատ եմ հասկանում կանանց լեզուն:

ԼԻԶԱ. — Նա սիրում է այն ամենը, ինչ հազազիւտ է և
օրգինալ՝ սկսած մարդկանցից, մինչև գնդասեղը: (Պատուա):
Պարոն Սարումեան, դուք կը կարդա՞ք ձեր այն պիէսը. Շա-
հումեանը այնքան խօսել է, գովել:

ՍԱՐ. — Ոչ, այլևս ոչ ոք չի կարդայ:

ԼԻԶԱ. — Ես ձեզ չեմ հասկանում:

ՍԱՐ. — Այրել եմ:

ԼԻԶԱ. — Ինչպէս:

ՍԱՐ. — Կամաց-կամաց կտրում եմ ինձ կեանքի հետ կա-
պող թելերը:

ԼԻԶԱ. — Ի հարկէ, դուք կատակ էք անում:

ՍԱՐ. — Այո, ի հարկէ... Բայց չեմ կարդայ: Ես որոշել եմ
կտրել գրիչս, այլևս ոչինչ չգրել... Այսինքն կը գրեմ, ինձ
համար, իմ բաւականութեան համար, իսկ երբ ձանձրացայ,
այդ տրամադրութիւնը անցաւ, կը պատուեմ, կայրեմ, իսկ
մարդկանց հետ ես գործ չունիմ:

ԼԻԶԱ. — Դուք անկեղծ չէք պարոն Սարումեան. դա ի՞նչ
անմիտ աշխատանք է:

ՍԱՐ. — Կեանքը մաշել է նշանակում: Եթէ ես փող ունե-
նայի, կը նետուէի կեանքի հեղեղատի մէջ և թող տանէր, ուր
ուզում է. բայց ես հազիւ եմ օրւայ պարէնս հայթայթում:
Ամեն մարդ մի բանով խաբում է իրեն. ես էլ դրանով կը լըց-
նեմ իմ կեանքի դատարկը:

ԼԻԶԱ. — Պէտք է մաքառել, կուել, տակալ անվերջ: Իսկ
կեանքը ինքը իրեն կը մաշի... Պատմեցէք ինձ ձեր մասին.
ո՞ւր էիք, ի՞նչ էիք անում և այլն և այլն ..

ՍԱՐ. — Տաղտկալի պատմութիւն է:

ԼԻԶԱ. — Ես խնդրում եմ:

ՍԱՐ. — Հինգ տարի նստած էի Մոսկւայում, եղբօրս հաշ-
ւով, պատրաստում էի հասունութեան վկայականի քննու-
թիւն տալու, բայց չտւի, ձանձրացայ. մի քանի տարի էլ ու-
սուցիչ եմ եղել գաւառներում, էլի ձանձրացայ, այս տարի էլ
այստեղ եմ՝ էլի կը ձանձրանամ և այդպէս մինչև կը հնչի
վերջին ժամը... Հա՛, հա՛, հա՛...

ԼԻԶԱ. — (Լռութիւնից յետոյ) Դուք երբեք սիրել էք:

ՍԱՐ. — (Անթարթ նայում է նրան եւ չի պատասխանում):

ԼԻԶԱ. — Սիրել էք:

ՍԱՐ. — Այո... Չեպ:

ԼԻԶԱ. — Ինձ սիրել էք ամառը, ամառանոցում, ոչ աւելի
լուրջ:

ՍԱՐ. — Ես միայն մի անգամ եմ սիրել, այն էլ ամառը:

ԼԻԶԱ. — (Լռութիւնից յետոյ խօսքը փոխելով) Դուք այսօր
կը լինէք թատրոնում, այո՞... Անպատճառ Դուք նստած կը
լինէք ինձ մօտ:

ՍԱՐ. — (Գլխով համաձայնութեան նշան է անում եւ շարու-
նակ անթարթ նայելում է նրան):

ԼԻԶԱ. — Ինչո՞ւ էք այդպէս նայում... Միք նայի:

ՍԱՐ. — Դուք Ուսեկեանի նշանածն էք... Դուք... Դուք...

ԼԻԶԱ. — (Խոսափելով) Ես կարդացի ձեր գրածքները. ա-
ռաջ երբէք չէր ընկել ձեռքս: Չէ՞ որ մենք կարդում, հետա-
քրքրում ենք այն բանով, ինչի մասին թմբուկ են զարկում:

ՍԱՐ. — Այո, ես դժբաղդարար թմբկահար չեմ ունեցել:

ԼԻԶԱ. — Դուք ինչո՞ւ չունիք ձեր երկերի ժողովածուն:

ՍԱՐ. — Որովհետև... Որովհետև, պարզ է. աւելորդ փող չեմ
ունեցել:

ԼԻԶԱ. — Գիտէ՞ք ես ինչու եմ եկել ձեզ մօտ:

ՍԱՐ. — Ուսեկեանն էր ուղարկել:

ԼԻԶԱ. — Ոչ: Բացի այդ՝ ես եկել եմ առաջարկելու տալ
մեզ հրատարակելու ձեր երկերի ժողովածուն: Մենք մի փոք-
րիկ հրատարակչական ընկերութիւն ունենք:

ՍԱՐ. — Ես պէտք է այրեմ բոլորը:

ԼԻԶԱ. — Անմիտ բաներ մի ասէք: Չէ՞ որ յանցանք է թողնել
թափթփւած այս ու այն լրագրում կամ կոպէկանոց դրքերում:

ՍԱՐ. — Այդպէս, մի գրքում, մի հասարակ շքեղ հրատարակութիւն և լուսանկարս... Հո՛, հո՛, հո՛... Եւ հները և նորերը... Ոչ, ոչ, ինչ եմ ասում, երկու, երեք գրքում. նորերը այնքան շատ են:

ԼԻԶԱ. — Այո՛. դուք համաձայն էք:

ՍԱՐ. — (Դատը ծիծաղ) Դուք ձեռք էք մեկնում խեղդողին. դուք ինձ խղճում էք... (Յանկարծ անընտան, ըստ ըր) Հարկաւոր չէ, ուշացել էք... Բոլորդ էլ ուշացել էք, հեռացէք, թողէք ինձ...

ԼԻԶԱ. — (Չարմացած, գունատ, ոտքի է նլնում):

ՍԱՐ. — Ո՛ւր էիք դուք, ուր էիք, երբ ես դեռ ապրում էի, երբ կանչում էի. այլևս ոչ ոք, ոչինչ պէտք չէ. ոչ խրախուսանք, ոչ սէր, ոչինչ, ոչինչ. գնացէք, հեռացէք, դեռ ոչ ոք չի տեսել իմ արցունքները... Ես խեղդեցի, ճմլեցի այն որդը... Կեանքը ուժեղներինն է, իսկ ես պէտք է ոչնչանամ... Ես յաղթեալ եմ ձեզանից:

ԼԻԶԱ. — Պարոն Սարումեան:

ՍԱՐ. — Ես կտրեցի այն օդակը, որ օձի պէս փաթաթւել էր վզովս, խեղդում էր... Ես այրեցի բոլորը... Այժմ ես համարձակ կանեմ այն, ինչ այսքան երկար տարիների ընթացքում վախենում էի: Ես չէի ուզում սատկել ինչպէս մի ճիճու: (Արագ գնում է դէպի վառարանը եւ ըանում) Նայեցէք, բոլորը, ամբողջ կեանքս, ամբողջ կեանքս... (Ընդհատում է այլեւս անկարող խօսելու. մի ըան կարծես խեղդում է կոկորդը):

ԼԻԶԱ. — Դուք ցնորւել էք:

ՍԱՐ. — Ո՛վ էք դուք, ի՞նչ էք ուզում, ինչո՞ւ էք այստեղ:

ԼԻԶԱ. — Պարոն Սարումեան, ուշքի եկէք, հանգստացէք...

ՍԱՐ. — (Ընդ նստած էր, յանկարծ ծիծաղում է) Եւ դուք հաւատացիք... Ես դեռ չեմ խելագարւել: Ճիշտ է, այրել եմ, բայց սևագրութիւնները, ամբողջ մի կոյտ: Երբ այրում էին այդ տարիներով հաւաքեալ թղթի կտորները, ինձ թւաց, թէ իմ կեանքն է այրւում, որ բոցավառւում, կարմրում ու մոխիր է դառնում. ես քիչ մնաց սարսափից ճշայի. ինձ թւաց, թէ ես սխալմամբ, զայրոյթի բոպէին սևագրութիւնների հետ միասին բոլորն էլ կրակն եմ լցրել... Հո՛, հո՛, հո՛... Ծիծաղելի չէ... (Ընդհատելով ինքն իրեն) Այդպէս, թատրոնում նստած կը լինենք միասին և կը նայենք Ուռեկիեանի նոր և մրցանակի արժանացած պիէսը... Դուք շատ էք սիրում նրան:

ԼԻԶԱ.—(Զի պատասխանում):

ՍԱՐ.—Ոչ մի կանացի ձեռք չի շոյել իմ գլուխը, բացի մօրիցս: Երբ ես տանն էի լինում, գիւղում, պառկում էի, գլուխս դնում մօրս գոգին և խնդրում էի, որ շոյի այնքան, մինչև քնեմ... Շոյանքի կարօտը...

ԼԻԶԱ.—Զեր նեարդերը հիւանդ են: Հանդարտէք, մի խօսէք: Նստեցէք, ահա, այստեղ. (Զուր է լցնում) խմեցէք:

ՍԱՐ.—(Խմում է նրա ձեռքից) Շնորհակալ եմ. ինձ թւում է, թէ ես մահամերձ հիւանդ եմ և դուք մի պահապան հրեշտակ էք, որ ուղարկւած էք վերնից և ես, նախ քան յաւիտեան փակեմ աչքերս, գիտակցութեան եմ եկել...

ԼԻԶԱ.—(Շոյում է նրա գլուխը) Այժմ լաւ էք...

ՍԱՐ.—(Բռնում է նրա ձեռքը, թերում գլուխը եւ երկար համարում):

ԼԻԶԱ.—(Անշարժ կանգնած է):

ՍԱՐ.—(Արցունքներից խեղդելով) Իմ երազը... Տարիներիցնորք... Աստուած... Աստուած... Շնորհակալ եմ, շնորհակալ...

ԼԻԶԱ.—Ի՞նչ էք ասում:

ՍԱՐ.—Լուռ: Թող երկար տեէ այս ինքնամոռացումը... Թող անվերջ շարունակի այս երազը... Կեանքիս երազը... Դուք շոյեցիք իմ գլուխը... Եթէ ես այժմ մեռնեմ... Եթէ այսպէս քնած էլ մեռնեմ... Մեռնեմ այս երազի մէջ... Ես ձեզ միշտ սիրել եմ. դուք միակ կինն էք, որի պատկերը, երբէք, երբէք չի հեռացել իմ մտքից... Ինձ միշտ թւացել է, որ լեւ ձեզ կը հանդիպեմ իմ կեանքի ճանապարհին... (Մի քիչ ուրթիւնից յետոյ, կամաց) Ես ձեզ կը խլեմ նրանից:

ԼԻԶԱ.—Ի՞նչ:

ՍԱՐ.—(Աւելի ուժեղ) Ես ձեզ կը խլեմ նրանից... Եւ այն ժամանակ ես կը վերածնւեմ, կապրեմ... Ես ուզում եմ ապրել... Նորից կը սկսեմ. թող կորչի վհատութիւն. ես կը կրոււեմ, ես ճանկերովս կը կորզեմ ինձ հասանելիքը... Ես ուզում եմ ապրել. անցեալը այրւել է... Նոր կեանք կը սկսեմ, նոր, նոր, առողջ, պայծառ մի կեանք...

ԼԻԶԱ.—Այո, այո... Եւ դուք կը տեսնէք ինչ հեշտ կը լինի հարթել կեանքի բոլոր խոչընդոտները... Պէտք է լարել ոյժերը, իսկ տաղանդը կանէ իր անելիքը... Դուք կատակ արիք, չէ՞, ասելով որ այրել էք... Դուք կատակ արիք...

ՍԱՐ.— Այո, ի հարկէ, ես դեռ չեմ խելագարուել... Ամբողջ կեանքը դեռ առաջս է... Ես դեռ ուզում եմ ապրել, ստեղծագործել...

ԼԻԶԱ.— Տւէք ինձ ձեր ձեռքը... Այդպէս... Մի քիչ եռանդ, մի քիչ աշխատանք և կը տեսնէք, որ յաղթանակը ձերն է:

ՍԱՐ.— Դուք հաւատում էք ճակատագրին:

ԼԻԶԱ.— Ոչ:

ՍԱՐ.— Ես հաւատում եմ: (Դուռը բաղխում են):

ՍԱՐ.— Մտէք: (Մտնում են Շահումեանը եւ Լուսիկը):

ԼՈՒՍ.— Նայեցէք ինչ հրաշալի ծաղիկներ են: Կարծես գարուն լինի: (Յրում է օղի մէջ ձեռքի ծաղիկները) Այնպէս դուրեկան ցուրտ է, արև կայ, բայց չի տաքացնում: Այնքան լաւ է շրջել նրա ճառագայթների տակ...

ՇԱՀ.— Ի՞նչ էք տանը նստել... Հրաշալի եղանակ է: Մտայ տպարան, շարում են, մի քանի օրից լոյս կը տեսնի: Քանի գլուխներ են ցնցւելու:

ՍԱՐ.— Ճակատագրից չես փախչի. այդ պոռնիկը ամեն տեղ մեզ հետ է և նա կասէ իր ասելիքը:

ՇԱՀ.— Մարդ իր ձեռքով է փորում ճակատի այդ գիրը:

ՍԱՐ.— Պարոններ, ես արդէն վերջացնում եմ իմ մի նոր դրաման. դա իմ գլուխ գործոցն է լինելու:

ԼՈՒՍ.— Այո, ճշմարիտ, կը կարգաք:

ՍԱՐ.— Ուրախութեամբ, երբ վերջացնեմ, իսկ այժմ խընդրում եմ թողէք ինձ մենակ... Հա՛... Հա՛... Հա՛... Ինչպէս բանաստեղծները ասում են՝ «մուսա եկել է», շուտով պատրաստ կը լինի իմ վերջին դրաման:

ՇԱՀ.— Կը հանդիպենք թատրոնում:

ՍԱՐ.— Այո:

ՇԱՀ.— Կուզես մտնեմ, միասին գնանք:

ՍԱՐ.— Ոչ, դու ինձ կարող ես խանգարել:

ԼՈՒՍ.— Դէ՛... Գնանք, ցտեսութիւն: (Ծիծաղելով) Դուք չմոռանաք, որ մեզ դուրս արիք:

ՍԱՐ.— (Ժպտում է):

ԼԻԶԱ.— (Բռնել է նրա ձեռքը եւ նայում է ուղիղ աչքերին):

ՍԱՐ.— Դուք դեռ կասկածում էք, ի հարկէ, կատակ էր...

Մի քանի օրից օրիորդ Լիզան լինելու է տիկիՈւոսեկն լեան:

ԼՈՒՍ.— Այո, և մենք մի լաւ քէֆ կանենք նրա հարսանիքին:

ՍՍՐ. — Իսկ եթէ չհրաւիրեն:

ԼՈՒՍ. — Խօսք եմ տալիս:

ՍՍՐ. — (Լիզային) Թատրոնսում... Ուսեկլեանը երևի զբաղ-
ւած կը լինի կուլիսներում. մենք նստած կը լինենք իրար
մօտ... Բայց ո՞վ գիտէ. ես ամեն կերպ կաշխատեմ գալ, բայց
եթէ մուսաս չթողնի ինձ, գուցէ չգամ. ո՞վ գիտէ, այնքան ա-
ներես են լինում այդ մուսաները:

ԼՈՒՍԻԿ. — (Բարձր ծիծաղելով) Աներես մուսա:

ՇԱՀ. — Ցտեսութիւն:

ԼԻԶԱ. — Ցտեսութիւն: (Գնում են):

ԼՈՒՍ. — (Դրսից) Պարոն Սարումեան, մի մտրակ պահէք
մօտներդ:

ՍՍՐ. — Ինչո՞ւ:

ԼԻԶԱ. — Որ եթէ ուշացնի ձեզ այդ աներես մուսան, ծե-
ծելով փախցնէք: (Ծիծաղելով հեռանում են):

ՍՍՐ. — (Փակում է դուռը, մօտենում է զբասեղանին, մի վայր-
կեան լուռ կանգնած է զբասեղանի մօտ, ինքն էլ չգիտէ ինչու: Յան-
կարծ ուշքի է գալիս, արագ մօտենում է վառարանին, ընկնում է
մօտիկ աթոռի վրայ եւ լուռ նայում վառարանի ներսը):

ՎԱՐԱԿՈՅՐ

ԳՈՐԾՈՂՈՒԹԻՒՆ Գ.

Լիզայի մօտ: Ընդունարան: Ամեն տեղ նկատում է կիրթ ճաշակ:
Անկիւնում դաշնամուր: Պատերից նկարներ, արձաններ՝ պատերից կախ-
ւած պատուանդանների վրայ:

Վարագոյրը բացելիս սկսում է մթնել: Լիզան նստած դաշնա-
մուրի մօտ մեքենաբար մի ձեռքով ինչ որ նւագում է: Լուսիկը նստած
պատուհանի մօտ կարդում է:

ԼՈՒՍ. — (Մի քանի անգամ նայում է Լիզայի կողմը, բայց ո-
չինչ չի ասում: Համբերութիւնը հատած ընդհատելով ընթերցումը),
Այդ ի՞նչ ես անում:

ԼԻԶԱ. — Հա՛, ինչ:

ԼՈՒՍ. — Այդ ի՞նչ ես անում:

ԼԻԶԱ. — Նւագում եմ:

ԼՈՒՍ. — Արդեօք չի՞ կարելի, որ չնւագես:

ԼԻԶԱ. — (Լուռ բարձրանում է տեղից, մօտենում է զանա-

տրակին եւ կիսապատկում՝ գլուխը ետ ձգած) Այսօր տեսել ես Սարուճեանին:

ԼՈՒՍ. — Ոչ: (Շարունակում է կարդալ):

ԼԻԶԱ. — Նրան չի կարելի մենակ թողնել... Ես ուղղակի վախենում եմ. նա ամեն բանի ընդունակ է... Լուսիկ:

ԼՈՒՍ. — Հա...

ԼԻԶԱ. — Գնա նրա մօտ... Իմացիր ի՞նչ է անում, ինչպէս է:

ԼՈՒՍ. — (Վերջացնելով եւ ծալելով գիրքը) Ոչ ոքի չի ընդունում: Շահումեանը երէկ եղել է նրա մօտ, նոյն իսկ նրան դուռը բաց չի արել... Աշխատում է:

ԼԻԶԱ. — Գիտե՞ս, պէտք է լուրջ մտածել: Նրան լուրջ բժշկութիւն է հարկաւոր: Նեարդերը վերջնականապէս քայքայւած են: Զրկանք, նեղութիւններ, կեանքի վատ պայմանները նրան բոլորովին ուժասպառ են արել: Այժմ՝ նա այնպէս յուսահատւած է, նա կորցրել է հաւատը դէպի մարդիկ, դէպի ինքն իրեն. վախենում է, որ այլևս զրել չի կարող:

ԼՈՒՍ. — Մինչև այժմ նա բարեկամներ չի ունեցել, միշտ մենակ է եղել... Այժմ մենք նրան մենակ չենք թողնի: Շահումեանը ուղղակի հիացած է նրա այն պիէսով, որը պարօն Ուոեկլեանի ժիւրին ոչնչացրել է:

ԼԻԶԱ. — Ես նրան մի քանի անգամ խնդրել եմ, որ կարդայ և ամեն անգամ մերժել է. ասում է այրել է. չգիտեմ՝ լուրջ է, թէ չէ, բայց ես վախենում եմ. նա ընդունակ է նման յիմարութիւնների:

ԼՈՒՍ. — Նա իսկապէս սիրահարւած է եղել քեզանից:

ԼԻԶԱ. — Ինչէ՞ր ես դուրս տալիս: Ամարանոցում երևի մի քանի օր գրաււած է եղել, և այդքան... Ի՞նչի տարի է անցել:

ԼՈՒՍ. — Իսկ եթէ ոչ, եթէ նա այժմ էլ սիրում է:

ԼԻԶԱ. — Յետո՞յ ինչ...

ԼՈՒՍ. — Իսկ դ՞ու՞ր:

ԼԻԶԱ. — Ես ոչ ոքի չեմ սիրում:

ԼՈՒՍ. — Եթէ քո Ուոեկլեանը լսի:

ԼԻԶԱ. — Նա մի քանի անգամ լսել է, իսկ այսօր վերջնականապէս կը կտրւի այդ կապը:

ԼՈՒՍ. — Ինչպէ՞ս:

ԼԻԶԱ.— Ես նրան վաղուց է, որ դադարել եմ սիրել և իսկապէս չգիտեմ էլ սիրել եմ, թէ ինքնախաբէութիւն է եղել իմ այդ սէր կոչւածը:

ԼՈՒՍ.— Ի՞նչպէս. դու կատակ չե՞ս անում:

ԼԻԶԱ.— Ամենեկին: Ես նրան գրել եմ, երևի շուտով կը գայ:

ԼՈՒՍ.— Ես չէի ուզենայ հանդիպել նրան քեզ մօտ:

ԼԻԶԱ.— Դեռ շուտ է: Դէ, ասա, ի՞նչպէս հաւանեցիր Շահումի քննադատութիւնը:

ԼՈՒՍ.— (Ժպտալով) Իսկապէս լաւ է, չէ:

ԼԻԶԱ.— Ես երկու անգամ կարդացի և ամեն անգամ աւելի էի համոզուում, որ ուղիղ է: Գուցէ հնարաւոր լինի շարժել այս ճահիճը, ուր ամեն բան նեխւել է ու մնացել, ուր մարդ շնչարգել է լինում. պէտք է թարմացնել, պէտք է հարւածել անխնայ և Շահումեանը այդ առաջին քայլն անում է:

ԼՈՒՍ.— Երևակայում եմ ինչ վայնասուն են բարձրացնելու նրանք... նրանք ի հարկէ չեն լռի, կը յարձակւեն, ոչ մի բանի առաջ կանգ չառնելով, միայն թէ տապալեն իրենց հակառակորդին:

ԼԻԶԱ.— Թող, թող սկսւի այդ փրկարար պայքարը, թող մարդկանց ուղեղները մի քիչ շարժւեն... Վաղուց ժամանակ է: Պէտք է ամեն մէկին իր բարձին նստացնել:

ԼՈՒՍ.— Ճպուռը թող ճռռայ, շունը թող մռռայ... Ես հը պարտանում եմ, որ Շահումեանը սիրում է ինձ:

ԼԻԶԱ.— Դու կատարեալ իրաւունք ունես. Տես, սիրիք, փայփայիր, նա արժանի է, որ նրան շատ, շատ սիրեն:

ԼՈՒՍ.— Իսկ դու կարծում ես, ես նրան քիչ եմ սիրում: Ես գուցէ չեմ կարողանում այնպէս արտայայտել, ինչպէս ուրիշները, բայց սիրում եմ շատ, և օր օրի վրայ աւելի ու աւելի: Ես հարբածի նման եմ: Նրա ներկայութեամբ այնպէս եմ փոքրանում. ինձ թւում է, թէ ես դեռ փոքրիկ աղջիկ եմ: Առաջ, երբ նոր էի ծանօթացել, այդպէս չէր, ընդհակառակը ուզում էի իշխել, հրամայել, բայց կամաց-կամաց խեղճացայ, ստրկացայ...

ԼԻԶԱ.— Այդպէս է սէրը. մէկն ու մէկը ստրկանում է, կամ դու, կամ նա... (Զանգ):

ԼՈՒՍ.— Նա՞ է:

ԼԻԶԱ.—Երևի:

ԼՈՒՍ.—Ես կերթամ:

ԼԻԶԱ.—Լաւ: Աշխատիր տեսնել Շահումեանին, յետոյ մը-տէք Սարումեանի մօտ և եթէ յաջողի, երեքով միասին եկէք: Քանի օր է, ես նրան չեմ տեսել:

ԼՈՒՍ.—Լիզա, դու սիրահարուած ես:

ԼԻԶԱ.—Յիմարութիւններ ես ասում... Ես գնահատում եմ նրա ընդունակութիւնները և վախենում, որ ուշացել ենք: Վախենում եմ, որ կեանքը նրան բոլորովին ճմլել է: (Դուռը բաղխում են) Մտէք:

ՈՒՌ.— (Դռներում) Օր. Լուսիկ, բարև: Դուք գնում էք:

ԼՈՒՍ.—Ինձ կը ներէք... Ես ժամադիր եմ... Չկարծէք, որ ձեզանից եմ վախչում:

ՈՒՌ.—Դուք առիթ չունիք ինձնից վախչելու:

ԼՈՒՍ.—Դէ, ի հարկէ: Այնպէս չէ: Ցտեսութիւն (Գնում է):

ՈՒՌ.—(Համբարում է ձեռքը եւ անանց ձեռքը բաց թողնելու նայում է նրան):

ԼԻԶԱ.—(Ոչ կողիտ կերպով խլում է ձեռքը եւ վստում է ելք-տրական լոյսը):

ՈՒՌ.—Ի՛նչացու է:

ԼԻԶԱ.—Արդէն մուտ է: (Մօտենում է սեղանին, որի վրայ դրած է ամսագրի 1-ին համարը եւ նստում) Խնդրեմ:

ՈՒՌ.—(Մօտենում է, քայց չի նստում) Ինձ կանչել ես:

ԼԻԶԱ.—Խօսելու բան ունիմ:

ՈՒՌ.—Բայց ի՛նչ է պատահել, ինչո՞ւ ես այդպէս մռայլ:

ԼԻԶԱ.—Դատարկ բան, ոչինչ էլ չի պատահել, տրամադրութիւնս մի քիչ լաւ չէ:

ՈՒՌ.—Առհասարակ ի՛նչ է կատարւում քեզ հետ՝ չգիտեմ, չեմ հասկանում, դու բոլորովին փոխւել ես:

ԼԻԶԱ.—(Ցոյց տալով ամսագիրը) Կարդացի՛ր:

ՈՒՌ.—Աչքի եմ անցրել:

ԼԻԶԱ.—Իսկ Շահումեանի քննադատութիւնը:

ՈՒՌ.—Աւելի լաւ է չխօսենք այդ մասին: Վաղը կը լինի իմ և ուրիշ յօդւածներ, թէ Շահումեանի և թէ առհասարակ ամսագրի մասին:

ԼԻԶԱ.—Երևակայում եմ, թէ ինչ կատարի յօդւածներ...

ՈՒՌ.—Գիտես, ուղղակի աններելի է Շահումեանի այդչափ թեթևամտութիւնը: Նա կարծում է մի հարւածով կարող

է ոչնչացնել ամեն բան, այն ինչ տարիներով է կառուցւած՝ մի օրում չեն քանդոււմ: Աւելի լաւ է թողնենք, խօսենք ուրիշ բանից...

ԼԻԶԱ.— Լաւ, չխօսենք:

ՈՒՌ.— (Բիշ լոռիթիւնից յետոյ) Անկեղծ եղիք Լիզա և ասա՛ ինչ է պատահել քեզ, գուցէ դու այդ չես նկատում. բայց քեզ դժւար է ճանաչել:

ԼԻԶԱ.— Այո, այսօր ես միանգամայն անկեղծ կը լինեմ:

ՈՒՌ.— Այդպէս չէր առաջ: Երբ խաղում էին իմ մի պիէսը, դու ինձանից աւելի էիր յուզուում, իսկ այն օրը դու ոչ մի անգամ չհետաքրքրւեցիր, չանցար կուլիսները. ճշմարիտ դա ինձ այնպէս վիրաւորեց: Անկարելի է, որ դա իր պատճառները չունենայ:

ԼԻԶԱ.— Անկեղծ... Գիտե՞ս, ինձ դուր չեկաւ և աւելորդ համարեցի գալ ու երեսիդ ասել՝ «ինձ դուր չեկաւ»: Ինձ թւում է, որ դա նորութիւնն չէ, որ արդէն մի անգամ տեսել եմ, դա կրկնութիւն է քո նախկին գրւածքների: Դու սկսել ես ինքդ քեզանից գողանալ. դա լաւ չէ, դա սնանկութեան վերջին կէտն է...

ՈՒՌ.— Այո՞:

ԼԻԶԱ.— Այո: Ես կամաց-կամաց համոզուում եմ, որ դու արդարացի էիր, ասելով որ «մեզ մօտ տաղանդը մի որոշ տեղ ունի գնալու, յետոյ կանգ է առնում և էլ ոչ մի քայլ սկսում է ապրել անցեալ փառքով»... Եւրոպայում 40—45 տարեկան հասակում են մարդիկ սկսում իրենց իսկական տաղանդի արտադրութիւնները տալ, իսկ մեզ մօտ 40 տարեկան արդէն ձերանում են, սպառւում...

ՈՒՌ.— (Վհրաւորւած) Դէ, ինչ արած, Աստուծոյ տւածից, մարդ իր ուսերից վեր չի կարող թռչել... Բայց հասարակութիւնը գո՞հ մնաց:

ԼԻԶԱ.— Հասարակութիւնը... Հասարակութիւնը արդէն պատրաստ էր ծափահարելու: Զուր չէին բարեկամներդ չորս ամիս թմբուկ զարկում:

ՈՒՌ.— Հասարակութիւնն ունի իր աչքերը, գլուխը, նա ոչխարի հօտ չէ, որ ուր ուզէք քշէք:

ԼԻԶԱ.— Իժբաղդաբար նա ոչխարի հօտ է, և տեսնում է ձեր աչքերով: Դուք այդ լաւ գիտէք:

ՈՒՌ. — (Կծու) Իսկ ի՞նչ էր ասում Սարուսեանը. նա շարունակ քեզ հետ էր. երևի նոյնը՝ ինչ դու:

ԼԻՉԱ. — Ոչ, աւելի վատ: Նա չկարողացաւ մինչև վերջը նստել: Երբորդ գործողութիւնից յետոյ, որ այնպէս բուռը կերպով ծափահարում էին քեզ, նա դնաց:

ՈՒՌ. — «Նախանձը մի կանաչ-աչքանի հրէշ է», — ասում է Եագոն: Ի հարկէ, հասկանում եմ...

ԼԻՉԱ. — Նախանձ... Նա նախանձում է քեզ, հա՛, հա՛, հա՛...

ՈՒՌ. — (Վիրաւորած) Լիզա...

ԼՈՒՍ. — Ի՞նչ:

ՈՒՌ. — Դու չես սիրում ինձ... Նոյն իսկ հեզնում ես:

ԼԻՉԱ. — Ես արդէն մի քանի անգամ ասել եմ և էլի կըրկնում եմ՝ ապարդիւն կը լինի խօսել դրա մասին. դա անդառնալի է: Այսօր ես կանչել եմ քեզ, որ վերջնականապէս պարզենք մեր յարաբերութիւնները: Կարիք չկայ ձգձգել:

ՈՒՌ. — Դու անգութ ես Լիզա... Ասա՛, որ կատակ ես անում:

ԼԻՉԱ. — Ես միանգամայն լուրջ եմ ասում:

ՈՒՌ. — Բայց ի՞նչու, ի՞նչ է պատահել:

ԼԻՉԱ. — Հաւատայ, որ ոչինչ չի պատահել: Ես երկար մըտածել եմ, քրքրել եմ հոգուս խորքերը և այնտեղ ոչ մի կայծ, սիրոյ ոչ մի նշոյլ... Ես այնքան անտարբեր եմ դէպի քեզ. քո ներկայութիւնը ինձ չի յուզում: Այլևս չեմ սիրում, և այդքան: Նոյն իսկ չգիտեմ, արդեօք սէր էր այն, ինչ ես զգում էի. թող լինի սէր, սիրել եմ բայց էլ չեմ սիրում... Առանց մեծ-մեծ խօսքերի կը բաժանուենք և կը մնանք բարեկամներ: Եւ ինչ լաւ է, որ այսպէս վերջացաւ, քանի դեռ ուշ չէ:

ՈՒՌ. — Իսկ եթէ մենք արդէն ամուսնացած լինէ՞ինք...

ԼԻՉԱ. — Աւելի վատ՝ թէ քեզ, և թէ մանաւանդ ինձ համար: Ես այն ժամանակ էլ կասէի՝ Գէորգ, ես դադարել եմ քեզ սիրել:

ՈՒՌ. — Բայց ինչո՞ւ... Ի՞նչ է իմ յանցանքը:

ԼԻՉԱ. — Ախ, ի՞նչ յանցանք... Դու դարձեալ նոյնն ես, ես էլ չեմ փոխուել, բայց իմ զգացմունքները փոխուել են:

ՈՒՌ. — Անկարելի է, որ առանց մի պատճառի, առանց ոչ մի դրդող պատճառի...

ԼԻՉԱ. — Այն օրը երբ ես ասացի սիրում եմ, դու ինձ չհարցրիր՝ ինչո՞ւ... Ինչո՞ւ սիրեցի՞ չգիտեմ, ինչո՞ւ չեմ սիրում, նոյնպէս չգիտեմ:

ՈՒՌ.— Մենք գիմնագիտնի աշակերտներ չենք, Լիզա, մենք պէտք է կարողանանք մեզ հաշիւ տալ մեր իւրաքանչիւր քայլի համար:

ԼԻԶԱ.— Այ, հենց այդ ես չեմ կարող, որովհետև ինքս էլ չգիտեմ թէ ինչու չեմ սիրում:

ՈՒՌ.— Դա շատ անգուժ վերաբերմունք է: Ես շնչել եմ, շնչում եմ քեզանով, առանց քեզ կեանքը կը կորցնի իր արժէքը... Ես... Ես... Չգիտեմ... Ինչպէս կարող եմ բաժանուել, չտեսնել...

ԼԻԶԱ.— Այ, արդէն... Ես ասացի, որ մեծ-մեծ, փքուն խօսքեր չասենք. ինչացու են: Ես երեխայ չեմ և նախ քան որոշել քեզ ասելը, շատ եմ տանջուել, մտածել... Եւ եթէ որոշել եմ ասել, նշանակում է այդ որոշումը մի ընդհանրապէս տրամադրութեան արդիւնք չէ, այլ լուրջ մտածած մի քայլ, միանգամայն գիտակցօրէն կատարած: Դու ի հարկէ այնքան անմիտ չես, որ գնաս ու քեզ սպանես... Այդ յիմարութիւնն անելու համար դու չափազանց լուրջ ես, և ծիծաղելի կը լինէր... Կանցնի մի ժամանակ, դու կը սիրես մի ուրիշը և գուցէ աւելի բաղդաւոր լինես քան ինձ հետ: Ինձ հետ միևնոյն է դու բաղդաւոր չէիր կարող լինել: Մենք սկսել ենք իրար այնպէս վատ հասկանալ... Մեկնենք իրար մեր ձեռքը, մնաք բարով ասենք և բաժանուենք իբրև բարեկամներ:

ՈՒՌ.— Լիզա, Լիզա, ես ցնորւում եմ, ինձ թւում է, որ սա մի վատ երազ է... Լիզա, աղաչում եմ մի քանդիր իմ տաճարը, մի խորտակիր իմ տարիների փայփայածը...

ԼԻԶԱ.— Մի թոյլ տաք, որ ես ձեզ խղճամ. դա շատ է ստորացնում մարդու... Ես ձեզ չեմ սիրում...

ՈՒՌ.— Գուցէ սիրում էք մի ուրիշին:

ԼԻԶԱ.— (Մեղմ) Այդ ձեզ չի վերաբերում:

ՈՒՌ.— (Համարեա ծշալով) Գուցէ նրան... Այն ողորմելի անյաջողակին, որն իրեն Աստուած գիտէ թէ ինչ է երևակայում, այդ մանիա-գրանդիօզայով բռնուած ներւատենիկին... Ես նրան կոչնչացնեմ, կը սատկացնեմ. այդ ճիճուն, այդ որդը... Սիրում էք նրան, ասացէք, այո՛, այո՛... Հա՛, հա՛, հա՛...

ԼԻԶԱ.— (Արհամարհական հայեացքով նայում է ուղիղ նրա աչքերին, դանդաղ ըստ ըստում է ու լուռ դիմում աջ, դէպի սեղանատուն):

ՈՒՌ.—Ներիր, ներիր... Ես ինքս էլ չգիտեմ ինչ եմ ասում Լիզա... (Զանգ):

ԼԻԶԱ.—Դուք մուրացիկ էք: Չեմ սիրում մուրացկաններին: (Գնում է):

ՈՒՌ.—(Դանդաղ մտենում է դաշնամուրի մօտ դուստր աթոռին, ընկնում է, գլուխը ձեռների մէջ: Մի քանի վայրկեան մտում է այդ դրութեան մէջ, ասլա, կարծես խոր քնից արթնացածի պէս, ոտքի է ելնում, նայում է շուրջը եւ գիտակցելով, որ այլեւս այդտեղ ոչինչ չունի անելու, արագ դիմում է դէպի ելքի դուռը. դռներում հանդիպում է Սարումեանին: Մի վայրկեան կանգ է առնում՝ չափում նրան ոտից մինչեւ գլուխ) Օրիորդ Լիզայի՞ն էք ուզում, համեցէք, նա իսկոյն կը գայ: (Կծու քրքիջով արագ դուրս է գնում):

ՍԱՐ.—(Նայում է նրա ետեւից):

ԼԻԶԱ.—(Ներս գալով) Պարոն Սարումեան, վերջապէս այս ուր էք կորել:

ՍԱՐ.—(Հուռ նայում է դռներից դուրս եկաւ Ուռեկեանը) Պարոն Ուռեկեանն էր:

ԼԻԶԱ.—Այո:

ՍԱՐ.—Ի՞նչ, գնաց նա:

ԼԻԶԱ.—Նա այլևս ոչինչ չունէր անելու այստեղ: (Բռնում է նրա ձեռքը) Ասացէք, ուր էիք, ի՞նչ էիք անում այս քանի օրս, փակուել էք, ոչ ոքի չէք ընդունում: Գրում էք:

ՍԱՐ.—Նա այնպիսի տարօրինակ աչքերով նայեց ինձ ու ծիծաղեց: Նա ծաղրում է իմ սէրը, իմ խեղճ ու աղքատ սէրը: Նա երևի գիտէ, որ ես ձեզ սիրում եմ և ծաղրում է... Եւ այնպէս վախենում եմ մարդկանցից. ես չեմ սիրում նրանց, բոլոր մարդկանց մէջ միմիայն ձեզ եմ սիրում... Սիրում եմ ձեզ, հա՛, հա՛, հա՛... Ինչ դառը ծաղր, իսկ դուք սիրում էք նրան, սիրում էք մի խլուրդի, մի չեչուտ խլուրդի: Սիրեցէք նրան, շատ սիրեցէք, որ ես կարողանամ ատել ձեզ. դուք դեռ կապում էք ինձ կեանքի հետ, իսկ ես պէտք է կտրեմ բոլոր կապերը, վերջին կապն էլ...

ԼԻԶԱ.—(Նրա ձեռքից բռնած մտենում է, նստում գահատրակի վրայ: Սարումեանը մտում է կանգնած) Նստեցէք: Ասացէք, կարդացի՞ք Շահումեանի քննադատութիւնը:

ՍԱՐ.—Ես վերջացրի իմ վերջին դրաման: Երեք օր է մտածում եմ ինչ վերնագիր դնել: Վերջապէս գտայ:

ԼԻԶԱ.—Այո՞. ի՞նչ է:

ՍԱՐ. — «Կեցցէ կեանքը»:

ԼԻԶԱ. — «Կեցցէ կեանքը»: Դուք խոստացել էք կարդալ: Դէ, երբ...

ՍԱՐ. — Այսօր, վաղը, երբ կուզէք:

ԼԻԶԱ. — Ի հարկէ այսօր. շուտով Շահումեանը և Լուսիկն էլ կը գան: Ես խնդրել եմ նրանց, որ մտնեն ձեզ մօտ, ձեզ էլ վերցնեն:

ՍԱՐ. — Իսկ ես արդէն այստեղ եմ: (Մի քիչ լուռ, ապա յանկարծ ոտքի է ելնում, մի քանի վայրկեան նայում է Լիզային, ուզում է մի քանի ասել, բայց տատանում է: Վճռելով) Վերցրէք այս մատանին յիշատակ, նւէր ինձանից: Սա իմ մօր միակ հարստութիւնն էր: Մահւան մահճում, մի քանի բոպէ մեռնելուց առաջ, հանեց մատից և տւեց ինձ, որ տամ նրան՝ ում սիրեմ: Չնչին բան է... Պատահել է օրերով քաղցած եմ եղել, բայց այս մատանին պահել եմ աչքիս լոյսի պէս: Ահա, վերցրէք, սա ձեզ է պատկանում... Մի մերժէք... Դուք ինձ այնպէս կուրախացնէք... Իմ ինչին է պէտք. եթէ դուք չընդունէք, միևնոյն է, գետը կը նետեմ. ինձ այլևս պէտք չէ... Ծիծաղելի կը լինի եթէ մատս դնեմ. իսկ գրպանում շարունակ վախենում եմ կորցնել... Դուք չէք մերժում... Շնորհակալ եմ, շնորհակալ...

ԼԻԶԱ. — Ուրախութեամբ: Այս մատանին խօսք եմ տալիս երբէք չհանել մատիցս:

ՍԱՐ. — Եթէ Ուռեկկեանը չուզենայ, դժգոհ լինի... Ասացէք... Վերջապէս դուք մի ասէք, թէ ումնից է, և վերջ:

ԼԻԶԱ. — Հանգիստ եղէք, ոչ ոք չի կարող ինձ արգելել անել այն, ինչ ուզում եմ: Ես ոչ ոքի պարտաւոր չեմ հաշիւ տալու իմ արածների համար:

ՍԱՐ. — Ես այնպէս երջանիկ եմ, այնքան երջանիկ, որ քիչ է մնում լամ: Դուք մի ծաղրէք ինձ, ես երբէք ինձ այսպէս բաղդաւոր չեմ զգացել, գուցէ ձեզ համար այդ անհասկանալի լինի... Հասկանում էք, ոչ մի պայծառ յիշողութիւն... Թոյլ տւէք համբուրել ձեր ձեռքը... Ձեր ձեռքը... (Հազիւ զրուպելով իրեն, ընկնում է նրա ստաջ եւ սղմում ձեռքը շրթունքներին. կարծես սթապիւելով) Ներեցէք ինձ, ինքս էլ չգիտեմ ինչ եմ անում... Ես եկել եմ մնաք բարև ասելու...

ԼԻԶԱ. — Դուք գնում էք: Ո՛ւր...

ՍԱՐ.— Ո՞ւր. ինքս էլ չգիտեմ...

ԼԻՉԱ.— Ես ձեզ չեմ թողնի:

ՍԱՐ.— Ես չեմ ուզում տեսնել ձեզ նրա կինը դարձած...

ԼԻՉԱ.— Ես երբէք նրա կինը չեմ լինի: Նա այսօր վերջին անգամս էր այստեղ և էլ երբէք չի գայ:

ՍԱՐ.— Դուք մերժեցի՞ք նրան:

ԼԻՉԱ.— Այո:

ՍԱՐ.— Ինչո՞ւ:

ԼԻՉԱ.— Որովհետև չեմ սիրում:

ՍԱՐ.— Չէ՞ք սիրում... Չէ՞ք սիրում... (Կարծես չհասկանալով):

ԼԻՉԱ.— Չեմ սիրում... Դուք մոռնում էք... Դուք ոչ մի տեղ չպիտի գնաք. այո՛, այո՛. դուք չէք գնայ (Նրա ձեռքերը բռնելով) Դուք չէք գնայ, ես ձեզ չեմ թողնի...

ՍԱՐ.— Օրիորդ Լիզա, օրիորդ Լիզա... (Ոչինչ չի կարողանում ասել):

ԼԻՉԱ.— Եթէ սիրում էք ինձ, դուք ոչ մի տեղ չպետք է գնաք:

ՍԱՐ.— Ձեր ինչի՞ն է պետք իմ սէրը... Դուք գիտեք, որ սիրում եմ... Բայց պետք է գնամ, և որքան կարելի է հեռու... Մի գուցէ մոռանամ: Կամ գոնէ չտեսնեմ ձեզ և մտածեմ, որ դուք չկաք, որ դուք մի երազ էիք, որ ձեզ տեսայ ես երազում և այդ երազը ես մոռանալ չեմ կարողանում ու կը սիրեմ ինչպէս մի երազ... Ինչպէս մի երազ... Դուք ինձ երբէք չէք սիրելու... Արդէն պետք էլ չէ, որ ինձ սիրէք...

ԼԻՉԱ.— Ես սիրում եմ:

ՍԱՐ.— Մի ծաղրէք ինձ, օրիորդ Լիզա, գուցէ յետոյ զըղջաք, որ ծաղրեցիք...

ԼԻՉԱ.— Ինչո՞ւ էք կարծում, որ սա ծաղր է:

ՍԱՐ.— Ինձ, չի կարելի սիրել:

ԼԻՉԱ.— Յիմար, յիմար երեխայ... Իսկ եթէ ես ձեզ սիրում եմ, եթէ սիրում եմ...

ՍԱՐ.— (Կարծես չհասկատալով լսածին) Ի՞նձ, ի՞նձ... Հա՛, հա՛, հա՛...

ԼԻՉԱ.— Ես մերժեցի Ուռեկեանին. ես ազատ եմ... Ես սիրում եմ ձեզ...

ՍԱՐ.— (Գունատ օրօրում է կանգնած տեղը, մազերն է շոյում, խոր քնից սթափուածի պէս) Օր. Լիզա, օր. Լիզա...

ԼԻԶԱ.— Ասացէք, սիրո՞ւմ էք:

ՍԱՐ.— (Լուռ է. միաժամանակ ուզում է ե՛լ ծիծաղել, ե՛լ լալ, ե՛լ ճշալ):

ԼԻԶԱ.— Մի խօսք և ես ձերն եմ... Կամ գուցէ այլևս չէք սիրում... Գուցէ անցել է և այն, ինչ զգացել էք մի ժամանակ, ամարային թեթև մի զգացմունք է եղել...

ՍԱՐ.— Դուք տանջում էք ինձ, դուք չէք կարող երևակայել, թէ ինչպէս էք տանջում... Եթէ դուք գիտենայիք, եթէ դուք գիտենայիք...

ԼԻԶԱ.— Ի՞նչ:

ՍԱՐ.— Ոչինչ, ոչինչ... Թողէք ինձ, ևս խելքս կորցնում եմ... Ես անկարող եմ... (Չկարողանալով շարունակել, ընկնում է աթոռի վրայ եւ հեծկտում):

ԼԻԶԱ.— (Գրկում է նրա գլուխը) Իմ սիրելի, իմ խեղճ մանկիկ. դու կը տեսնես ինչ լաւ է կեանքը, և իմ սէրը մոռացնել կը տայ անցեալ բոլոր դառնութիւնները. դու կը հանգստանաս իմ գրկում: (Համբուրում է գլուխը):

ՍԱՐ.— (Վեր ցատկելով տեղից եւ համարեա ճշալով) Ոչ, ոչ... Ինչէ՞ր էք ասում, ինչո՞ւ էք թմրեցնում իմ միտքը հրաշալի նարկոզով... Եթէ դուք իմանաք, թէ ի՞նչ եմ արել:

ԼԻԶԱ.— (Վախեցած) Ի՞նչ:

ՍԱՐ.— Մի քանի օր առաջ ես ասացի. այրել եմ բոլորը:

ԼԻԶԱ.— Բայց դա կատակ էր:

ՍԱՐ.— Այրել եմ բոլորը: Օր ու գիշեր նստած աշխատում էի վերականգնել այն, ինչ մոխիր է դարձել... Անցեալը, անիծեալ անցեալը մոխիրների միջից կմաղքացած նայում էր և հրհուում իմ բոլոր ճիգերի վրայ: Նա մեկնում է ինձ իր ոսկրացած ձեռքերը, սղմում է կոկորդս. ես շնչարգել եմ լինում, խեղդւում եմ... Ես գլորւում եմ դէպի անդունդը. բոլոր մացառները, դուրս ցցւած քարերը, որոնց բռնում եմ ճանապարհին, փլւում են և գլորւում ինձ հետ... Անկարելի է առաջն առնել, ետ պահել... Անդունդի յատակում կը հանգստանայ իմ անհոգի մարմինը... Անկարելի է վերականգնել այն, ինչ արդէն մոխիր է դարձած, իսկ սկսելու ես ոյժ չունեմ... Մնաք բարով... Չխղճօք ինձ... Միայն յիշեցէք, որ կար մի մարդ, որը խելագարի պէս սիրել է ձեզ...

ԼԻԶԱ.— Սարումեան, դուք կատարեալ երեխայ էք. հաւատացէք, որ այդ բոլորը կանցնի, որ մենք միասին քամուն կը տանք բոլոր անցած տառապանքների մոխիրը... Երջանիկ կը լինենք և դուք նորից կը սկսէք աւելի մեծ թափով... Սիրում եմ ձեզ. իմ սիրով ես կը բուժեմ ձեր վէրքերը... Ամօթ է այդքան փոքրոգութիւն... Նա, որին ես սիրում եմ. պէտք է միշտ բարձր պահի իր գլուխը... Թողէք այդ մտքերը: Կեանքը

լաւ է, կեանքը մի մեծ պարգև է, բնութեան պարգևը. պէտք է օգտուել այդ պարգևից և ոչ թէ թունաւորել նրան:

ՍԱՐ. — Այդ պարգևը արդէն խլած է ինձանից: Ձեր առաջ կանգնած եմ ես իբրև կենդանի դիակ, անհոգի, անշունչ: Ես քարշ եմ տւել մինչև այստեղ այդ պարգևը, այլևս անկարող եմ առաջ տանել:

ԼԻՉԱ. — Դուք չէք սիրում:

ՍԱՐ. — Ձեմ սիրում... Հա՛, հա՛, հա՛...

ԼԻՉԱ. — Եթէ սիրէիք, դուք կը կարողանայիք թափ տալ ձեր գլուխը, կը շարժէիք ձեր թևերը և դուրս կը լողայիք ջրի երեսը: Իսկ այնուհետև ձեռք-ձեռքի տւած, երկուսս միասին, գլուխներս բարձր, առաջ կերթայինք և կը կառուցանէինք մեր սիրոյ տաճարը... Դուք կը սկսէք ստեղծագործել... Ում Աստուծոց տրւած է՝ նա չի սպառւի:

ՍԱՐ. — Իսկ եթէ ոչինչ տրւած չէ՞, կամ շատ քիչ է տրւած, և այդ քիչն էլ կեանքի ձեռքին մաղւել է: Գլխումս այնպիսի դատարկութիւն է տիրում: 37 տարի տանջւել եմ, մաքառել, կեանքը քամել է իմ լաւագոյն ոյժերը, իսկ այժմ ինչպէս անպէտքացած մի իր, ինձ ափն է նետում... Ես անկարող եմ այլևս կուել:

ԼԻՉԱ. — Թողէք այդ յիմարութիւնները. դուք կը կուէ՞ք և յաղթող դուրս կը գաք այս կուից: Ես ձեզ հետ կը լինեմ, միշտ ձեզ հետ և դուք կը տեսնէք ինչ հեշտ կը լինի յաղթող լինել... Ձեր նեարդերը հիւանդ են, պէտք է կազդուրւել, իսկ այնուհետև հեշտ է: Ձեզ դեռ սպասում են ձեր լաւագոյն գործերը:

ՍԱՐ. — (Կարճ, նեարդային ծիծաղ):

ԼԻՉԱ. — Այսօր դուք կը կարդաք ձեր նոր դրաման և...

ՍԱՐ. — Ի՞նչ դրամա...

ԼԻՉԱ. — Այն, որ վերջացրիք, ձեր նոր դրաման՝ «Կեցցէ կեանքը»:

ՍԱՐ. — Հա՛, հա՛, հա՛. նոր դրաման. գուցէ ուզում էք ասել իմ վերջին դրաման (Մօտենում է Լիզային, ընկում է նրա ձեռքը): Բոլորը այրւեց: Ինձ թւում էր, թէ հնարաւոր է նստել և կրկին գրել: Բոլորը յիշում եմ, բայց ուղեղս յամառութեամբ անշարժ է, երբ նստում եմ սեղանի առաջ: Յամաքել է ոգեւորութեան աղբիւրը: Է՛հ, շարժէ խօսել իմ մասին... Օր. Լիզա, ինչո՞ւ ուշացաք... Դուք կարող էիք փրկել ինձ, ինչո՞ւ չեկաք... Երբ դեռ ուշ չէր:

ԼԻՉԱ. — Դեռ ուշ չէ:

ՍԱՐ. — Ուշ է: Ես արդէն հասել եմ իմ հանգրւանին: Շնորհակալ եմ, դոնէ վերջալոյսին կեանքը ժպտաց ինձ և ժպտող դէմքիս ես կը թողնեմ այս տառապանքի աշխարհը... Այնպէս կշտացել եմ կեանքից, բնութեան այդ մեծ պարգևից... Շնորհա-

կալ եմ, դուք իմ կեանքի վերջին լուսատու պայծառ աստղ: Յիշեցէք ինձ, բայց չխղճաք... Դուք մի ժամանակ մի երգ էիք երգում: Ես միշտ լսում եմ. այդ եղանակը շարունակ հնչում է հոգուս մէջ, բայց խօսքերը, եղանակը մոռացել են: Ես գիտեմ, երբ հասնի վերջին վայրկեանը, ես կրկին կը լսեմ այդ երգը... Եւ այդ երգի հնչիւններն ատակ, անդորր ու խաղաղ կը բաժանւեմ այս աշխարհից: Մնաք բարով: (Ուզում է զնալ):

ԼԻԶԱ.— Ո՛չ, դուք չպէտք է գնաք... Ո՛չ մի տեղ... Ես ձեզ արգելում եմ... Ես սիրում եմ ձեզ...

ՍԱՐ.— Ես պէտք է գնամ. թէ ո՛ւր, ինքս էլ չգիտեմ. ես ձեզ կը գրեմ... Օր. Լիզա, շուտով գարունը կը բացւի. գարնան առաջին մանուշակներին իմ վերջին ողջոյնը... Այ, ես լսում եմ այն երգը... Լսում եմ, նա կանչում, հմայում է, կանչում է... (Արագ զնում է):

ԼԻԶԱ.— (Մի քանի վայրկեան ստաւծ է տեղում. սպա արագ անցնում է դէպի պատուհանը, այնտեղից էլ միւս սենեակը: Բեմը դատարկ է, մի քիչ անց ներս է մտնում Լիզան զխարկով ու հագնելով վերարկուն, արագ դիմում է դէպի դուռը, բայց զանգի ձայնի վրայ կանգ է առնում, քիչ անց ներս է մտնում Լուսիկը):

ԼՈՒՍ.— Սարումեանը քեզ մօտ էր:

ԼԻԶԱ.— (Վախեցած) Այո. ի՞նչ կայ:

ԼՈՒՍ.— Ոչինչ, ոչինչ. ինչո՞ւ այդպէս վախեցար:

ԼԻԶԱ.— Նա նոր գնաց. գնաց... հասկանում ես. ես նրան չպէտք է թողնէի:

ԼՈՒՍ.— Մենք նոր հանդիպեցինք նրան. նա մեզ չնկատեց, կանչեցինք. պատասխան չուեց. այնպէս արագ էր գնում, կարծես ոչինչ չէր տեսնում:

ԼԻԶԱ.— Իսկ ո՛ւր է Շահումեանը:

ԼՈՒՍ.— Նա գնաց նրա ետևից: Մենք մի ժամ առաջ գնացինք նրա մօտ. սանտիկինը ասաց, որ կէս ժամ առաջ դուրս է եկել... Նա ասում է, որ երեք օր է ոչ կերել է, ոչ խմել, փակւած է սենեակում, իսկ թէ ինչ է անում՝ ոչ ոք չը գիտէ:

ԼԻԶԱ.— Նա այնպիսի աչքերով էր նայում... Ես վախեցնում եմ...

ԼՈՒՍ.— Հանգստացիր, ի՞նչ կայ յուզւելու... Շահումին ասել եմ, որ շուտով գայ և մի լուր բերի...

ԼԻԶԱ.— Վատ, վատ լուր կը բերի նա, ես գիտեմ... Գիտեմ:

ԼՈՒՍ.— Ի՞նչեր ես դուրս տալիս:

ԼԻԶԱ.— Կը տեսնես... Գնանք, մենք էլ գնանք նրա մօտ, գնանք, չթողնենք:

ԼՈՒՍ.— Ի՞նչ չթողնենք:

ԼԻԶԱ.— Նա այրել է բոլորը... Այժմ նա իրեն էլ մի բան կանի. նա խելագարւել է (Ուզում է զնալ):

ԼՈՒՍ.— (Պահելով նրան) Դատարկ բաներ ես ասում. հիմա կը գայ Շահումեանը. երևի նա էլ նրա հետ է... Գիտե՞ս, նա քեզ յուրջ սիրում է... Ինչ որ ասել է Շահումին:

ԼԻԶԱ.— Նա չի գայ: (Զանգ): Զանգահարեցի՞ն:

ԼՈՒՍ.— Նա է...

ԼԻԶԱ.— (Գնում է դիմաւորելու):

ԼՈՒՍ.— Ուշքի եկ, այդ ի՞նչի ես նման:

ԼԻԶԱ.— (Դռնեցում հանդիպում է Շահումեանին. Լուռ կանգնած են իրար դէմ դիմաց):

ԼՈՒՍ.— Դէ, ինչո՞ւ ես լռել...

ԼԻԶԱ.— (Շոյում է ճակատը. կարծես վատ կոշմարից նոր է սթափել, բայց դեռ չի կարողանում ազատել):

ԼՈՒՍ.— Մի բան ասաց:

ԼԻԶԱ.— Ոչինչ, ոչ մի խօսք... (Դանդաղ մտնում է եւ ընկնում է աթոռի վրայ) Արդէն...

ՇԱՀ.— (Գլխով դրական նշան է անում):

ԼՈՒՍ.— Ի՞նչու էք լռել, դէ, մի բան ասացէք: (Մտնել է եւ ցնցում է Շահումեանին):

ՇԱՀ.— Արդէն ուշ էր. երբ ես հասայ, հարևանները, ոստիկանութիւնը արդէն խմբւել էին նրա սենեակի մօտ և ինձ ներս չթողին...

ԼՈՒՍ.— Վերաւո՞ր է:

ՇԱՀ.— Մեռած:

ԼՈՒՍ.— (Բռնում է Շահումեանի ձեռքը, դողում է, շղթունքները շարժում են, բայց չի կարողանում ձայն հանել. Մի քանի վայրկեան մտելային լուսթիւն է):


ԼԻԶԱ.— (Ընդհատելով լուսթիւնը) Ես գիտէի... Գիտէի, նա այնպիսի աչքերով էր նայում... Նա ասաց, որ ինքը մեռնելու է գնում և ես թողի, թողի, կախ չընկայ փեշերից, թողի որ գնար ու մեռնէր... Ես կարող էի նրան փրկել... Գարող էի... (Ոտքի ելնելով ասելի ըարձր) Նա այրել է բոլորը, բոլորը, ոչինչ չի թողել:

ՇԱՀ.— Այրել է բոլորը:

ԼԻԶԱ.— Այրել է բոլորը և իր վերջին դրաման, իր կեանքի դրաման... Նա վախենում էր այս կեանքից, որի վրայ մենք այսպէս դողում ենք, պտտում ենք նրա շուրջը մեր փոքրիկ հաշիւներով և վախենում միջանցուկ քամուց... Նա չուզեց ապրել մեզ պէս: Կեցցէ կեանքը, ճշում էր նա, իսկ ինքը դէպի գերեզման դիմում: Գնանք, գնանք նրա մօտ, ես ուզում եմ տեսնել նրան, նա դեռ չի սառել: Ուզում եմ հարցնել նրան, լսե՞ց մոռացւած երգը... Գնանք, գնանք նրա մօտ:

Վ Ա Ր Ա Գ Ո Յ Ր

ՄԻՔ. ՄԱՆԻԷԼՆԱՆ



ԸՆԿԵՐՈՋՍ ՕՐԱԳՐԻՑ

11/v, 1915.

Անգին Վարդ,

Քո հանդիպումն այսօր ինձ ոչ ուրախութիւն և ոչ էլ տխրութիւն պատճառեց:

Երբ մօտովս անցնելիս գլխի թեթև նշանով ինձ կանչեցիր, առանց սարսուռ զգալու, առանց ցնցումների մօտեցայ, սեղմեցի ձեռքդ և տւած հարցերիդ պատասխանեցի հանգիստ, անյուզում:

Նկատեցի քո անհանգիստ լինելը, զգացի, որ ուզում էիր դբօսնել ինձ հետ, բայց չուզեցի. չէ որ հրդեհն արդէն հանգել էր իմ մէջ:

Այժմ զգում եմ, որ կարող ես լինել սրտիցս անջատ, կարող եմ լինել քեզնից հեռու...

Երանի՛ այն օրին, երբ իմ տենչանքը միայն դու էիր. երանի՛ և այս օրին, որ կրծքիս տակ բռնկւած մըրկից յետոյ՝ գլուխս կոթնած աջ ձեռքիս՝ աչքերիս առջև եմ բերում քեզ, ինձ և ինքս ինձնից ամաչում ու ժպտում եմ միայն...

Երանի՛ քեզ, որ սիրեցի բիւրեղի պէս, երանի՛ և ինձ, « հեռացայ՝ թէև սրտիս բեռից ճկած, բայց առանց ամսոսալու... »

Լաւ Վարդ,

Այժմ քո ժպիտների պատասխանը կը լինի ո՛չ յուզում, ո՛չ ցնցում, այլ սոսկ ժպիտ, մի անհոգ ժպիտ...

23/v, 1915.

Շատունց էր, որ չէի տեսել օրիորդ Հեղինէին և ամիսներ կը լինէր՝ չէի այցելել նրանց տուն:

Երէկ պատահամաբ տեսայ Հեղինէին և նրա խնդրանօք գնացի նրա բնակարանը:

Այդօր, բացի Հեղինէից, ինձ համար ամեն բան սովորական էր:

Նա շատ ուրախ էր, նրա մշտական հիւրը՝ տխրութիւնը այցի չէր եկել...

Ես շատ գոհ էի. սրտանց էր իմ հրճանքն ու անյագուրդ:

Երբ նրա գրասեղանից վերցրի մի տետրակ, աշխատեց խլել... Բայց ինձ յաջողեց կարգալ երեկւայ թւով գրւած մի ստանաւոր, որից իմացայ, որ նա այժմ էլ ինձ «արժանի» չէ համարում իր «կուսական» սիրոյն և «ատում» է ինձ, ենթադրելով, որ ես նրան «կատեմ»...

Հեղինէի զգացմունքների խեղաթիւրումը տհաճ թւաց ինձ.

բայց լաւ էր, որ ճշտուեց օրագրուձա ունեցած գիտողութիւնս: Հեղինէի մէջ պատկերիս ու շնչիս հետ մուտք էր գործել թունաւորող աշխարհն ու շօշափել նրա լաւութեամբ անորակելի սիրտը...

Խենթը չէ ըմբռնում մի բան, որ սէրը պայքարի և տանջանքի մէջ է կռում-կոփւում, ձև ստանում:

Նա չէ հասկանում և այն, որ մարդը տանջանքով է կերտւում, սրբագրւում, բայց ափսոս, որ նա ուժատուել ու ընկել է երամից ետ մնացած վատուժ կռուների նման...

— Ատո՛ւմ է. — հոգ չէ. իմ սիրտը շատ է լայն... Ես միշտ, ամենուրեք եղել եմ ժայռ, իսկ կեանքի գոռ ու կատաղի ալիքները եկել, դիպել են ինձ ու փշրւել. բայց ես նորից կանգուն, նորից անտարբեր հանդիսատես եմ եղել միայն:

Մի ալիք էլ սա է, որ փշրւելով նորից յետ կերթայ, կը ձուլւի նրա սրտին ու կը գայ մարմանդ հովերի հետ շոյելու իմ հպարտ կուրծքը, բաց ճակատը...

27/v, 1915.

Այսօր Հեղինէին պատահեցի թէ չէ՝ տխրութիւն իջաւ վրաս ու դժգոհ արտայայտութիւն տւի դէմքիս, որ նա հասկանայ ինձ...

Ինձ տեսնելուն պէս նրա դէմքը սփրթնեց ու կարմրեց...

«Ատո՛ւմ է ինձ»-ը մտքիցս ու շրթունքներիցս չէր հեռանում այդ պահին:

Մի քանի բոպէ անց էր, որ յուզմունքը հաղիւ զսպել կարողանալով հարցրեց.

— Էլի հազո՞ւմ ես:

Ուզեցի պատասխանել.

— Ի դժբախտութիւն ձեր, ո՛չ:

Չասացի, որովհետև նրա միմոզային զգայնութիւն ունեցող սրտին վատ կազդէր, թէև նա սրտիս ամենանւիրական լարերին էր դիպել...

Չար կերպով միայն չարերն են վրէժխնդիր լինում:

Հասկացայ, որ Հեղինէի սիրտը ճմլւեց իմ վերաբերմունքից:

Կարճ լուրթիւնից յետոյ, նա, համարեա շփոթ, առաջարկեց գրօնել:

Մերժեցի...

Չգտց, հասկացա՞ւ ինձ. չգիտեմ, բայց գիտեմ այն, որ նորից նրան նետեցի խոհերի գիրկը, հին տառապանքին նորն աւելացաւ...

Մարդ իմանայ, չէ գղջում այժմ. Հեղինէն չէ մեղանշում ինքն իր սրտի հանդէպ...

Չէ որ նա շատ է սիրել ինձ...

21/XI, 1915.

Դուրսը քամի է և ցուրտ:

Մուգ-կապոյտի մէջ աստղերն հուր-հրաաին են տալիս:

Դարձեալ զրասեղանիս առջևն եմ ու զբաղմունքս էլի՜
թուղթն ու մեղանն է. նորից ու նորից ինձ միակ մխիթարանք
պատճառող աշխատանքն եմ կատարում:

Այդ իսկ պահին էր, որ լիշեցի օրիորդ Հեղինէին և անմի-
ջապէս նրան տեսնելու ցանկութիւն մտաւ մէջս: Նա այժմ լաւ
է. էլ առաջւայ պէս թախծոտ չէ ու էլ կասկածների մէջ չէ
տանջւում:

Ցանկութեանս հակառակ՝ օրոշեցի դուրս չգնալ:

Սենեակիս խաղաղութեան մէջ շարունակում եմ գրել,
բայց աղջկան տեսնելու ցանկութիւնս էլ աւելի է ուժեղա-
նում...

Աշխատանքս անարդիւնք դարձաւ:

Երբ նկատեցի այս՝ դուրս ելայ տանից:

Զբօսավայրում մարդ չկար:

Եղածներն էլ, ասես կարևոր գործով, շտապում էին:

Մի փոքր պատյտից յետոյ, ուզում էի վերադառնալ տուն,
երբ մէկը թևս բռնեց. ետ դարձայ, ծանօթս էր, որի հետ
սովորաբար զբօսանքի էր դուրս գալիս Հեղինէն:

— Ո՞ւր:

Հարցին պատասխանեցի ճիշտ.

— Տուն:

Կարճ զրոյցից յետոյ, երբ ժամացոյցը ութը զարկեց, բա-
ժանւեցինք:

Ու վերադարձիս մի միտք էր ինձ տանջում, թէ՛ «Ինչո՞ւ
դուրս եկայ այս քամուն, ինչո՞ւ դժւարս եկաւ, երբ Հեղինէին
չտեսայ»:

Եթէ պատահէի վարդին, հաւատացած եմ, որ բորբոքւած
ցանկութիւնս կը մեղմանար:

Չէ՞ որ շատ ժամանակ չի անցել այն օրից, երբ նա Ար-
տիկին ասել էր, թէ ինքն ինձ հասկանում է և զգացմունքնե-
րիս վերաբերւում է յարգանքով:

— Յարգանք...

Այս էլ թեթև սպեղանի թող լինի դադւած սրտիս:

Այժմ իմ սէրը դէպի վարդը մեղմ բնոյթ է ստացել. սիր-
տըս նրա համար սկսել է նւազ բաբախել. ասես նրա դէմքն
սկսում է աղօտանալ մէջս...

Վարդ, Հեղինէ...

Առաջինը հիւսւած է սրտիս ու երևակայութեանս լարե-
րից՝ իրականին շնամանող, իսկ երկրորդը՝ միայն մի լաւ աղ-
ջիկ է, հոգուս և սրտիս քիչ բան ասող...

ԵՐԵՔ ԾԱՂԻԿ

(Կատիւ Մեհդէօից)

Ընթերցող, սիրուհիդ դաւաճանում է բեզ, բայց մի յու-
յուսահատուիր, որովհետև քո ցաւը մեր բոլորիս ցաւն է: Երկրա-
գնդիս բոլոր սիրուհիներն իրարից ոչնչով չեն տարբերում:
Վիրաւորելու էլ չէ այդ քնքոյշ արարածներից, քանի որ ի-
րենց անհաւատարմութեան դառնութիւնը իրենք էլ են զգում:
Իսկ այն բոլորի յանցանքը սուլթանուհի Լէյլիինն է:

Սուլթանուհի Լէյլին գուզաժ դուրս էր եկել պարտէզ
ձեմելու: Նա հանդիպելով կախարդ այգեպանին ասաց.

— Ջումշուդ, մինչև հիմա դու իմ բոլոր պատէրները
սրբութեամբ ես կատարել: Եւ եթէ այժմ լսես ու կատարես
էութիւնս համակող կապրիզը, շնորհակալ կը լինեմ առյաւէտ:

— Իշխանուհի, ոչ մի խոչընդոտի դէմ կանգ չեմ առնի:
Ասա, ի՞նչ է ուզածդ:

Պահ մի լռելուց յետոյ սուլթանուհին խօսեց.

— Չեմ ժխտում, Ջումշուդ, որ այս այգու ծաղիկները
գեղեցիկ են և բուրաւէտ: Այո, այստեղ աճում են յակինթներ,
յասմիններ և այլ հոտաւէտ ծաղիկներ, և եթէ ես մի վարդ պոկեմ,
անշուշտ, ինձնից յետոյ մի ուրիշ կին հնարաւորութիւն կու-
նենայ նոյն ծաղկից ունենալու: Իմ բարի Ջումշուդ, ստեղծիր
այնպիսի եղակի ծաղիկներ, որ բացի ինձնից ուրիշ ոչ ոք չը-
կարողանայ ձեռք բերել. ծաղիկներ, որ եղակի լինեն տիեզեր-
քի մէջ և միմիայն ինձ զարդարեն, բուրեն:

— Օ, տիրուհի, ինձ համար շատ հասարակ բան է քո
կամեցածը: Տեսնում ես այս թուփը, որ աւելի բարձր է, քան
պարտէզի ցանկապատը. նա իր խիտ ոստերի և տերևների
ետեր թագցնում է երեք ծաղիկ, որ իրենց գունագեղու-
թեամբ և արբեցուցիչ բոյրով մի-մի սքանչելիք են: Հետևիք
ինձ և ընտրիր այն ծաղիկներից մէկն ու մէկը. քաղածդ ծա-
ղիկը այլևս ոչ մի շառաւիղ չի ունենայ տիեզերքի մէջ:

— Ի՞նչպէս. երեք ծաղիկներից միայն մէկը պոկելու
իրաւունք ունեմ:

— Այո, Իմ իշխանութիւնը միայն մէկով է սահմանափակ-
ւում:

— Որ այդպէս է, ես էլ իմ ցանկութիւնները կը չափա-
ւորեմ: Դէհ, շուտով ցոյց տուր ինձ այն ծաղիկները:

Այնքան հրաշալի էին այն ծաղիկները, որ Լէյլին տեսնե-
լով նրանց՝ ուրախութիւնից ճչաց: Ծածիկներից մէկը հպարտ,
մեծ և վսեմ, գմբուխէ թերթիկներով, ասես՝ հիւսւած ձիւ-

նից և ոսկուց, մի վարդի էր նման, որ մոռացնել էր տալիս արշալոյսի փառահեղ ցոլցլանքը:

— Ի՞նչ է այս ծաղկի անունը, — հարցրեց սուլթանուհին:

— Կեղեցկութիւն, — իշխանուհի:

Երկրորդ ծաղիկը՝ վառկարմիր պսակով, նոր ծագող արեգակի բոլորակն էր յիշեցնում. նա հրապուրում և միաժամանակ սառսուռ էր ազդում նայողին. ասես մի այրող հեղուկ կաթիլ-կաթիլ ծորում էր սիրտդ, անուշ ցաւ պատճառում:

— Ի՞նչպէս է կոչւում այս ծաղիկը:

— Սէր, իշխանուհի:

Երրորդ ծաղիկը, համեստ և դալուկ, նման էր սպիտակ հագած դեռատի աղջկայ. նրա թերթիկները իրենց քնքոյշ ծալքերում խորունկ թախիժ ունէին պարփակած. հեղիկ շուշանի էր նման նա՝ հիւսւած վեհութեան ու առաքինութեան թելիկներից:

— Իսկ ի՞նչպէս անւանեմ այս երրորդ ծաղիկը:

Սուլթանուհի, Հաւասարմութիւն է նրա անունը:

Լէյլին ընկղմեց մտածմունքի մէջ:

— Ի՞նչ կը լինի, եթէ պոկեմ այս ձիւնից և ոսկուց հիւսւած վարդը, — հարցրեց նա կարծես քնից սթափւած:

— Այլևս, երբէք նա չի փթթի:

— Կախարդ, ուզում ես ասել՝ գեղեցկութիւնը երկրիս երեսից յաւիտեան կը վերանայ:

— Չես սխալւում, տիրուհի:

— Ի՞նչպէս, ուրեմն ես էլ կը տգեղանամ:

— Այո, դու էլ:

— Իսկ եթէ այս կախարդ պոկեմ՝ ի՞նչ կը լինի, — ասաց Լէյլին մօտենալով երկրորդ ծաղիկին:

— Նրա սերունդն էլ կոչնչանայ:

— Այլևս քեզ ոչ ոք չի սիրի, թէև դու կը լինես նոյնչափ գեղեցիկ և հրապուրիչ:

Լէյլին թեքեց դէպի երրորդ ծաղիկը և հարցրեց.

— Իսկ եթէ այս դալուկ և վշտոտ շուշանը քաղեմ:

— Շուշանն էլ երբէք չի փթթի:

— Կը նշանակէ հաւատարմութիւնը կը վերանայ երկրիս երեսից, բոլոր կանայք կը դաւաճանեն իրենց մարդկանց և սիրահարներին:

— Այո: Կանայք ոտնատակ կը տան իրենց ամենասրբազան երդումն անգամ:

Պահ մի տատանւելուց յետոյ Լէյլին ծիծաղելով ասաց.


— Չարիքներից փոքր սգոյնը պիտի ընտրել, վհուկ, ցանկութեանս յագուրդ տալու համար պիտի պոկեմ այս երեք ծաղիկներից մէկը, աւելի լաւ է որ...

Եւ սուլթանուհին պոկեց վեհութեան և առաքինութեան

Թելիկներին հիւսւած դժգոյն և թախծոտ շուշանք: Ջոււմշուղն սկզբում գովում էր այդ ընտրութիւնը, որովհետև հաւատարմութիւնը գլխատելուց յետոյ դեղեցիկ Լէյլին անմիջապէս թողեց իր ամուսնուն. նա երեք օր շարունակ ապրում էր կախարդի հետ. իսկ չորրորդ, օրւայ արշալոյսին այլևս ոչ ոք տեղ չունէր սուլթանուհու հոգու մէջ: Նա թողեց ամեն ինչ, գնաց հեռու, նորանոր հորիզոններում թարմ դէմքեր փնտրելու: Եւ այսպէս վերջնապէս խողողեց հաւատարմութիւնը...

Օ, հաւատա ընթերցող, հենց այս վայրկեանիս սիրուհիդ դաւաճանում է քեզ:

ՅԱՐ. ՄԵԼԻՔՈՒՄԵԱՆ



ԲՈՎԱՆԴԱԿՈՒԹԻՒՆ

Վարոճնիկ Աղասեան		Մեծասունեան	
** (բանաստ.)	24	Հաշտութիւն (բան.)	34
Սօսին (բան.)	118	Յար Մելքումեան	
Ազատ Աւսուցիչ		Երեք ծաղիկ (Կատիւլ Մեհրէից)	189
Յուսուքում բանաստ.	150	Պ ա հ ա ռ է	
Ն. Աճրիկեան		Անմահական երգը (բան.)	34
Սօնէտ (բան.)	24	** (բանաստ)	81
Կայարանի մօտ (բան.)	117	** ()	149
Գիսակ		Վիքու Չիցնի	
Կենդանիներէ ժողովը (առակ)	41	** բանաստ.)	90
Առակ	96	Գ. Շահինեան	
Գր. Դրիգորեան		Հեթանոսական սաղմոսներ	91
Հին խրճիթը (Ս. Կլէմէնտիէից)	93	Սար-Յով	
Ռաճայիլ Ջարգարեան		Հարաւի ծաղիկներ (բան.)	148
Օրագիր	16	Վ. Վալադեան	
Փոքրիկ արձակ երգեր	76	Չորանչի մահը	5
** (արձ. բան.)	118	Երկիրն Կովկաս	119
Սս. Ջօրեան		Վահան Տէրեան	
Պապն ու թոռը	17	Եթէ չկայ Աստուած (բան.)	66
Սատանայ	49	Տրիօլէտ (բան.)	104
Սպիտակ տան բնակիչները	107	Աւմենուի Տիգրանեան	
Մ. Կլարիկ		** (բանաստ.)	23
Ընկերոջս օրագրից	25	Աչերիդ (բան.)	23
Հանդէս	89	** (բանաստ.)	75
Ընկերոջս օրագրից	187	** ()	104
Վահան Թարովեց		Ն. Տիրոսեց	
Ի խորոց սրտի խօսք ընդ Աստուծոյ	78	Ստեփան Մելիքեան	35
Արժաւիտ Խանդկարեան		Եղիա Տէր-Հայրապետեան	
Իմ այցելուն (բան.)	15	** (բանաստ.)	150
** (բանաստ.)	88	Տիգրան Տէրունի	
Աւագ Կածիկեան		Տրամաթեան նւագներից (բան.)	81
Մէկը (պատմածք)	43	Գ. Բեալաճեան	
Միք. Մանուկեան		«Ծաղիկի յետև» գրքից՝ Վիտալի	82
Կարպ Կարպիչը	67	Պաւլովիչ	105
Սրճարանում	97	Աղօթք (բանաստ.)	105
Կեցցէ Կեանքը (չրամտ)	151		



ԲՈՎԱՆԴԱԿՈՒԹԻՒՆ

	Երև
Մ. ՄԱՆԻԷԼԵԱՆ—Սրճարանում	97
—ԼԱՀԱՆ ՏԷՐԵԱՆ—Տրիօլէտ (բան.)	104
ԱՐՄԵՆՈՒՀԻ ՏԻԳՐԱՆԵԱՆ - ** (բան.)	104
Գ. ՔԵԱԼԱՇԵԱՆ—Աղօթք (բան.)	105
ԱՆՈՒՐՁ - ** (բանաստ)	106
ՍՏ. ԶՕՐԵԱՆ—Սպիտակ տան բնակիչները	107
Ն. ԱՖՐԻԿԵԱՆ—Կայարանի մօտ (բան.)	117
ՎԱՐՍԵՆԻԿ ԱՂԱՍԵԱՆ—Սօսին (բան.)	118
ՌԱՖԱՅԷԼ ԶԱՐԴԱՐԵԱՆ—** (արձ. բան.)	118
Վ. ՎԱԼԱԴԵԱՆ—Երկիրն Կովկաս	119
ՍՍՐ-ՅՈՒՎ—Հարաւի ծաղիկներ (բան.)	148
ՊԱՀԱՐԷ - ** (բան.)	149
ԵՂԻԱ ՏԷՐ-ՀԱՅՐԱՊԵՏԵԱՆ—** (բան.)	150
ԱԶԱՏ ՎՇՏՈՒՆԻ—Յուսալքում (բան.)	150
ՄԻՔ. ՄԱՆԻԷԼԵԱՆ—Կեցցէ Կեանքը, դրամա 3 գործ.	151
Մ. ԷՓՐԻԿ—Ընկերոջս օրագրից	187
ՅԱՐ. ՄԵԼԻՔՈՒՄԵԱՆ—Երեք ծաղիկ	190


„ՊԱՏԱՆԻ“ ՀՐԱՏԱՐԱԿՉԱԿԱՆ ԸՆԿԵՐՈՒԹԻՒՆ

«Իրակ.-Գեղարեստ. Արմանախի» շուրջ համախմբւած մի խումբ երիտասարդների նախաձեռնութեամբ թիֆլիսում կազմակերպւել է «Պատանի» Փայտաիրական Հրատարակչական Ընկերութիւն, որի նպատակն է առանձին գրքերով հրատարակել երիտասարդ գրողների ինքնուրոյն և թարգմ. գեղարեստական գործերն ու քննադատական աշխատութիւնները՝ «Երիտասարդ Գրողներէ Գրադարան» անւան տակ: Ընկերութեան փայն արժէ 25 սուրբի: Փայ գնել ցանկացողները դիմելու են կազմակերպիչ մարմնի լիազօր Մ. Էփրիկեանին (Սոջիվանքի փող. 5): Գրադարանի № 1-ը արգէն լոյս է տեսել, որ պարունակում է Միք. Մանուէլեանի Երկերի ժողովածուն և արժէ 3 ա. 50 կ.:

ՍՏՅՅԻՄԺ ՀՐԱՏԱՐԱԿՈՒԹԻՒՆՆԵՐ

- Եղիօէ Զարեց—Բանաստեղծութիւններ, էջ 62, գինը 75 կ. Մոսկւա 1917 թ.:
- Սուրէն Մելիքեան—Հայ կամաւորի յուշերից, էջ 107 գինը 60 կ. թիֆլիս, 1917 թ.:
- Թատրոն և Խաճճութիւն—Թատերական հանդէս, Բազու:
- Վան-Տասպ—Շարաթաթերթ, թիֆլիս:
- Միւրիւն—Աշակերտական շարաթաթերթ, թիֆլիս:
- Աօխառանգ—Շարաթաթերթ, Երևան:
- Գաղիւր—Աշակերտական ամսագիր, Գանձակ:
- Ս. Բազէն—Արևելքի մրմունջներ (բան.), Թաւրիզ, 1917 թ. էջ 8, շքեղ հրատարակութիւն:
- Համբուարեր—Շարաթաթերթ, թիֆլիս:
- Ան. Արուկեան—Հեռիկաթը (մանկ. յիշողութ.) էջ, 221, գ. 1 ա. 25 կ., թիֆլ. 1917 թ.

Գ. ՈՐՁ. Ա. Կ. Ա. Ն. Ե. Բ. թիֆլիս—Երևանի Տոլակ, Վաղարշակ Յովհաննիսեան, Մ. Սօրի-Մելիքեան, օր. Ա. Ահարոնեան, Ան. Քուսմանեան, Հ. Պետրոսեան և օր. Ե. Տէր-Յակոբեան: Բ ա թ ու մ—Արշակ Մարութեան: Բ ա գ ու լ—Աւագ Կոծիկեան: Ա լ է ք ո ս ն դ ը ա ս ո լ —Արշաւիր Սոնդկարեան: Շ ու շ ի—Մ. Մուսայէլեան: Կ ո կ ա ն դ—Արսէն Օհանեան, Թ է հ ը ա ն—Ա. Գարագոյ, Երևան—Արփենիկ Գորոյեան:



Վ. Ա. ՆԱՍՏՈՒՄ ԵՆ

„ՊԱՏԱՆԻ“ ԱԼՄԱՆԱԽԻ

1910—12 թ.թ. համալսելիաները,	դ. 3 ս.	— 4.
1913 թ.	» (սակառ.) 3 ս.	— 4.
1914 թ.	» (») 2 ս.	— 4.
1915 թ. I—II դրերը		— 50 կ.
Մ. Մանուէլեան—Երկերի ժողովածու	3 ս.	50 կ.
«Գրակ.—Գեղարուեստ, Ալմանախ»	I դ.	70 կ.
» » »	II դ.	80 կ.
» » »	III—IV դ. 2 ս.	50 կ.
Աւագ Կոճինեան Cloria victis		20 կ.
Լեոն Լեոնի—«Իմ էսքիզներից»		20 կ.
Հ. Համբարեան—Տարաբախտ Ուսանողը		25 կ.
Մ. Յովհաննիսեան—Մրմունջներ		10 կ.
Բոլոր 29 դրերը միասին ճանապարհածախսով արժեն	18 անրի:	Գիմել Թիֆլես, Ходживалская 5. М. Эприкянъ.



